

P 106

us
ta
mit
ri

10
11
12
13
14
15
16
17
18
19
20
21
22

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

P 106

us
ta
mit
rie

DA
V
VE

3

9.106

Ex Libris
Pauli Bevilacqua
Portusgr. Presbyt.

BIBLIOTECA
SEMINARIO V.
PORDENONE

A

B

ARI s3



A

XI-1

19

P. 106



1


ARISTOTELIS

DE ARTE RHETORICA

LIBRI TRES.

CAROLO SIGONIO

INTERPRETE.



BONONIAE,

Ex Officina Alexandri Benatii.

MDLXV.




ARISTOTELIS

DE ARTE RHETORICA

LIBRI TERCIUS

CAROLO SIGONIO

INTERPRETE



HONORAT

Ex Officina Alexandri Pannili.

MDLXV.




ORNATISS. VIRO

HORATIO MALEGVTIO

PATRICIO · REGIENSI.

CAROLVS SIGONIVS S.



VANTVM ingenium Aristoteles, quantamq. ad res omnes, quæ aliqua doctrinæ laude continerentur, inuestigandas, tradendasq. solertiam, atque elegantiam adhibuerit, quanquam nemo est, qui primoribus modo labris diuinos illius artium omnium commentarios degustarit, se non optime nosse profiteatur, vere tamen pauci sunt, qui rectum de re tanta ferre iudicium queunt. Pleriq. enim eorum, qui eiusmodi in studio his temporibus elaborant, quod aut græca non intelligant, aut commodius certe latina percipiant, græcos Aristotelis libros haudquaquam attingunt, ijs vnus delectantur, qui de græcis quoquo modo conuersi sunt. quibus quidem satis constat, ad doctrinam, venustatemq. Aristotelicam cognoscendam fingi nihil posse peruersius. siquidem qui scripta Aristotelis latinis adhuc litteris expresserunt, ij fere sententiam quidem vix, nitorem ve-

ro, acumenq., ac breuitatem illam huius philosophi propriā nequaquā cōsequi potuerunt. nimirū quòd eorū alii solis verbis, alij solis sententijs exprimendis intēti nō magnopere de vtroq. coniungēdo officio laborarunt. Etenim qui ea se obstrinxerūt religione, vt singulas uoces eodem, quo grāce sunt, ordine referrent, atq; quodammodo numerarent, ij se potissimum in illos difficultatum laqueos induere, vt non dicendi solum formulas latinis hominibus inauditas, ac voces plane barbaras adhibere saepe coacti sint, verum vt ineptum quendam etiam, atq; obscurum, ac prope ferreum scriptorem ubiq. repræsentarint. contra vero qui superstitiosum illud verborum aucupium auersati totos se concipiēda, atque explicanda quoquo modo sententiæ dederunt, ij in eo peccarunt, quòd verborum copia omnia dilatare, atque oratorio numero comprehendere voluerunt. quod vt ipsi assequerentur (neque enim eiusmodi Aristotelis tenuitas ornamenta requirit,) multa interdum omiserunt, nonnulla etiam ad perficiendum, ac prope rotundandū ambitum addiderunt. ex quo factum est, vt ex illorum interpretatione propter nimiam ieiunitatem saepe nullum, ex horum autem propter luxuriantem vbertatem raro commodum sensum eliciamus. Atque his quidem uitij cū omnes ferme Aristotelis interpretes sunt affecti, tum maxime, qui adhuc libros illius rhetoricos attigerunt. Etenim neminem paullo elegantiore

5

gantio rem inuenias, quin gratiam scribendi Aristotelicam inani verborum varietate, & elatiore quodam spiritu persequatur; neminem item paulo prudentiorem, quin, vt singula verba reddat, noua aliquot dicendi genera, immo potius fœda quædã latinæ linguæ portenta in Aristotelicam disciplinã inducat. quasi vero aut elegans illa Aristotelis, vt ita dicam, siccitas nisi corruptis priscis latinæ orationis formulis apte exprimi, aut exquisita hæc præceptorum grauitas, nisi addendo, demendoq. atq; grandiore sine ratione numerum aucupando, comode representari non possit. Neque vero inficias ibo, quin cum omnis interpretandi ratio lubrica, ac difficilis sit, tum hæc ipsa, quam ego in plerisq. desidero, omnium maximis difficultatibus impedita sit. quippe quæ mediam quandam viam ingressa, extrema illa, de quibus dixi, vitiosa, atque corrupta defugiat. quam laudem nemo vnquam nisi magnis instructus ad intelligendum, agendumq. præfidijs præclare est mea quidem sententia consequutus. Veruntamen, quoniam res est præclara, atque doctorum omnium studio, & exercitatione dignissima, experietur, si me audiet, vnusquisque, quoad li-
cuerit, quantum in hoc genere aut ingenio consequi, aut diligentia possit. Ac me quidem vt hoc ipsum in tribus præsertim oratorijs eius tentarem hoc tempore, animus impulit. tum vt multorum hoc à me in Patauino, Bononiensiq. gymnasio petentium



petentium summis studiis, honestissimisq. obsequer, tum vero, vt consilij, iudicijq. huius de recta interpretandi ratione mei effigiem, si possem, aliquā adumbrarem. sic enim eos verti, vt neque diligentiam priorum in singulis verbis, quoad res pateretur, reddendis, neque spiritum posteriorum in sententia eo, qui à verbis dabatur, numero concludenda neglexerim, verum vt multum de ridicula illorum superstitione, sic non minimum de periculosa horum in conuertendo libertate detraxerim, ac vtere demum latinorum in dicendo, quoad eius fieri potuit, consuetudine conseruata, non sensa solum, sed verba etiam summi rhetoris referre cum aliqua breuitatis, & cuiusdam quasi in disputando sobrietatis eius æmulatione conatus sim. Fecit autem cum summum meum erga te studium, præstantiss. vir Horati, tum præcipuum quoddam de te iudicium, vt meæ huius, quæcunq. sit, lucubrationis opus voluerim in tuo potissimum nomine diuulgari. Etenim si tribuendum amoris in eiusmodi re fuit aliquid, quem potius hoc munere ornarem, quàm te ipsum, quo neminem iam pridem habeo, aut amicitia vetustate coniunctiorem, aut animi erga me propensione superiorem? si virtuti, ea primum nobilitas tua est, vt maximo quoq; honore dignissimus videaris, ea porro doctrina, vt de toto hoc genere vnus præter ceteros possis optime iudicare. cum præsertim satis cõstet, te cum domi tuæ familiæ




7
lia vetustate, ac maiorum dignitate florere, tum ab
ineunte ætate non in tota solum philosophia ma-
gna cum ingenij laude versatū esse, verum, quod ra-
ro contingere solet, singularem quandam etiam in-
teriorum harum litterarum noticiam adiunxisse.
Vale. BONONIAE. Idib. Septembr. M D L X V.

in vetustate ac maiorum dignitate florere, immo
incensum, quod in tota solani philosophia ma-
gis est ingenuum, sed etiam est verum, quod in
recongregata solis ingenuitate quidam etiam in-
veniri possunt, ut nonnulli nobis testantur.
V. B. Bononiensis. 2. Septembris. M. D. C. X.

ARISTOTELIS ARTIS
RHETORICAE,

Carolo Sigonio Interprete,



LIBER PRIMVS.

Rhetoricam Artem esse.



RHETORICA respondet dialecticæ. ambæ enim de eiusmodi quibusdam rebus sunt, quæ communes, quodammodo, sunt omnium ad cognoscendum, nec ullius scientiæ definitæ. itaque omnes utriusque quodammodo participes sunt. siquidem omnes quadam tenus & exquirere, ac questionem tueri, & defendere, atque accusare conantur. Ac ex uulgari quidem multitudine alii temere hæc faciunt, alii propter consuetudinem ab habitu. quoniam autem utroque modo contingit, profecto eadem etiam conficere ratione, & uia licebit. quamobrem enim consequuntur, quod uolunt tum qui consuetudine dicunt, tum qui casu, causam perscrutari licet. id quod demum omnes artis munus esse concesserint.

B I Artem

Artem rhetoricam ab alijs imperfecte
traditam esse.

AC QVI artem quidem hoc tempore orationum componunt, exiguam eius particulam tradiderunt. quia sola fides artificiosæ, reliqua uero additamenta sunt. at hi de enthymematibus, quod corpus est fidei, nihil dicunt, de iis uero, quæ sunt extra rem, plurima tradunt. siquidem criminatio, & misericordia, & ira, et eiusmodi affectus animi non de re sunt, uerum ad iudicem referuntur. Quare si in omnibus esset iudiciis, perinde ac in nonnullisque nunc est ciuitatibus, & præsertim bene constitutis, nihil haberent, quod dicerent. omnes enim partim consent, ita leges oportere iubere, partim uero etiam obseruant, & prohibent, extra rem dicere; quemadmodum etiam in Areopago: recte ita statuentes, neque enim iudicem distorquere oportet, ad iram impellendo, aut inuidiam, aut misericordiam; quia perinde est, ac si quis regulam, qua usus est, torqueat. præterea uero perspicuum est, controuersantis nihil esse, præterquam ostendere, rem esse, aut non esse, aut factam aut non factam esse; magna uero, an parua, aut iusta, an iniusta sit, quæ legislator non enodauit, ipsum nimirum iudicem oportere cognoscere, neque à controuersantibus discere. Ac maxime quidem conuenit, recte conditas leges omnia, quæcunque possunt, ipsas decidere, & quàm paucissima iis, qui iudicant, permittere; primum, quia unum nancisci, & paucos facilius est, quàm multos, qui recte sentiant,

ſentiant, & poſſint leges condere, & ius conſtituere; de-
inde legum lationes longa prouiſione animi fiunt, iudi-
cia uero derepente, ut difficile ſit, eos, qui iudicant, iu-
ſtum, ac utile recte reddere; quod autem omnium maxi-
mum eſt, quia legislatoris iudicium non de parte, neque
de præſentibus, ſed de futuris, & de toto eſt, concio uero,
& index de præſentibus iam, ac certiis iudicant; quibus
cum & amor demum, & odium, & proprium commo-
dum coniunctum eſt ſæpenumero, ut ueritatem perſpi-
cere amplius nequeant, ſed iudicio propria uoluptas, aut
dolor officiat. Ac aliarum quidem rerum, quemadmo-
dum dicimus, quàm pauciſſimarum conſtituere dominiũ
iudicatorem oportet; factum uero ſit, an non factum,
futurum, an non futurum, ſit, an non ſit, iudicatoribus
permittere neceſſe eſt. Quæ ſi ita habent, ſane perſpi-
cium eſt, quæ ſunt extra rem, eos tradere, qui cetera
perſequuntur, ut quid oporteat proæmium, aut narra-
tionem habere, atque unanquamque partium aliarum;
quia nihil in iis præcipiunt aliud, quàm quo pacto cu-
iuſdam modi iudicatorem efficiant, artiſcioſas uero fi-
des haudquaquam attingunt, hoc eſt, unde aliquis enhy-
mematicus erit. Ob hanc enim cauſam cum eadem ra-
tio, ac uia concionum, iudiciorumq; ſit, cumq; pulchrior,
& ciuiliior concionum tractatio ſit, quàm contractum,
de illa quidem nihil loquuntur, de litigando uero præci-
pere omnes conantur; quia minus ſuppetit, quæ extra
rem ſunt, in concionibus dicere, & minus malitioſa iuris
diſputatione concio eſt, ſed communior. hic enim iudica-

tor propriis de rebus iudicat, ita ut nihil aliud opus sit, quam demonstrare, ita se habere, ut ait ille, qui consulit, in iudiciis uero non est hoc satis, sed præstat, auditorem arripere, quia de alienis rebus iudicium est. quo fit, ut ad se referentes, et ad gratiam audientes controuersantibus largiantur, non autem iudicent. itaque multis in locis, ut modo dixi, lex extra rem dicere prohibet, ibi uero iudicatores ipsi hoc custodiunt satis. Quoniam autem artificiosam methodum circa fides uersari perspicuum est, fides uero demonstratio quædam est (tum enim fidem habemus maxime, cum demonstratum esse opinamur) est autem oratoria demonstratio enthymema, atque hoc, ut simpliciter dicam, fides est nulla potentior, enthymema uero syllogismus est quidam, de syllogismo uero æque omni uidere, dialecticæ est, aut ipsius totius, aut partis aliquius: profecto qui maxime potest uidere, ex quibus, et quo modo fiat syllogismus, hic etiam enthymematicus erit maxime, cum assumpserit, in quibusque uersentur enthymemata, & quemadmodum à logicis differant syllogismis. etenim uerum, & simile uero eiusdem est facultatis uidere. quin & homines ad uerum à natura facti sunt satis, & plerunque ueritatem assequuntur. itaque ad probabilia conicienda aptum esse eius est, qui ad coniciendam etiam ueritatem est aptus. Ac quemadmodum quidem ceteri, & quæ sunt extra rem, ad artem reuocent, & quare potius ad iuris disputationem deflexerint, patet.

Rhetoricam vtilem esse.

VTILIS autem est rhetorica, quod uera, & iusta natura meliora sunt, quàm contraria, usque adeo ut nisi, prout conuenit, iudicia fiant, ex ipsis superari necesse sit. id quod reprehensione dignum est. deinde uero cum nonnullis, neq; si exquisitissimam habeamus scientiam, facile est ab illa persuadere loquendo; est enim doctrinae ea, quæ refertur ad scientiam, ratio. hoc autem effici non potest. immo ex communibus fides, rationesque ducere necesse est, perinde ut in *Topicis* de colloquiis cum uulgari multitudine diximus. præterea uero contrarias res posse persuadere, non aliter, atq; in *Syllogismis*, oportet; non ut faciamus utrunque, (neque enim prauas persuadere debemus) sed ne lateat, quo modo se habeat, & ut alium rationibus his iniuste utentem refutare possimus. ac aliarum quidem artium nulla contrarias res *Syllogismo* concludit, sed dialectica, & rhetorica solæ hoc faciunt; quia peræque sunt ambæ contrariorum. subiectæ tamen res non eodem modo se habent, sed semper ueræ, & meliores natura facilius *Syllogismo* concludi, meliusque persuaderi possunt, ut simpliciter dicam. ad hæc absurdum est, si turpe sit, non posse sibi corpore subuenire, oratione uero non sit turpe, quæ magis hominis propria est, quàm corporis usus. Quod si quia ualde nocuerit, qui eiusmodi rationum facultate iniuste utatur: et hoc commune est aduersus omnia bona præter uirtutem, & maxime aduersus ea, quæ uilissima sunt, ut robur, ualetu-

ua'etudinem, diuitias, rei militaris scientiam. hac enim aliquis proderit plurimum, si utatur iuste, & nocuerit, si iniuste. Ac non esse quidem unius cuiusdam generis definiti rhetoricam, sed perinde ac dialecticam, eamque utilem esse, perspicuum est: neque fidem facere munus eius esse, sed uidere, quæ in quaque re ad fidem idonea, siue persuasibilia insint. neque enim medicinæ est, sanum facere, sed quatenus fieri potest, eatenus perducere; quippe cum & qui non possunt sanitatem consequi, liceat tamen curare recte: ad hæc uero eiusdem esse, uidere & persuasibile, & quod uidetur persuasibile, perinde ac in dialectica syllogismum, & qui uidetur syllogismus. neque enim sophisticus est in facultate, sed in præelectione; uerum hic quidem unus erit ex scientia, alter uero ex præelectione, orator; ibi uero sophista quidem ex præelectione, dialecticus autem non ex præelectione, uerum ex facultate.

Rhetoricam esse facultatem uidendi
quod idoneum sit ad fidem.

NUNC uero de hac methodo demus operam, ut & quo modo, & ex quibus proposita consequi poterimus, exponamus. Tanquam igitur de integro ordientes reliqua, definito, quid ipsa sit, exequamur. Sit ergo rhetorica facultas uidendi, quod in quaque re ad fidem idoneum esse contingit. hoc enim nullius alterius est artis munus, quia aliarum unaquæque circa id, quod ipsi subiectum
est,

est, docendi uim, ac persuadendi exercet: ut medicina circa sanabile, & morbosum, & geometria circa affectus qui accidunt magnitudinibus, & arithmetica circa numerum, similiterq; reliquæ etiam artes, ac scientiæ: rhetorica uero de re data, ut ita dicam, existimatur posse persuasibile commentari. quo fit, ut eam circa aliquod genus proprium definitam uim artis exercere negemus.

Fidem vnâ esse artificiosam, alteram expertem artis.

FIDES autem aliæ carentes artes sunt, aliæ artificiosæ. carentia uero arte uoco, quæ nos non peperimus, sed ante erant, ut testes, quæstiones, syngraphæ, & quæ sunt generis eiusmodi. artificiosa uero dico, quæ per artem, & per nos parere possumus. quo fit, ut illis quidem uti, hæc uero inuenire debeamus.

Fides artificiosas esse demonstrationem, affectus, & mores.

FIDES autem, quæ ratione pariuntur, in tres species diuiduntur. nam aliæ sunt in moribus eius, qui dicit, aliæ in eo, ut aliquo modo afficiatur ille, qui audit, aliæ in ipsa ratione, propterea quia demonstrant, aut demonstrare uidentur. Ac propter mores quidem: quoties ita dicta fuerit oratio, ut fide dignum reddat eum, qui dicit; probis enim asseritur uehementius, ac citius, cum in omnibus

omnibus quidem rebus simpliciter, tum uero in quibus certi nihil est, uerum ambigitur, etiam utique. uerū oportet, hoc etiam ope orationis usuuenire, non autem, quia anticipatum opinione sit, cuiusdam modi eum esse, qui dicit; neque enim: perinde ac nonnulli dicendi artifices dicentis probitatem in Arte posuerunt, quasi mores ad fidei uim nihil proficiant, sed potentissimam propemodum, ut ita dicam, fidem obtinent: propter auditores autem: quando ad affectum ab oratione compulsi sint; neque enim eodem modo iudicia facimus dolentes, ac gaudentes, aut amantes, ac odio inflammati. qua de re uel sola conari tradere, qui de dicendi arte nunc scribunt, asserimus. atque hæc quidem sigillatim explanabuntur, tum cum de affectibus disputabimus; propter rationes autem assentiuntur, cum uerum, aut quod uidetur, ostenderimus ex iis, quæ in quaque re sint, ad fidem accommodatis. Quoniam igitur fides per hæc fiunt, perspicuum est, tria hæc consequi eius esse, qui cōcludere syllogismo possit, & qui perscrutari mores, ac uirtutes, & tertio loco qui, affectus, quidque singuli sint, & quales nam, & ex quibus excitentur, & quo pacto. Ex quo efficitur, rhetoricam quasi agnatum quiddam esse dialectices, & particulam eius, quæ de moribus est, disputationis, quam par est appellare politicam. itaque suscipit personam politicæ & rhetoricæ, & ii, qui sibi hanc uindictant, partim propter inscitiam, partim propter arrogantiam, partim propter alias etiam causas humanas. est enim particula quædam dialectices, & similitudo,

do, quemadmodum initio diximus. neutra enim earum de aliqua re definita scientia est, quo pacto se habeat, sed parentiarum rationum quaedam facultates. Ac de ui quidem earum, & quo modo inter se affectæ sint, ferme disputatum est satis.

Demonstrationem oratoriam enthymemate, & exemplo fieri: & quid eorum utrunque sit.

QVAE uero fides aut demonstrando, aut speciem demonstrationis afferendo fiunt, ut in dialecticis una est inductio, altera syllogismus, alia, is qui speciem præ se fert syllogismi, item hic eodem modo. est enim exemplum inductio, enthymema uero syllogismus. uoco autem enthymema oratorium syllogismum, exemplum uero inductionem oratoriam. omnes autem demonstrando fidem faciunt, aut exempla, aut enthymemata proferentes, & præter ea quodammodo nihil. Quare si omnino necesse est, ut syllogismo, aut inductione quodcunque, aut quencunque. demonstramus (quod nobis liquet ex Analyticis) utrunque eorum cum utroque horum idem esse necesse est. Quid uero inter exemplum, & enthymema interfit, declaratur ex Topicis. ibi enim de syllogismo, & inductione ante dictum est, nempe, cum in multis, & similibus ita se habere ostenditur, ibi quidem inductionem esse, hic uero exemplum. at uero quibusdam existentibus, ex iis effici aliud quid præter ea, quia ea sint, aut in totum, aut plerumque, ibi quidem syllogismus, hic uero enthymema uocari. Neque uero dubium est, quin utrunque

bonum species quoque rhetoricæ habeat. Si quidem perinde in his se res habet, ac in Methodicis dilu est. sunt enim oratoricæ dictiones aliæ exemplares, aliæ enthymematicæ. itemq. oratores alii exemplares, alii enthymematici. nec uero minus ad fidem appositæ sunt orationes, quæ exemplis, sed uehementius perturbant enthymematicæ. causam uero eorum, & quo modo utroque utendum sit, post dicemus. nunc de his ipsis apertius explicemus.

Quæ sit materia, & forma enthymematis.

Q VONIAM enim persuasibile est alicui persuasibile, atque unum quidem statim est ex se persuasibile, & credibile, alterum uero, quia ex talibus demonstratum uidetur esse; nulla uero ars intendit singulare, ut medicina, quod Socrati salubre sit, aut Calliæ, sed quod tali, aut talibus, (hoc enim est artificiosum, singulare autem infinitum est, & scientia comprehendi non potest.) sane nec rhetorica singulare probabile cõtemplabitur, ut quod Socrati, aut Hippiciæ, sed quod talibus, perinde ac dialectica. etenim illa syllogismum colligit non ex quibuslibet. (uidetur enim quædam etiam delirantibus,) sed illa quidem ex iis, quæ rationem desiderant, rhetorica uero ex iis, quæ in consultationem cadere solent. Est autem munus eius & de rebus eiusmodi, de quibus consultamus, & artes non habemus, & inter eiusmodi auditores, qui non per multa contueri, neque altius perspicere possint. consultamus autem de iis, quæ in utrunque modum se uidentur habere. nam de iis, quæ ne-

queunt

queunt aliter aut facta, aut futura esse, aut se habere; consultat nemo, cum ita opinatur. neque enim aliter, quàm ita, potest suadere. Licet autem syllogismo concludere, & colligere alia quidem ex iis, quæ syllogismo ante conclusa sunt, alia uero ex iis, quæ syllogismo non sunt conclusa illa quidem, uerum syllogismum desiderant, quia non sunt probabilia; necesse est autem ex his illud nos commodè assequi non posse propter longitudinem (indicator enim ponitur esse rudis) hæc uero non esse persuasibilia, quia non ex confessis, neque probabilibus sunt. Quare necesse est, & enthymema, & exemplum de iis esse, quæ euenire possunt, ita ut sepe etiam se habeant aliter; & ex paucis, & sepe numero paucioribus, quàm ex quibus primus syllogismus existit. Si quid. n. horum fuerit notum, non est opus exponere. ipse enim id adiungit auditor. exempli gratia, quòd Dorieus ludis coronariis uicerit, satis est dicere, quia uicit Olympia. coronarios autè ludos esse Olympia, adiungere nihil attinet, quia notum est omnibus.

Enthymema ex uerisimilibus, & signis constare,
& quid eorum utrumque sit.

Q VONIAM autem pauca sunt necessaria, ex quibus oratorii syllogismi existunt; pleraque enim, de quibus iudicia, & deliberationes sunt, possunt etiam aliter se habere; quæ enim agunt, de iis etiam consultant, & commentantur; quæ uero aguntur, omnia eiusmodi sunt, & nihil horum, prope dixerim, est ex necessitate; quæ uero plerumque acci-

C 2 dunt,

dunt, & eueniunt, ex eiusmodi aliis concludantur, necesse est, necessaria uero ex necessariis, quod nobis liquet ex *Analyticis*: sane dubium non est, quin ex quibus enthymemata ducuntur, alia necessaria futura sint, plurima uero plerunque ducuntur enim enthymemata ex uerisimilibus, et signis, adeo ut utrunque eorum idem esse cum horum utroque, necesse sit. Verisimile enim est, quod plerunque fit, non simpliciter tamen, ut definiunt quidam, sed quod in iis rebus, quæ aliter se habere possunt, ita se habet ad id, cui est uerisimile, ut quod est in toto ad id, quod est in parte. Signorum autem unum ita se habet, ut singulare aliquod ad uniuersale, alterum uero ut uniuersale aliquod ad particulare. horum uero quod necessarium est, tecmerium, quod non necessarium, caret nomine, quo distinguatur. Ac necessaria quidem dico, ex quibus conficitur syllogismus. itaque tecmerium signum eiusmodi est; quia cum solui nō posse, quod dictum est, arbitrantur, tum allatum esse tecmerium arbitrantur, quasi demonstratum, ac terminatum sit. tecmar enim, & terminus prisca lingua idem ualent. signorum autem unum est, ut singulare ad uniuersale, perinde ut si quis diceret, signum esse, quod sapientes iusti sint, quia Socrates sapiens fuit, & iustus. atque hoc quidem signum est. solui autem potest, quanuis quod dicitur uerum sit, quia syllogismo concludi non potest. Alterum uero, ut si quis diceret, signum esse, quod ægrotet, quia febris laborat, aut quod peperit, quia lac habet, necessarium est. atque ex signis solum tecmerium est. solum enim, si uerum sit, insolubile est. Tertium uero, ut uniuersale ad particulare se habet. ut si quis dicat,

dicat,

dicat, quòd febrì labore, signum esse, quia frequenter anhelet. solui autem & hoc potest, quanuis sit uerum. sit enim, ut & qui febrì non laborat, anhelet. Ac quid quidem uerisimile sit, & quid signum, & tecmerium, & quid inter ea inter sit, nunc quoque expositum est. dilucidius autem & de his, & propter quam causam alia syllogismo concludi nequeant, alia uero còcludantur, in *Analyticis* disputatù est.

Quæ sit materia, & forma exempli.

EXEMPLUM autem inductionem esse, & cuiusmodi in rebus inductio, diximus. est autem neque ut pars ad totum, neque ut totum ad partem, neque ut totum ad totum, sed ut pars ad partem, simile ad simile, quoties utrunq; fuerit sub eodem genere, alterum uero altero notius sit. ueluti, quòd Dionysius affectabat tyrannidem, cum postulabat custodes, quia & Pisistratus antea affectans postulauit custodes, eosque adeptus tyrannidem occupauit, & Theagenes Megaris, & alii, quoscunque sciunt, exemplum omnes fiunt Dionysii, de quo nondum sciunt, propterea ne postulet. hæc autem omnia huic uniuersali subiiciuntur: qui affectet tyrannidem custodes postulare. Ac ex quibus quidem ducantur quæ ad demonstrandum appositæ fides uidentur, expositum est.

Verisimilia, & signa duci tum ex proprijs propositionibus, tum ex locis communibus.

Enthymematum

ENTHYMEMATVM autem magna differētia est, eaq. omnes ferme maxime latet, quæ in dialectica quoque ratione syllogismorum uersatur. alia enim eorum in rhetorica, perinde atque in dialectica quoque ratione syllogismorum, existunt, alia uero in aliis artibus, & facultatibus, partim quidem extantibus, partim uero non dum compertis. quocirca latent auditores, & qui commodius illa attingunt, à se ipsis recedunt. Erit autem apertius quod dicitur, si pluribus exponetur. dico autem dialecticos, & oratorios syllogismos esse, de quibus locos dicimus; hi uero sunt, qui communiter de iustis, & naturalibus, & de ciuilibus, & de multis specie differentibus sunt, ut maioris, & minoris locus. neque enim ex hoc licebit syllogismum colligere, aut enthymema proferre de iustis potius, quam de naturalibus, aut quacunque de re. atqui hæc specie differunt. Propria uero quæ ex propositionibus existunt, quæ in unaquaque specie, genereque uersantur. ut, de naturalibus sunt propositiones, ex quibus neque enthymema, neque syllogismus est de moralibus. itemq; de his aliæ, ex quibus non erit de naturalibus. eodēq. modo hoc se habet in omnibus. Et illa quidem nullo in genere prudentem efficiunt, quia in nulla re subiecta uersantur, hæc uero quo quis in propositiones meliora selegerit, clam aliam scientiam à dialectica, & rhetorica fecerit. etenim si in principia inciderit, non amplius dialectica, & rhetorica, sed illa demum erit, cuius principia tenet. maxima uero pars enthymematum ex his formis elicitur, quæ in parte sunt, & propriæ, minor uero ex communibus. Vt ergo in *Topicis*, item hic distinguendæ sunt enthymematum formæ, lociq;

lociq; ex quibus est assumendum . dico autem formas, proprias in unoquoque genere propositiones, locos uero, &que omnium communes. Ac prius quidem de formis doceamus, uerum genera rhetoricæ primum arripiamus, ut postea quâquàm multa ipsa sint, tradiderimus, de his separatim elementa, ac propositiones arripiamus.

Proprias propositiones duci ex finibus trium generum rhetoricæ, deliberatiuo, iudiciali, demonstratiuo. & quid eorū singula sint.

CETERVM formæ rhetoricæ tres sunt, quia tot etiam sunt auditores orationum . Constat enim ex tribus oratio, ex eo, qui dicit, & re, de qua dicit, & eo, ad quem. finisq; ad hunc, auditorem inquam, refertur . Neesse est autem, ut auditor aut spectator sit, aut indicator : indicator uero aut rerum præteritarum, aut futurarum . est autem qui de rebus futuris indicat, ut concio, qui uero de præteritis, ut index, qui uero de facultate, spectator. quare ex necessitate tria sunt genera orationum rhetoricarum, deliberatiuum, iudiciale, demonstratiuum. deliberationis uero unum est adhortatio, alterum dehortatio, quia semper & qui priuatim suadent, & qui publice cum populo agunt, alterum horum efficiunt; iudicii uero unum accusatio, alterum defensio, quia horū alterū facere neesse est eos, qui controuersantur; demonstratiui uero unū laus, alterū uituperatio. At uero tempora cuiusq; horū sunt, suasori quidē futurū, quia de futuris suadet, qui aut hortatur, aut dehortatur, litiganti uero præteritum

teritum; quia de factis semper alter accusat, alter defendit; demonstratio uero præsens aptissimum est illud quidem; quoniam ex iis, quæ insunt, laudant, aut uituperant omnes, assumunt tamen sæpe etiam præterita, recordantes, & futura, augurantes. Finis autem horum unicuique diuersus est, & tribus quidem triplex. suasi uti, & inutile, quia suasi uti tanquam melius suadet, dehortator tanquam deterius dehortatur, reliqua uero ad hoc simul assumit, aut iustum, aut iniustum, aut honestum, aut turpe; litigantibus iustum, & iniustum, reliqua uero ad hæc & isti simul assumunt; laudantibus, ac uituperantibus, honestum, ac turpe, alia uero & isti ad hæc referunt. Esse autem unicuique eum, quem diximus, finem, signum est, quod ceteris de rebus aliquando non disceptabunt; ut litigator, non esse factum, aut non nocuisse; at iniuste fecisse, nunquam confitebitur; neque enim iudicio opus esset. similiter uero qui suadent, cetera sæpenumero abiiciunt, se uero inutilia suadere, aut ab utilibus detertere haudquaquam concederent. utrum autem iniustum sit, uicinos in seruitutem adducere etiam nullam iniuriam inferentes, sæpenumero non considerant. Similiter uero & qui laudant, & qui uituperant, utiles ne res, an inutiles fecerit, non attendunt, uerum in laude sæpe etiam ponunt, quod proprio neglecto commodo honesti aliquid gesserit. uelut Achillem laudant, quod Patroclo sodali opitulatus sit, cum sibi moriendum esse intelligeret, ac uiuere liceret. at eiusmodi mors illi honestior, uita uero utilis fuit. Ex his autem, quæ dicta sunt, apparet, primum de his rebus propositiones necessario esse habendas; quia tecmeria, & uerisimilia,

risimilia, & signa propositiones sunt oratoriae. nam omnino syllogismus ex propositionibus constat, enthymema uero syllogismus est, ex iis, quas diximus, propositionibus constitutus.

Præter propositiones proprias etiam communes esse tenendas.

Q VONIAM autem impossibilia gesta esse, aut gestum iri non possunt, sed possibilia, et quæ gesta non sunt, aut non erunt, ea aut gesta esse, aut gestum iri non possunt, necesse est, ut & suador, & litigator, et demonstrator propositiones habeant de possibili, & impossibili, et an factum sit, nec ne, & an erit, nec ne. Iam uero quoniam omnes & qui laudant, atque uituperant, & qui adhortantur, atque debortantur, & qui accusant, atque defendunt, non solum quæ dicta sunt, demonstrare conantur, sed etiam magnum esse, aut paruum quod bonum est, aut malum, aut honestum, aut turpe, aut iustum, aut iniustum, aut per se proferentes, aut contra inter se comparantes: sane dubium non est, quin & de magnitudine, ac paruitate, & maiori, ac minori, & in uniuersum, & de unoquoque propositiones habere oportuerit, ut quodnam maius bonum sit, aut minus, aut iniuria, aut ius. similiterq. de ceteris. Ac de iis quidem, quorum necessario sunt comparandæ propositiones, diximus. deinceps uero de unoquoque horum separatim est differendum, nempe de quibus suasio, & de quibus demonstratiuæ orationes, tertio uero loco de quibus iudicia sint.

Quinque potissimum de rebus in genere
deliberatiuo consilium agitari.

Ac primum quidem sumendum est, quibus de bonis, aut malis suafor suadeat. siquidem non de omnibus, sed de iis, quæ & fuisse, & non fuisse contingit: quæ uero ex necessitate aut sunt, aut erunt, aut esse non potest, quin sint, aut fuerint, de his suasio nulla est; neque uero de contingentibus omnibus, (sunt enim quædã bona, quæ & natura, & à fortuna sunt, ex iis, quæ contingit, ut sint, & non, de quibus non est proclive consilium) uerum de iis nimirum, de quibus est consultatio. eiusmodi uero sunt, quæ naturam habent, ut ad nos referantur, & quorum principium originis est in nobis. eatenus enim consideramus, quoad inueniamus, administrari ne à nobis possint, an non possint. Ac singula quidem diligenter enumerare, & in formas ea digerere, de quibus soliti sunt agere, itemq. quoad fieri potest, de iis ad ueritatem differere, in præsentī conari non attinet, quia rhetoricæ non est artis, sed prudentioris, & uerioris, & quia multo plura ei nunc etiam sunt tributa, quàm propria contemplatio ferat. quod enim supra etiam diximus, uerum est, rhetoricam constare tum ex Analytica scientia, tum ex politica, quæ de moribus est; similem autem esse partim dialecticæ, partim sophisticis rationibus. quòd si quis aut dialecticam, aut hanc, nō ut facultates, sed ut scientias ornare conetur, clam naturam earum euertet, dum afferendis ornamentis transibit ad scientias subiectarum quarundam rerum, non autem duntaxat rationum. Veruntamen quæcunq; prompta sunt
ad

ad explicandum, ac locum præterea meditandi scientiæ civili relinquunt, nunc etiam exponamus. Etenim ea, de quibus omnes deliberant, & de quibus suasores loquuntur, quæ maxima, ferme quinque numero sunt, hoc est de parandis pecuniis, & bello, ac pace, item de custodia regionis, & iis rebus, quæ inuehuntur, & euehuntur, legibusq. instituendis. Ergo qui de parandis pecuniis consilium daturus est, ne & iugalia ciuitatis nosse debebit, quæ, & quanta sint; ut si quod desit, adiungatur, & si quod minus sit, augeatur; item sumptus ciuitatis omnes; ut si quis sit superuacaneus, tollatur, & si quis maior, imminuatur; quia non solum iis, quæ ad sunt, addendo, locupletiores euadunt, sed etiam de sumptibus detrahendo. hæc autem non solum ex priuatorum negotiorum usu intelligere possumus, uerum eorum etiam, quæ apud alios inuenta sunt, historicum esse ad horum consiliū est necesse. De bello autem, & pace, copias nosse ciuitatis, & quantæ iam adsint, & quantæ possint adesse, & quales sint, quæ adsint, et si quæ possint accedere; itemq; bella quomodo, & quæ bellarit; neque uero suæ solum ciuitatis, sed etiam finitimorum has res nosse necesse est; aut etiam quibus cum gloriosum sit, bellum gerere; ut cum potentioribus pax habeatur, cum inferioribus bellum gerere in sua potestate positum sit; & copias, utrum similes, an dissimiles; quia fieri potest, ut ea quoque ex parte superiore, aut inferiore conditione simus. est autem necesse, earum etiam rerum causa non domestica solum bella, sed etiam aliena notare, quem euentum habuerint; quia natura comparatum est, ut similia ex similibus oriantur. Iam uero de custodia

D 2 regionis,

regionis, non ignorare, quo pacto custodiatur, sed & multitudinem nosse custodum, & formam, & loca praesidiorum. quod facere non potest, nisi qui peritus est regionis; ut & si minor custodia sit, augeatur, & si qua superuacanea, minuatur, & opportuna loca potius tueantur. Præterea uero de annona, quanta in sumptum satis sit ciuitati, & qualis sit, quæ ibi nascitur, & quæ inuehitur, & quarum rerum exportationis, & quarum importationis indigeant; ut cum his & fœdera, & pactiones fiant. duorum enim ne in offensionem incurrant ciues, providere necesse est, & qui potentiores, & qui ad hæc utiles sint. Ad incolumitatem autem cum hæc omnia perspicere posse necesse est, tum non minimum est, de legum institutione cognoscere. est enim sita ciuitatis salus in legibus. quare necessarium est, scire, quæ sint formæ rerum publicarum, & quales unicuique profint, & à quibus eueriti natura sua queant, tum reip. propriis, tum contrariis. dico autem eueriti à propriis, quia præter optimam remp. aliæ omnes & remittendo, & intendendo labefectantur. ut populi dominatus non remittendo solum imbecillior euadit, ut ad extremum ad paucorum imperium peruenturus sit, sed etiam nimium intendendo. ut etiam grypas, & simitas non solum, dum remittuntur, ad medium tendunt, sed etiam, cum nimium grypa, aut sima fiunt, ita nasum afficiunt, ut ne nares quidem esse uideantur. Proficat autem ad leges instituendas, non solum, quæ resp. utilis sit, in præteritis intueo, cognoscere, sed etiam alienas, quales quilibet conueniant, non ignorare. ex quo perspicuum est, ad legum lationem ambitus terræ ualere, quia hinc gen-
tium

tium leges consequi licet, ad ciuilia uero consilia eorum, qui res gestas scriptis prodiderunt, historias. quæ omnia politica, non rhetorica opus sunt. Ac quæ quidem tenere, qui suasurus est, debet, quæ maxima, tam multa.

Proprias propositiones in deliberando duci ex beatitudine, & partibus eius.

Ex quibus uero & de his, & de aliis adhortari, aut dehortari debet, deinde dicamus. Est autem tum priuatim singulis, tum cõmuniter omnibus propositum quiddam, in quod intuentes & persequuntur, & fugiunt, atq; hoc est, ut summatim dicam, tum beatitudo, tum partes eius. Quamobrem exempli gratia sumamus, quid sit, ut simpliciter dicam, beatitudo, & ex quibus partes eius. de hac enim, & iis, quæ ad eã referuntur, & contrariis ei & adhortationes, & dehortationes oēs existunt; quia quæ hanc pariunt, oportet agere, quæ uero euertūt, aut impediūt, aut cõtra efficiunt, non agere.

De beatitudine, & partibus eius, bonis animi, corporis, & fortunæ.

SIT ergo beatitudo bona actio cum uirtute; aut uita se ipsa contenta; aut uita cum incolumitate incundissima; aut firma possessionum, & corporum constitutio cum facultate rerum harum conseruatrice, atque effectrice; quia feruè unum horum, aut plura omnes esse beatitudinem fatentur. Si ergo beatitudo est eiusmodi, necesse est, partes eius esse nobilita-

nobilitatem, amicorum copiam, bonorum amicitiam, diuitias, liberorum probitatem, liberorum multitudinem, bonam senectutem; item corporis uirtutes, ut ualitudinem, pulchritudinem, robur, magnitudinem, certatricem facultatem; estimationem, honorem, bonam fortunam, uirtutem, aut etiam partes eius prudentiam, fortitudinem, iustitiam, temperantiam; quia ita maxime se ipso contentus erit, si ei suppetant tum quæ in ipso sunt bona, tum quæ extrinsecus: neque enim alia sunt præter hæc. in ipso uero sunt, quæ in animo sunt, & quæ in corpore; extrinsecus uero nobilitas, & amici, & pecuniæ, & honor. præterea uero conuenire arbitramur facultates, & fortunam adesse: quia hoc modo uita maxime erit incolumis. sumamus igitur eodem modo, quid horum unum quodque sit. Ac nobilitas quidem est genti, ac ciuitati, indigenas, aut antiquos esse, & primos duces illustres, & ex ipsis multos ortos in iis rebus, quas æmulamur, illustres, priuatim autem nobilitas est aut à uiris, aut à mulieribus, tum legitima ab ambobus origo, tum, ut in ciuitate, primos claros fuisse aut uirtute, aut diuitiis, aut alia rerum earum, quæ in honore sunt, tum multos ex gente illustres fuisse tum uiros, tum mulieres, tum adulescentes, tum senes. Probitas autem liberorum, & multitudo non obscura sunt. est autem rei publicæ probitas liberorum, si multa iuuentus adsit, eaque bona; bona uero ex uirtute corporis, ut magnitudine, pulchritudine, robore, certatrice facultate; animi uero, temperantia, & fortitudo uirtutes iuuenis sunt; priuatim uero liberorum probitas, & multitudo est proprios liberos multos, & tales adesse, tum feminas, tum mares. feminarum uero uirtus, corporis

poris quidem, pulchritudo, & magnitudo; animi uero temperantia, & operis studium sine illiberalitate. æque autem & priuatim, & publice, tum in uiris, tum in mulieribus, danda est opera, ut eiusmodi singula adsint; quibus enim disciplina mulierum uitiosa est, ut Lacedæmoniis, si diuidia propemodum ex parte beati non sunt. Diuitiarum uero partes sunt nummi, agri copia, locorum possessiones, itemq. suppellectilium possessiones, & pecorum, & mancipiorum multitudine, & magnitudine, & pulchritudine excellentium. Hæc autem omnia & incolumia, & liberalia, & utilia sunt. sunt autem utilia magis, quæ fructuosa; liberalia uero, quæ uoluptatis causa. Fructuosa dico, ex quibus uectigalia; uoluptuaria, ex quibus nihil præter usum exigitur, quod quidem æstimandum sit. Finis autem incolumitatis est, eo in loco, et eo modo possidere, ut in se sit usus; proprietatis uero, aut contra, quoties in se sit alienatio. dico autem alienationem, largitionem, & uenditionem. omnino autem diuitiæ in usu potius, quam in possessione consistunt. actus enim rerum eiusmodi, & usus diuitiæ sunt. Bona existimatio uero est, ab omnibus uirtute præditum iudicari, aut eiusmodi aliquid habere, quod expetant omnes, aut pleriq. aut boni aut prudentes. Honor autem beneficæ est signum existimationis. honorantur autem merito quidem, et in primis qui beneficiū dederunt, uerūtamen honoratur etiam qui potest beneficiū dare. beneficiū uero est, quod pertinet ad salutem, & ad ea, quæ causa sunt, ut simus, aut ad diuitias, aut ad aliquod aliorum bonorum, quorum non est facilis comparatio, aut omnino, aut in eo loco, aut aliquando; multi enim ex rebus etiam, quæ

parue

paruae uidentur, honorem adipiscuntur, uerum loca, & occasiones causam afferunt. Partes autem honoris sunt sacrificia, monumenta & uersibus, & sine uersibus, praemia, luci, praesensiones, sepulchra, statuae, uictus publici, barbarica, ut adorationes, & excessiones, munera apud quosque pretiosa. est enim donum largitio possessionis, & signum honoris. itaque & qui pecuniarum, & qui honoris studiosi sunt, ipsa appetunt. ambobus enim suppeditant ea, quae requirunt; est enim possessio, quam expetunt, qui pecuniarum sunt studiosi, & honorem continet, quem, qui honoris. Corporis autem uirtus, ualetudo. haec uero est ita, ut expertes morbi sint, qui corporibus utuntur. multi enim ualent, ut de Herodico fertur, quos nemo ualetudinis causa beatos fecerit, quod ab omnibus abstineant rebus humanis, aut plurimis. Pulchritudo uero in quaque aetate diuersa est. ac iuuenis quidem pulchritudo est idoneum corpus ad labores habere, tum ad cursum, tum ad uim, & iucundum esse aspectu ad uoluptatem; itaque quinquertiones pulcherrimi, quia ad uim, & ad uelocitatem simul sunt nati; uiginti autem, ad labores bellicos, iucundum autem esse uisu cum terrore; senis uero, ad labores necessarios idoneum, indolens tamen, quia nihil habeat ex iis, quibus senectus laeditur. Robur autem est facultas mouendi alterum, ut uult. necesse est autem mouere alterum aut trahendo, aut pellendo, aut tollendo, aut deprimendo, aut collidendo; quare robustus aut omnibus, aut nonnullis horum est robustus. Magnitudinis uero uirtus est, superare proceritate, & altitudine, & latitudine plerosque tanto magis, ut ne tardiores reddat motiones ob exuperationem.

exuperationem. Certatrix uero corporis uirtus constat ex magnitudine, & robore, & uelocitate. etenim uelox est robustus. qui enim potest crura proiicere quodammodo, & cito mouere, & longe, cursor est; qui uero premere, & tenere, palæstrita; qui uero icţu pellere, pugil; qui uero horum utroq; , p  cratiastes; qui uero omnibus, quinquertio. Bona senectus autem est tarditas senectutis cum indolentia. neque enim, si cito senescat, bona pr  ditus est senectute, neque si uix quidem, sed cum dolore. est autem & inter corporis uirtutes, & fortune. etenim, nisi expers morbi sit, ac robustus, non carebit malo, neque indolens, & long  uus sine fortuna constiterit. Est autem qu  dam etiam pr  ter robur, & ualitudinem alia facultas long  uitatis. multi enim sine corporis uirtutibus long  ui sunt. uerum accurata harum rerum disputatio nihil ad pr  sentia pertinet. Multorum amicitia uero, & bonorum amicitia haudquaquam obscura sunt, definito amico; nempe eiusmodi esse amicum, qui, qu   bona esse alteri arbitratur, eorum est efficiens propter illum. cui ergo eiusmodi suppetunt multi, multis est instructus amicis; cui uero etiam boni uiri, probis est instructus amicis. Bona fortuna uero est, quorum bonorum causa est fortuna, ea confici, & suppetere, aut omnia, aut plurima, aut maxima. causa autem est fortuna cum nonnullarum rerum, quarum etiam sunt artes, tum multarum arte quoque uacantium, ut quarum natura, quas tamen contra natur   etiam esse c  tingit. ualitudinis enim ars est causa, pulchritudinis uero, & magnitudinis natura. omnino uero eiusmodi bona    fortuna sunt, in quibus uersatur inuidia. est autem bonorum etiam,

E I qu  

quæ præter rationem, fortuna causâ, ut si alii fratres sint deformes, hic uero pulcher; aut si alii nō uiderunt thesaurū, hic uero inuenit; aut si uicinum attigit telum, hunc uero nequaquam; aut si non uenit, cum solus quotidie uentitaret, qui uero semel uenerunt, interierunt. hæc enim eiusmodi à bona fortuna profecta omnia existimantur. De uirtute uero, quoniam maxime proprius est, in quo de laudibus agitur, locus, tum, cum de laude uerba faciemus, erit differendum. Ac quæ quidem spectare adhortantes, tanquam futura, aut præterita, & quæ dehortantes, oportet, perspicuum est. contraria enim sunt his.

De bonis, & utilibus confectis, quæ ad beatitudinem referuntur.

SED quoniam suaseri finis propositus est utilitas; consultant autem non de fine, sed de iis, quæ referuntur ad finem; hæc autem sunt, quæ in actionibus utilia sunt; utile uero est bonum: sumēda erunt elementa de bono, utiq; simpliciter. Sit ergo bonum, quod ipsum sui causâ sit eligendum; & cuius causâ aliud eligimus; & quod expetunt omnia, aut omnia sensum habentia, aut mentem; aut si mentem adipiscerentur; & quæ mens unicuiq; dictauerit; & quæ mens, quæ in unoquoque est, unicuiq; dictauerit, illud est bonum unicuique; & quo præsentē bene afficitur, & se ipso contentū est; & quod se ipso contentum est; & quod res tales efficiendi, ac custodiendi uim habet; & quod res eiusmodi consequuntur; & quæ res contrarias prohibendi, & quæ intermendi

mendi uim habent; consequuntur autem bifariam; aut .n.
 simul, aut posterius: ut disciplinam quidem consequitur sciē-
 tia posterius, ualitudine uero uita simul. efficiendi uero uim
 habet trifaria; alia ut ualere ualitudinis, alia, ut cibaria ua-
 letudinis, alia, ut exercitatio, quia plerunq. efficit ualitudi-
 nem. His autem positis, necesse est, & adeptiones bonorum
 bonas esse, & depulsiones malorum. consequens est enim illi
 quidem non habere malum, simul, huic uero habere bonum,
 posterius. Et pro minore bono maioris adeptio, & pro ma-
 iore malo, minoris; quo enim excellit maius minore, hoc fit
 eius quidem adeptio, huius uero depulsio. Quin etiam uirtu-
 tes bonum esse, necesse est; quia ex his & bene afficiuntur,
 qui præditi sunt, & ipsæ bona efficiendi, atque agendi uim
 habent. de unaquaque uero & quæ, & qualis sit, dicendum
 est separatim. Et uoluptatem bonum esse; quia hanc omnia
 natura expetunt animantia. quare & iucunda, & hone-
 sta bona esse necesse est; illa enim uoluptatem efficiendi uim
 habent, honestorum autem alia iucunda, alia ipsa per se eli-
 genda sunt. Ut autem de singulis agam, hæc bona sint neces-
 se est, beatitudo; quia per se eligenda, & se ipsa contenta est,
 & eius causa multa eligimus. Iustitia, fortitudo, temperan-
 tia, magnanimitas, magnificentia, & alii habitus tales; quia
 uirtutes animi sunt. Et ualitudo, & pulchritudo, & quæ
 sunt eiusmodi; quia uirtutes corporis sunt, & multas res ef-
 ficiendi uim habent, ut ualitudo & uoluptatem, & uitam;
 itaque optima res uidetur esse, quia duarum rerum est caus-
 sa, quæ maximo apud uulgus in pretio sunt, uoluptatis, &
 uitæ. Diuities; quia uirtus est possessionis, & multas res effi-

ciendi uim habet. Amicus, & amicitia, quia amicus est per se eligendus, & multas res efficiendi uim habet. Honor, existimatio; quia iucunda sunt, et multas res efficiendi uim habet, atque ea plerunque consequitur, ut adsint illa, propter quæ honore afficiuntur. Facultas, dicendi, agendi; quia eiusmodi omnia uim bona efficiendi habent. Item ingenium, memoria, docilitas, solertia, omnia eiusmodi; quia facultates hæc bona efficiendi uim habent. similiter uero etiam scientiæ omnes, & artes. Et uita; quia etiam si nihil boni aliud sequeretur, res est per se eligenda. Et iustum; quia quoddam est communiter utile. Atque hæc quidem ferme bona confessa sunt.

De bonis, & utilibus controuersis.

IN controuersis autem ex his syllogismi existent. Cui contrarium est malum, & illud bonum. Et cuius contrarium inimicis prodest; ut si timidos esse maxime prodest inimicis, sine dubio fortitudo res est maxime ciuibus salutaris. Et omnino quod est contrarium ei, quod inimici uolunt, aut quo lætantur, commodum uidetur. itaque recte dictum est: Certe gaudebit Priamus. neq; uero est ita semper, sed plerunque. nihil enim prohibet, quin idem aliquando aduersariis profuit; unde dicitur, mala conciliare homines, quoties idē ambobus noceat. Et cuius non est nimium, id est bonum. quod uero maius sit, quam oportet, malum. Et cuius causa multi labores suscepti, aut sumptus facti sunt; quia speciem iam habet boni, taleq; iam ut finis existimatur, finisq. multarum rerum. finis autem bonum est. unde illa dicta sunt:

Et

Et Priamo famam. item: Turpe manere diu est: & prouer-
bium illud: In foribus hydriam. Et quod multi expetunt,
& de quo certatur, speciem habet; quia quod omnes expe-
tunt, id bonum erat, multi uero perinde, ac omnes uidentur.
Et quod est laudabile; quia nemo laudat, quod non est bo-
num. Et quod inimici, & prauī laudant; quasi enim omnes
iam confitentur, si & qui incommodum acceperunt; quia
enim perspicua res est, confitentur. Ut etiam prauī, quos
amici uituperant, & boni, quos inimici non uituperant. ita-
que se conuicio affectos sine causa suspicati Corinthiū sunt
a Simonide, cum scripsit: Corinthios non accusat illum.
Et quod prudentium aliquis, aut bonorum uirorum, aut
mulierum iudicio suo prætulit, ut Ulyssē Menērua, &
Helenam Theseus, & Alexandrum deæ, & Achillem
Homerus. Et omnino quæ sunt præeligenda. præeligunt
autem faciendæ & ea, quæ diximus; & quæ inimicis sunt
mala; & quæ amicis bona; & quæ fieri possunt; hæc uero bi-
fariam, tum quæ fiunt, tum quæ facile fiunt. (facilia uero,
quæ sine molestia, aut breui tempore; quia difficile definitur
aut molestia, aut longitudine temporis.) & si uia, ut uolunt;
uolunt autem uel nihil mali, uel minus, quàm boni; hoc autē
erit, si aut lateat pœna, aut certe sit modica. Et quæ sunt
propria, & quæ nullius, & eximia; quia honor ita suppetit
magis. Et quæ conueniunt ipsis; qualia sunt, quæ pro gene-
re, opibusq. conueniunt. Et quæ sibi putant deesse, quanuis
sint exigua; quia nihilo secius ea præeligunt faciendæ. & quæ
ad conficiendum facilia sunt, quia fieri possunt, tanquam fa-
cilia; (ad conficiendum uero facilia sunt, & quæ omnes, aut
pleriq.

pleriq. aut pares, aut inferiores recte gesserunt.) & in quibus gratificabuntur amicis, aut molestiam afferent inimicis; & quæ administranda præeligunt ii, quos admirantur; & in quibus ingeniosi sunt, ac periti; facilius enim putant, se recte gesturos; & quæ uilis nemo; quia sunt laudabilia magis; & quorum sunt appetentes; quia non solum iucundum, sed etiam melius uidetur; & in quibus præcipue singuli tales, ut uictoriæ cupidi, si uictoria aderit, honoris, si honor, pecuniarum, si pecunia, & alii eodem modo. Ac de bono quidem, & utili, ex his de promendæ fides sunt.

De maiore, ac minore bono, ac utili.

QUONIAM autem sepe numero consistentes, utrumque utile esse, de eo controuersantur, quod magis sit, deinceps de maiore bono, et magis utili differendum est. Sit ergo quod superat, tantum, & amplius, quod superatur uero id, quod inest. ac maius quidem semper, & plus præ minori; magnū uero, & paruum, & multum, & paucum præ multarum rerum magnitudine. & quod superat quidem, magnū, quod deficit uero, paruum; & multum, & paucum eodem modo. Quoniam igitur bonum dicimus, & quod ipsum sui causa, & non aliud est eligendum; & quod omnia appetunt; & quod mentem, ac prudentiam adepta eligerent; & quod efficiendi, & quod custodiendi uim habet; & quod quæ sunt eiusmodi consequuntur; id autem cuius causa, finis est; finis autem est, cuius causa cetera; huic uero bonum, quod erga ipsum hæc passum est. sane necesse est, quæ plura sunt uno, aut

aut paucioribus, adnumerato uno, aut paucioribus, maius item bonum esse; quia superat, quod autem inest, superatur. Et si maximum maximo præstet, etiam ipsa ipsis, & si omnia ipsa ipsis, etiam maximum maximo, ut si maximus uir maxima muliere maior, etiam omnino uiri mulieribus maiores, et si uiri omnino mulieribus maiores, etiam uir maximus maxima muliere maior. proportionem enim habent exuperantie generum, & rerum, quæ in eis sunt, maximarum. Et quando huic quidem illud fuerit consequens, hoc autem illi nequaquam. consequitur autem aut simul, aut deinceps, aut facultate: inest enim usus consequentis in alterius. consequitur autem simul ualetudinem uitæ, hæc uero eam nequaquam, posterius autem disciplinam scientiæ, facultate uero sacrilegium surreptio. Et quæ maius ipso superant, maiora: quia & quod maius est, superent necesse est. Et quæ maioris boni efficiendi uim habent, maiora: hoc enim erat maiora efficiendi uim habere. Et cuius efficiens maius, eodem modo, si enim salubre eligendum est magis iucundo, & maius bonum est, etiam sanitas iucunditate erit maior. Et quod magis est eligendum propter se eo, quod non propter se, ut robur salubris: illud enim non sui causa, hoc uero sui: idque erat bonum. Et si unum quidem sit finis, alterum uero non finis: hoc enim aliis causa, illud uero sui, ut exercitatio causa bonæ affectionis corporis. Et quod minus indiget altero, aut alteris: quia se ipso contentum est magis. minus uero indiget, quod paucioribus, aut facilioribus indiget. Et quoties unum quidem sine altero non sit, aut non possit fieri, alterum uero sine illo: est enim se ipso contentum magis,

magis, quod non indiget. quare maius bonum uidetur. Et si sit principium, alterum uero non principium. Et si sit causa, alterum uero non causa, propter eandem rationem; quia sine causa, aut principio non potest esse, aut fieri. Et ex duobus principiis, quod à maiori principio, maius. Et ex duabus causis, quod à maiori causa, maius. Et uicissim ex duobus principiis, quod est maioris principium, maius, & ex duabus causis, quod maioris est causa, maius. perspicuum est igitur ex iis, quæ dicta sunt utroque modo maius posse apparere. etenim si unum principium sit, alterum non principium, maius esse existimabitur. & si non principium, alterum uero principium; quia finis maior est, & non principium; ut Leodamas cum Callistratum accusaret, dixit, qui cōsiliū dedit eo, qui patrauit, magis peccasse; quia factum non fuisset, nisi cōsiliū dedisset: iterum uero cum Chabriam, eum, qui patrasset, eo, qui cōsiliū dedisset; quia huius rei causa cōsiliū dant, ut agant. Et rariora copiosis, ut aurū ferro, cum minus utile sit; quia maior est possessio, propterea quia difficilior ē. Alio uero modo copiosa raris; quia usus præstat. quod enim sæpe, præstat ei, quod raro; unde dicitur: Optima quidem aqua. Et omnino difficiliora facilioribus; quia rariora. Alio uero modo facilia difficilioribus; quia se habent ita, ut uolumus. Et cuius cōtrariū maius. Et cuius priuatio maior. Et uirtus non uirtute, & uitium nō uitio, maius; quia illa fines, hæc non fines. Et quorum opera honestiora, aut turpiora, ipsa maiora. Et quorum uitia, aut uirtutes maiores, etiam opera maiora; quoniam ut causæ, atque principia, item euenta, & ut euenta, item causæ, atque principia.

principia. Et quorum exuperantia magis eligenda, aut magis honesta; ut exquisite uidere eligendum est magis, quàm odorari; quare affectus, quàm odoratus. & sodaliū studio sum esse potius, quàm pecuniarum honestius est, quare studium etiā sodaliū, quàm studium pecuniarum. Et contra, meliorum exuperantiæ, meliores, & honestiorum, honestiores. Et quorum cupiditates honestiores, & meliores; quia maiores appetitiones maiorum rerum sunt semper. & honestiorum, aut etiā meliorum cupiditates, meliores, aut honestiores propter eandem rationem. Et quorum scientiæ honestiores, aut magis probæ, etiā res honestiores, & magis probæ; ut enim se habet scientia, item ueritas. præcipit autem unaquæque eam, quæ sui est. Et scientiæ rerum magis probarum, & honestiorum, ex proportionem propter eandem rationem. Et quod iudicarent, aut iudicarunt prudentes, aut omnes, aut uulgares, aut pleriq; aut optimi bonum, aut maius esse, id ita se habere necesse est, aut simpliciter, aut si pro prudentia indicassent. Est autem hoc commune etiā in aliis. etenim quid, & quantum, & quale perinde se habet, ac scientia, prudentiaq; præscripserit. Sed de bonis diximus. definitum est autem bonum id esse, quod prudentiam adeptæ res unaquæq; eligeret. ex quo perspicuum est, & maius id esse, quod magis prudentia dictat. Et quod melioribus inest, aut simpliciter, aut quatenus sunt meliores, ut fortitudo robore. Et quod eligeret melior, aut simpliciter, aut quatenus melior est. ut iniuriam accipere potius, quàm inferre; hoc enim iustior eligeret. Et iucundiora minus iucundis; quia iucunditatem omnia persequuntur, ipsiusq. causa

cupiunt iucunditate perfundi. his autem & bonum, & finis est definitus. iucundiora uero sunt, & quæ minus molesta, & quæ diutius sunt iucunda. Et honestiora minus honestis; honestum enim est, aut quod est iucundum, aut quod propter se eligendum. Et quorum ipsi sibi ipsis, aut amicis causæ esse cupiunt magis, hæc maiora sunt bona, quorum uero minime, maiora mala. Et diuturniora minus diuturnis. Et firmiora infirmioribus; præstat enim usus eorum quidem, tempore, horum uero uoluntate. quoties enim uelint, præsto est magis rei firmæ usus. Et ut ex coniugatis, & similibus casibus, item alia consequuntur: ut si fortiter honestius, & magis eligendum est, quam temperanter, etiam fortitudo magis eligenda, quam temperantia, & fortem esse, quam temperantem esse. Et quod omnes eligunt, eo, quod non omnes. Et quod plures, quam quod pauciores; bonum enim erat, quod omnes expetunt. quare etiam maius, quod magis. Et quod controuersantes, aut inimici, aut iudicantes, aut quos hi iudicant; illud enim perinde est, ac si omnes assererent, hoc uero, ac si potentes, atque scientes. Et aliquando quidem, quod omnes participant, maius est; quia dedecus est, non participare: aliquando uero, quod nemo, aut quod pauci; quia rarior res est. Et laudabiliora; quia sunt honestiora. Et quorum honores maiores, eodem modo; honor enim ut pretium quoddam est. Et quorum mulctæ maiores. Et quæ confessis, aut uis, quæ magna uideantur, maiora. Et eadem in partes diuisa, maiora uidentur. plurium enim exuperantia uidetur. unde etiam poeta inquit, illam Meleagro, ut exurgeret, persuasisse exponentem: Quot mala mortales

mortales subeant, quorum oppida capta, Et populum ster-
nunt, testisque incendia miscent, Abripiunt alij natos.

*Et componere, & coedificare, more Epicharmi, cum prop-
ter eandem causam, ac diuisio, quia compositio exuperan-
tiam multam ostedit: tum quia principium rerum magna-
rum, & causa uidetur. Quoniam autem difficiliora, & ra-
riora maiora, etiam occasiones, & ætates, & loca, & tem-
pora, & facultates magnitudinem asserunt: si enim supra
opes, & supra ætatem, & supra pares, & si ita, aut ibi, aut
tunc, magnitudinem habebit, & rerum honestarum, & bo-
narum, & iustarum, & contrariarum. unde & epigramma
in Olympionicem: Duram humeris corbem gestans paulo
ante ferebam Ex Argo pisces sedulus ad Tegeam. & Iphi-
crates se ipsum laudauit, inquiens: Ex quibus hæc assuerunt.
Et natiua ascitis: quia difficiliora. unde etiam poeta inquit:
Ipse à me edoctus sum: Et rei magnæ maxima pars, ut Pe-
ricles cum funebrem orationem haberet, iuuentutem ex ci-
uitate sublatam esse, perinde ac si uer ex anno exemplum
fuiisset. Et quæ in maiore necessitate utilia, qualia quæ in se-
nectute, & morbis. Et ex duobus quod est propinquius fi-
ni. Et quod huic, quàm simpliciter. Et possibile impossibili:
quia illud sibi, hoc uero non item. Et quæ in fine uitæ: quia
quæ ad finem fines sunt magis. Et quæ ad ueritatem perti-
nent iis, quæ ad opinionem. eius uero quod ad opinionem, ter-
minus est, quod, si latiturus esset, non eligeret. itaque benefi-
cium accipere, quàm dare, magis eligendum uidetur: quia il-
lud, etiam si lateat, eliget: beneficium autem dare, si lateat,
electurus non uidetur. Et quæcunque esse magis, quàm exi-*

stimari nolunt; quia ad ueritatem pertinent magis. itaque iustitiam etiam rem paruum inquit esse, quia existimari, quam esse, eligendum est magis; ualitudinem autem nequaquam. Et quod ad multas res utilius est, ut ad uiuendum, et bene uiuendum, et uoluptatem, & res honestas administrandas. itaque & ualetudo, & diuitie maxima esse existimantur, quia hæc continent omnia. Et quæ minus molesta, & quæ cum uoluptate sunt; quia plura uno sunt. quò fit, ut & uoluptas bonum sit, & indolentia. Et ex duobus, quod eidem adiunctum est, maius totum reddit. Et quæ non latent, cum adsunt, quam quæ latent. hæc enim ad ueritatem pertinent. itaque diuitem esse maius bonum uidebitur, quam existimari. Et quod carum est, & aliis quidem solum, aliis uero cum aliis. quò fit, ut non æque plectatur, si quis altero præditum oculo excæcauerit, ac si duobus; quia rem carum eripuit. Atq; ex quibus quidem fides ducere adhortando, ac dehortando conueniat, ferme expositum est.

Respublicas cognoscendas esse suadenti.

MAXIMUM autem, ac potentissimum omnium est, ut persuadere, & egregie consilium dare possimus, respublicas omnes assumere, & instituta cuiusque, ac leges, utilitatesque distinguere. persuadentur enim omnes utilitate. utile autem est id, quod remp. conseruat. principatus autem est ipsum principis edictum. principatus uero pro rebus publicis sunt distincti. quot enim respublicæ, tot & principatus. sunt autem respublicæ quattuor, populi dominatus, paucorum, optimatum, unius. quare quod principatum obtinet, & iudicium,

cium, harum sane pars, aut totum existeret. Est autem popularis status respublica, in qua sorte mandant magistratus. paucorum uero, in qua qui censu; optimatum autem, in qua qui disciplina, (disciplinam uero uoco, quæ lege cõstituta est; nam qui legibus steterunt, in optimatum rep. præ sunt. hos autem optimos uideri necesse est, unde hoc quoque nomen assumpsit.) unius uero secundum nomen est, in qua unus rerum omnium princeps est. harum autem quæ descriptionem aliquam habet, regnum, indefinita uero tyrannis. Ac sane cuiusque reip. finem nõ ignotum esse oportet, quia eligunt quæ ad finem. est autem populi quidem finis libertas, paucorum uero diuitiæ, optimatum autem disciplina, & leges, tyrannidis autem custodia. ex quo perspicuum est, quæ ad finem cuiusque pertinet, instituta, leges, utilitatesq. distinguendas esse. siquidem eligunt ad hunc referentes. Quoniam autem fides non solum demonstratiua, sed etiam morata oratione fiunt, (quia enim cuiusdammodi uidetur orator, fidem habemus, idest si bonus uideatur, aut beneuolus, aut uterque,) sane reip. cuiusque instituta tenere debemus. mores enim cuiusque aptissimos esse ad persuadendum apud unamquamque necesse est. hi uero ex iisdem comparabuntur. mores enim ex præelectione elucent, præelectio uero refertur ad finem. Ac quæ quidem affectanda sint eis, qui adhortantur, tanquam futura, aut præsentia, & ex quibus fides de utili sint sumendæ, itemq. de rerump. moribus, ac legibus, & ex quibus, & quomodo abundabimus, quatenus præsentia aptum est tempori, dictum est. nam in Politicis hæc tractata sunt diligentius.

hæc

Proprias propositiones in laudando, & vituperando duci ab honesto, ac turpi, & virtute, ac vitio, & quæ ipsa sint.

POST hæc autem dicamus de uirtute, ac vitio, & honesto, ac turpi, hæc enim proposita sunt laudatori, ac vituperatori. fiet enim ut de his disputantes simul & illa aperiamus, ex quibus cuiusdammodi secundum mores iudicabimur. quæ secunda fides erat. ex iisdem enim & nos, & alium fide dignum reddere poterimus ad uirtutem. Quoniam autem accidit, ut ioco, et serio laudemus sæpe numero non solum hominem, aut deum, sed res etiam inanimatas, & reliquorum animantium quodlibet, eodem modo & de his propositiones erunt parandæ. quare quodammodo exempli gratia de his etiam disseramus. Honestum igitur est, quod per se eligendum cum sit, laudabile sit; aut bonum cum sit, iucundum sit, quia bonum. Si autem hoc est honestum, uirtutem honestam esse necesse est; quia cum bona sit, laudabilis est. uirtus autem, ut uidetur, facultas est paratrix, conseruatricq. bonorum; & facultas benefica multarum rerum, & magnarum, & omnium in omnibus. Partes autem uirtutis sunt iustitia, fortitudo, temperantia, magnificentia, magnanimitas, liberalitas, mansuetudo, prudentia, sapientia. Necesse est autem maximas esse uirtutes, quæ sint utilissimæ aliis; si quidem uirtus facultas est benefica. propterea enim iustos, et fortes summis honoribus afficiunt, quia illa in bello, hæc uero etiam in pace ipsis est salutaris; deinde liberalitas; quia effundunt, & de pecuniis non contendunt, quas magno pere
alii

alii expetunt. Est autem iustitia uirtus, per quam suum quisque retinet, & ut lex, iniustitia uero, per quam aliena, non ut lex. Fortitudo autem, per quam honestas in periculis obeunt actiones, & ut præcipit lex, et legi obtemperant, timiditas uero contra. Temperantia uero uirtus, per quam aduersus uoluptates corporis ita afficiuntur, ut præcipit lex. intemperantia uero cōtra. Liberalitas autem quæ benigne facit in pecunias, illiberalitas uero contra. Magnanimitas uirtus magna conferens beneficia. Magnificētia uirtus, quæ magnitudinem in sumptibus adhibet; pusillanimitas, et paruificētia contra. Prudentia uirtus est rationis, per quā bene consultare possunt de bonis, & malis, quæ ad beatitudinem dicta sunt. Ac de uirtute quidem, & uitio in uniuersum, et de partibus dictum est in presenti tempore satis. de reliquis autem non est difficile uidere. Perspicuum est enim, necesse esse & efficientia uirtutis esse honesta, quia ad uirtutem. Et quæ à uirtute efficiuntur, cuiusmodi sunt & signa uirtutis, & opera. Quoniam autem signa, & eiusmodi res, quæ sunt boni uiri opera, aut perpeſsiones, honesta sunt, necesse est, quæcunque fortitudinis opera, aut signa fortitudinis, aut fortiter gesta sunt, esse honesta. Et iusta, et quæ iuste susceptæ actiones sunt, perpeſsiones uero nequaquam. in hac enim uirtute sola non semper est honestum, quod iuste; sed damnari turpius est iuste, quam iniuste. atq; in aliis uirtutibus eodem modo. Et quorum præmia honor, honesta. Et quorum honor potius, quàm pecuniæ. Et quæ haultquaquam sui gratia agit aliquis ex rebus eligendis. Et quæ simpliciter bona, ut quæ pro patria gessit aliquis ratio-

ne sui posthabita . Et quæ natura bona . Et quæ haudquaquam sibi bona; quia sui gratia sunt talia . Et quæ accidit, ut mortuo adsint potius, quàm uiuenti; quia quæ uiuenti, continent magis quod sui gratia . Et quæ opera aliorum sunt gratia; minus enim sui . Et quæ bene gesta sunt in alios, non autem in se . Et in eos, qui beneficium dederunt; quia iustum . Et beneficia collata; quia non in se . Et contraria iis, quorum pudore afficiuntur; turpium enim pudet et loquentes, & facientes, & loquuturos, & facturos, quemadmodum Sapho respondit, cum diceret Alcæus: Volo quid dicere, at me impedit pudor: Si venisses in bonarum rerum desiderium, aut honestarum, nec malum dicere lingua moliretur, haudquaquam pudor occuparet oculos tuos, sed de rebus iustis loquereris . Et quibus anguntur nullo timore perculsi; quia in bonis, quæ ad opinionem pertinent, hunc in modum afficiuntur . Et eorum, qui natura meliores sunt, uirtutes honestiores, itemque opera, ut uiri, quàm mulieris . Et fructuosa aliis potius, quàm sibi; quo fit, ut & iustum, & iustitia sit honesta . Et inimicos ulcisci potius, quàm reconciliari; quia retribuere iustum est, iustum autem honestum, fortisque hominis est, non cedere . Et uictoria, & honor ex honestis; quia eligenda, quanuis frugifera non sint, & uirtutis excellentiam arguunt . Et quæ magis, magis . Et quæ non uiuentem sequuntur . Et quæ consequitur honor . Et quæ excellunt . Et quæ soli adsunt, honestiora; quia ad memoriam illustriora . Et prædia infrugifera; quia liberaliora . Et quæ apud singulos propria, honesta . Et quæ signa sunt earum rerum, quæ apud quosque laudantur . ut Lacedæmone comæ alcre,

alere, honestum; quia libertatis est signum; qui nanq. gerit co-
mam opus aliquod seruire haud sane facile efficit. Et nullā
operosam artem exercere; quia liberi hominis est haudqua-
quam alteri uiuere. Assumenda uero sunt etiam quæ uici-
na sunt iis, quæ ad sunt, tanquam idem ualentia tum ad lau-
dem, tum ad uituperationem; ut cautum, ac animosum timi-
dum, ac insidiosum; & stolidum, frugi; & indolentem, mi-
tem, atque unumquodq. ex consequentibus semper iuxta id,
quod est optimum; ut iracundum, ac furiosum, simplicem;
& contumacem, magnificum, ac grandem; & qui sunt in
exuperationibus æque ac si sint in uirtutibus, ut audacem,
fortem; & asotum, liberalem; quia cum probabitur multi-
dini, tum simul uim habebit paralogismi ex causā. si enim
ubi non est necesse, promptus est ad excipienda pericula,
multo magis existimabitur, ubi honestum; et si promptus est
ad largiendum quibuslibet, etiam amicis; quia excellentia
uirtutis est, bene de omnibus promereri.

Laudatorem in eos, apud quos laudet, & quos
laudet, intueri debere.

CONSIDERANDUM porro etiam est, apud quos lau-
des; quia, ut Socrates dicebat, Athenienses inter Athenien-
ses laudare, nihil negotii est. oportet autē quod apud quosq.
in honore est, dicere, quasi suppetat, ut inter Scythas, aut
Laconas, aut philosophos. Et omnino quod honoratū est,
redigere ad honestum; quia uicinum existimatur. Et quæcū-
que prout conueniebat, ut, si res dignas maioribus, et iis, quas

ante administravit, quia pertinet ad beatitudinē, & honestum est adaugere honorem; aut si contra, quā conueniebat, ad id, quod melius, atq. honestius; ut si in secunda quidem fortuna moderatus, in aduersa uero magnanimus; aut opibus auctus, melior, ac placabilior fuit. tale autem est illud Iphicratis: Ex quibus in quæ. & Olympionicæ: Duram humeris corbem gerens paulo ante. atque illud Simonidis: Quæ genitorem habuit regem, fratresque, virumque. Quoniam autem ex actionibus laus existit, propriumque boni uiri est, ex præelectione, danda est opera, ut ostendamus, egisse ex præelectione. proficit autem, si sæpius uideatur egisse. quare quæ casu, & quæ fortuna, æque, ac si ex præelectione, sumenda. si enim multa, & similia proferantur, signum uirtutis esse, & præelectionis existimabitur. Est autem laus oratio, quæ uirtutis magnitudinem indicat. quare actiones demonstrandum est tales esse. encomium uero operum est. quæ uero circum sunt, ad fidem, ut nobilitas, & disciplina; quia uerisimile est, ex bonis bonos, atque ita educatū talem esse. itaque encomio ornamus eos quoque, qui egerunt. opera uero signa sunt habitus; quia laudaremus etiam, qui non egisset, si talem esse crederemus. Felicitatio uero, & beatio inter se sunt eadem, at cum his non eadem. uerum ut beatitudo uirtutem, sic beatio continet hæc.

Laudem, & consilium esse affinia.

HABENT autem communem formam laus, & consiliis: quia quæ in consilio dando præciperes, ea si dicendo traiciuntur.

tur, encomia fiunt. quoniam igitur tenemus, quæ agere, & qualem esse oportet, hæc tanquam præcepta edentes dicendo traicere, atq; conuertere debemus. exempli gratia, quod non conuenit fortunæ bonis efferri, sed suis, ita quidem dictum præcepti uim obtinet, at uero ita, laudis: efferrens se se non fortunæ bonis, sed suis. Quare cum laudare uolueris, uide, quid præciperes, & cum præcipere, uide, quid laudares. dictio uero necessario opponetur, quoties illud prohibens, hoc non prohibens traicietur.

Amplificationem adhibendam esse ad laudem.

ADHIBENDA porro multa etiam sunt eorum, quæ uim habent amplificandi, ut si solus, aut primus, aut cum paucis, aut ille præcipue fecit. sunt enim hæc omnia honesta. & quod tempore, & occasione, ea uero contra, quam conueniebat. Et si sæpius idem recte administrauit; quia magnitudinem habet, & non à fortuna, sed ab ipso existimabitur. Et si quæ adhortantur, & honestant, propter hunc inuenta sunt, & comparata. Et in quem primum encomium factum est, ut in Hippolochum. & Harmodium, ac Aristogitonem in foro statuam consequutos. similiterq. etiam in contrariis. Quod si ex ipso copia dicendi tibi non suppetet, cum aliis compara, quemadmodum Isocrates ex iudicialis dictionis consuetudine faciebat, oportet autem cum illustribus cõferre; quia ad amplificandū idoneum, honestumq. est, si bonis melior sit. Cadit autem egregie amplificatio in laudes, quia uersatur in excellentia, quæ ex honestis rebus est.

itaque si non cum illustribus, at cum aliis comparare oportet; quia excellentia existimatur indicare uirtutem. Ommino autem formarum omnibus orationibus communium amplificatio demonstratiuis aptissima est; quia confessas actiones accipiunt, ita ut reliquum sit, magnitudine, atque ornamentum adiungere; exempla uero deliberatiuis, quia ex præteritis futura augurantes iudicium facimus; enthymemata uero iudicialibus; quia causam, & demonstrationem recipit potissimum factum propter obscuritatem. Ac ex quibus quidem laudes, & uituperationes ferme omnes ducantur, & in quæ intuendo laudare, ac uituperare conueniat, & ex quibus encomia constituentur, & probra, hæc sunt. si enim hæc tenentur, quæ sunt his contraria, liquent. si quidem uituperatio est ex contrariis.

Proprias propositiones in accusando, ac defendendo esse, nosse, quarum rerum causa fiat iniuria, & a quo, & cui.

DE accusatione aut, ac defensione, ex quot, ac cuiusmodi cōficere syllogismos oporteat, deinceps sequitur, ut dicamus. Tria ergo nobis assumenda sunt: unū, quarū, & quot rerum causa homines iniuriam faciant, alterum, quomodo ipsi affecti, tertium, quibus, & quemadmodum se habentibus. Ergo, definitis, quid sit iniuriam facere, deinceps exponamus. Sit igitur iniuriam facere, nocere sua sponte contra legem. Lex autem una est priuata, altera communis. dico autem priuatam, secundum quam scriptam in ciuitate uiuunt;

commu-

communem uero, quæcunque non scripta inter omnes homines constare existimantur. sponte uero sua faciunt, quæcunque scientes, et non coacti. Ac quæcunque quidem sua sponte, non omnia præelicientes; quæ uero præelicientes, scientes omnia. nemo enim quod præeligit, ignorat. ob quæ uero præeligunt nocere, & flagitium committere contra legem, uitium atque incontinentia est. si enim quidam nequitia præditi sint aut una, aut pluribus; in eo, in quo sunt nequam, etiam iniuriose se gerunt, ut illiberalis in pecuniis, intemperans in corporis uoluptatibus, mollis in desidia, fortis in periculis, quia periculi socios deserunt propter timorem, ambitiosus propter honorem, iracundus propter iram, pugna propter uictoriam, amarus propter ultionem, imprudens, quia in iusto, atque iniusto decipitur, impudens, quia existimationem parui facit. Similiter uero & aliorum singuli in singulis rebus subiectis. Atque hæc quidem perspicua sunt partim ex iis, quæ de uirtutibus exposuimus, partim ex iis, quæ de affectibus exponemus.

Quarum rerum causa fiant omnia, & maxime de iucundis, propter quæ fit iniuria.

RELIVVM est autem, ut dicamus, cuius rei gratia, & quonam modo se habentes iniuriam faciant, et quibus. Ac primum quidem explicemus, quibus rebus appetendis, quibusque fugiendis laceßant iniuria. perspicuum est enim, accusatori uidendum esse, quot, & quenam eorum in aduersario insint, quibus appetendis omnes alteris iniuriam faciant,

ciant, defensori uero quæ, & quotnam eorum non insint. Omnes igitur agunt omnia partim non per se ipsos, partim per se ipsos. ac quæ quidem nō per se ipsos, alia propter fortunam agunt, alia ex necessitate, quæ uero ex necessitate alia ui, alia natura. quare omnia, quæ non per se ipsos agūt, alia fortuna, alia natura, alia ui. Quæ uero per se ipsos, & quorum ipsi causæ sunt, alia propter consuetudinem, alia propter appetitionem; itemq. alia propter appetitionem ratiocinationis participem, alia propter ratiocinationis expertem. Est autem uoluntas boni appetitio cum ratione. nemo enim uult, nisi quod bonum esse putauerit. ira uero, & cupiditas appetitiones sunt ratiocinationis expertes. quare quæcunque agunt, omnia propter septem causas agant, necesse est, fortunam, uim, naturam, consuetudinem, ratiocinationem, iram, cupiditatem. Ceterum quæ aguntur, pro ætatibus, aut habitibus, aut aliis quibuscunque diuidere, superuacaneum est. etenim si iuuenibus accidit, ut iracundi, aut cupidi sint, non propter iuuentutem eiusmodi res administrant, sed propter iram, & cupiditatem; neque propter diuitias, & paupertatem, sed accidit pauperibus, ut propter indigentiam pecunias cupiant, diuitibus autem, ut propter licentiam uoluptates non necessarias concupiscant. uerum agent & hi non propter diuitias, & paupertatem, sed propter cupiditatem. Similiter uero etiam iusti, & iniusti, & ceteri, qui pro habitibus agere dicuntur, propter hæc omnia agent, nimirum aut propter ratiocinationem, aut propter affectum. uerum alii quidem propter mores, & affectus bonos, alii uero propter contrarios, accidit tamen, ut talibus habitibus

habitus talia consequentia sint, talibus uero talia. nam, ne longe abeamus, temperantem fortasse propter temperantiâ opinionones, & cupiditates bonæ de uoluptatibus consequuntur, intemperantem uero contrariæ de iis eisdem. quâmobrem eiusmodi mittendæ diuisiones sunt. uerum uidendum est, quæ res quas consequi soleant. nam albus ne, an ater, aut magnus ne, an paruus sit, nihil rerum eiusmodi consequi cōstitutum est, at uero iuuenis ne, an senex, aut iustus ne, an iniustus sit, iam differt: & omnino omnia, quæ cum eueniūt, hominum mores differētes reddunt, ut diues ne esse, an pauper, & secunda ne fortuna, an aduersa uti existimetur, nō nihil intererit. Atque hæc quidem posterius tractabimus. nunc uero primum de reliquis differamus. Fortuna igitur ea fieri dicuntur, quorum caussa est indefinita, neque alicuius rei gratia fiunt, nec semper, nec plerunque, nec ordinate. hæc autem ex fortunæ definitione perspicua sunt. Natura uero, ea, quorum caussa & in ipsis est, & ordinata: quia aut semper, aut plerunq. eodem modo eueniunt. nam de iis, quæ contra naturam fiunt, non est subtiliter differendum, utrum secundum naturam, an propter aliam causam fiant. uerum & fortuna eiusmodi rerum caussa esse existimari possit. Vi autem, quæcunq. contra cupiditatem, aut ratiocinationem per ipsos agentes fiunt. Consuetudine uero, quæcunq. faciūt ex eo, quia sæpe fecerunt. Propter ratiocinationem autem, quæ ex commemoratis bonis prodesse existimantur, aut tanquàm finis, aut tanquàm ad finem, quoties propter utilitatem agantur. siquidem & intemperantes nonnulli utilia faciunt, uerum non propter utilitatem, sed propter uoluptatem.

tem. Propter excandescentiam autem, & iram, ea, quæ referuntur ad ultionem, differt autem ultio à castigatione. siquidem castigatio est illius gratia, qui patitur, ultio uero illius, qui facit; ut exsaturetur. uerum quid ira sit, in iis, quæ de affectibus dicemus, aperiemus. Propter cupiditatem autem aguntur, quæcunq. iucunda uidentur. quæ uero consueuimus, & quibus assuefacti sumus, inter iucunda sunt; quia multa eorum etiam, quæ natura haudquaquã iucunda sunt; ubi sunt assuefacti, iucunde faciunt. Quare, ut summatim dicam, quæ per se ipsos agunt, omnia aut bona, aut iucunda sunt, aut iucundorum speciem præferunt. Quoniam autem quæ per se ipsos, ea sua sponte agunt, non sua sponte uero, quæ nõ per se ipsos, sane omnia, quæ sua sponte agunt, aut bona esse, aut speciem bonorum præferre, aut iucunda esse, aut speciem iucundorum præferre, necesse est. Etenim & malorum, aut speciem malorum habentium, aut liberationem, aut pro maiore minoris adeptionem in bonis repono, quia sunt eligenda quodammodo; & rerum molestarum aut speciem habentium, aut liberationem, aut minorum pro maioribus adeptionem in iucundis eodem modo. Ergo utilia & iucunda quot, & qualia sint, arripienda sunt. Ac de utilibus quidem supra in deliberatiuis est disputatum.

Nunc autem de iucundis loquamur. Existimare autem oportet, definitiones tum deum idoneas esse, cum de singulis rebus neque obscuræ sint, neque exquisitæ. Positum ergo sit nobis, uoluptatem motum esse animi quendam, ac momentaneam constitutionem, eamq. sensibilem in naturam instam.

tam molestiam autem, contra. Si ergo uoluptas est aliquid eiusmodi, non est dubium, quin iucundum sit etiam, quod commemoratae affectionis pariendae uim habet, molestum autem, quod corrumpendae, aut contrariae pariendae. Necesse est igitur, iucundum esse tum ad id, quod est secundum naturam, plerumque ire, tum maxime, quoties suam ipsorum naturam adepta sint, quae secundum ipsam fiunt. Et consuetudines; quia consuetum iam quasi natura insitum est, etenim consuetudo simile aliquid est naturae; quia quod saepe fit, prope accedit ad id, quod semper. natura uero earum rerum est, quae semper, consuetudo uero earum, quae saepe. Et non uiolenta; quia uis est contra naturam. itaque necessitates molestae sunt. & recte dictum est: Molestum enim est, quod agi necesse est. Et curationes, & studia, & contentiones molestas, esse haec enim necessaria, ac uiolenta sunt, nisi assuesacti sint, atque ita consuetudo iucundum efficit. Contraria uero iucunda; itaque ocationes, & a labore cessationes, & non curantiae, & lusus, & requietes, et somni rerum sunt iucundarum; quia nihil eorum est ex necessitate. Et quorum cupiditas extiterit, iucunda sunt omnia; quia cupiditas iucundi appetitio est. cupiditatum autem aliae carent ratione, aliae sunt cum ratione coniunctae. uoco autem ratione carentes, quibus non ex eo, quia opinentur aliquid, ducuntur sunt autem eiusmodi, quaecumque dicuntur esse natura, quales quae propter corpus insitae sunt, ut alimenti, sitis, & fames, & in unoquoque genere alimenti, cupiditas; & quae in rebus gustabilibus, & in uenereis, & omnino in tractabilibus, & in odoratu suauitatis, & auditu, & aspectu; cum ra-

uniquon
H I tione

tione uero coniunctas, quibuscunq. ex eo quia sunt persua-
 si, alliciuntur. etenim multa & spectare, & adipisci cupi-
 unt, quod audiuerint, ac persuasi sint. Quoniam autem in-
 cunditas in aliquo affectu sentiendo uersatur, phantasia ue-
 ro sensus est quidam imbecillus; & recordatem, & sperantem
 phantasia quædam sequitur eius rei, quam recordatur, aut
 sperat. quod si ita est, non est dubium, quin etiam uolupta-
 tes uehementes sint in iis, qui recordantur, & sperant; siqui-
 dem & sensus. quare necesse est, iucunda omnia aut in senti-
 endis rebus presentibus, aut in recordandis præteritis, aut
 in sperandis futuris uersari; quia sentiunt præsentia, recor-
 dantur præterita, sperant futura. Ac quæ quidem memo-
 ria retinentur, iucunda sunt, non ea solum, quæ tunc cum
 aderant, erant iucunda, sed nonnulla etiam iniucunda, se-
 quod post id est, bonum, honestumq. sequatur. unde & illud
 dictum est: Delectat fedem saluum meminisse laboris.
 Et illud: Post mala lætatur memor est quicumq. pericli.
 huius autem rei causa est, quia iucundum est etiam uacare
 malo. Ex iis autem, quæ in spe sunt, quæcunq. cum ad sunt,
 aut exhilarare, aut prodesse ualde, aut sine molestia prodes-
 se uidentur, atque omnino, quæcunq. cum ad sunt, exhila-
 rant, ea plerunq. & sperantes etiam, & recordantes. quo-
 fit, ut irasci iucundum sit, quia nemo irascitur ei, qui uindi-
 cari non posse uideatur. quin etiam iis, qui se multum supe-
 rant uiribus, aut non irascuntur, aut imbecillius. quemad-
 modum cecinit Homerus de excandescencia: Quæ melle li-
 quente magis dulcis. Et in plurimis cupiditatibus uolup-
 tas quædam sequitur; quia aut recordantes se consequutos,
 uoluptate

uoluptate quadam afficiuntur; ut qui in febribus siti uexantur, & recordantes, se bibisse, & sperantes, fore, ut bibant, gaudent. Et qui amant, tum colloquentes, tum scribentes, tum pangentes aliquid de amoribus, delectantur. in his enim omnibus eiusmodi recordantes quodammodo se sentire arbitrantur amores. & hoc uero amoris initium omnibus est, quando non solum presenti gaudeant, sed etiam absentem recordantes ament. quocirca & cum molestiam attulerit, ex eo, quia non adsit. Et in luctibus, ac lamentationibus uoluptas quedam inheret, molestia enim est in eo, quia non suppetit, uoluptas autem in recordando, & eo quodammodo aspiciendo, & quæ egit, & cuiusmodi fuit. unde & illud dictum est: Sic ait, & cunctos lacrymarum accendit amore. Et ulcisci iucundum est; quod enim nisi consequaris, molestum est, id si consequaris, iucundum. qui uero irascuntur, moleste ferunt præter modum, nisi ulciscantur, dum sperant autem, gaudio afficiuntur. Et uincere iucundum est non solum uictoriæ studiosis, sed etiam omnibus; quia oritur excellentiæ phantasia. cuius rei cupiditate omnes ducuntur, aut remissius, aut uehementius. Quoniam autem uictoria iucunda est, & ludi iucundi sint necesse est, & pugnarum, & tiliarum, & contentionum; quia in iis sæpe uictoria paritur. & ludus talorum, & pileæ, & tesserarum, & calculorum. & de seriis etiam ludis eodem modo. sunt enim continuo iucundi, si quis assueuerit, ut uenatio, & uniuersa ferarum insectatio; quia ubi certamen, ibi & uictoria sita est. Quocirca iudiciorum, contentionumque tractatio iucundæ sunt iis, qui assueuerunt, & iis, qui in iis ualēt.

Et honor, & bona existimatio rerum sunt iucundissimaria; quia phantasia cuiq. excitatur, se tale, ac uirtute præditum esse, idq. et magis, cū ii asserunt, quos uera dicere existimant, eiusmodi uero sunt uicini potius, quàm longinqui, et familiaria, et noti, et ciues, quàm externi, & qui sunt, quàm futuri, et prudentes imprudentibus, & multi paucis; quia hīs uera dicere, uerisimilius est, quàm contrarios; quia quos aliquis ualde cōtemnit, ut pueros, aut belluas, eorum honorem, aut existimationem non curat, ipsius saltē existimationis gratia. sin autem; propter aliud quippiam. Et amicus est ex rebus iucundis. etenim tum amare iucundum est, quia nemo est amans uini, qui non gaudeat uino; tum amari iucundum est, quia phantasia & in eo excitatur, sibi adesse bonum, quod uniuerſi expetunt, qui sensu præditi sunt. amari autē est, ipsum propter se carum esse. Et admirationi esse, iucundum, propter honorem, quo afficitur. Et adulari, et adulator, iucunda; quia adulator fictus est admirator, & fictus amicus. Et eadem agere sepe, iucundum; quia consuetum erat iucundum. Et permutatio iucunda; quia permutatio fit in naturam. quod enim semper est idem, constituti habitus exuperantiam affert. unde dictum est: Permutatio rerum omnium dulcis. hac enim de causa ea quoque, quæ per interuallum temporis, iucunda sunt, tum homines, tum res; quia mutatio est ex præſenti. simul uero & rarum est, quod temporis interuallo. Et discere, & admirari plerumque iucundum; quia in admirando cupiditas est sua discendi; quare quod admirabile, concupisibile. in discendo uero redactio ad id, quod est secundum naturam. Et beneficii dare,

dare, atque accipere rerum sunt iucundarum; quia beneficium accipere est ea consequi, quæ concupiscunt; beneficium uero dare est habere, & excellere; quorum utrumque expetunt. Quoniam autem beneficium dare iucundum est, etiam proximos corrigere, hominibus est iucundum, atque inchoata perficere. Itemque quoniam iucundum est & discere, & admirari, & quæ sunt eiusmodi, etiam quod imitando expressum est, ut pictura, ut statuaria, ut poetica, omniaque quæ probe imitando expressa sunt, iucunda sint, necesse est, etiam si parum iucunda res illa sit, cuius fuerint imitatio. neque enim ea delectatur, sed ratiocinatur, hanc illam esse; ex quo efficitur, ut aliquid discat. Et rerum inclinationes, & ægre seruari, è periculis; quia hæc omnia admirationem afferunt. Et quoniam quod est secundum naturam, iucundum est, quæ uero inter se cognata sunt, secundum naturam sunt omnia cognata, & similia plerunque iucunda, ut homo homini, & equus equo, & iuuenis iuueni. unde etiam proverbia increbuerunt: Aequalis æqualem delectat, et semper similem item; Cognouit fera feram. item: Semper graculus cum graculo. & quæcunque alia eiusmodi. Quoniam autem similia, & cognata sibi ipsis iucunda sunt omnia, præcipue autem ipse erga se quisque hoc modo affectus est, omnes sui studiosi sint, necesse est, aut magis, aut minus; quia omnia eiusmodi erga se sunt maxime. Et quoniam sui studiosi sunt omnes, etiam res suas cuique esse iucundas necesse est, ut opera, orationes. quo fit, ut plerunque assentatores ament, & amatores, & honores, & liberos; quia ipsorum opera liberi sunt. Et inchoata perficere, iucundum;

quia

quia ipsorum iam opus euadit. Et quoniam principem esse iucundum est, etiam sapientem existimari, iucundum est; quia sapere principatus uim obtinet. est autem sapientia multarum, admirabiliumq. rerum scientia. Præterea quoniam plerunque honores adamant, etiam proximos increpare, iucundū esse, necesse est; & in quo ipse sibi præstare opinatur, in eo assidue uersari. quæadmodū Euripides inquit: Inq. eo est frequens, partem diei impartiens plurimam, in quo ipse se præstantior, ac melior est. Pari uero etiā ratione quoniam ludus, omnisq. remissio, aut risus rerum est iucundarum, etiam ridicula iucunda sint, necesse est, & homines & orationes. de ridiculis autem separatim in iis, quæ de poetica, disputatum est. Ac de iucundis quidem hæc dicta sint. molesta uero ex iis, quæ sunt his contraria, liquet. Ac quas quidem ob res iniuriam faciant, hæ sunt.

A quibus fiat iniuria.

QVO modo uero se habentes, & quibus, nunc dicamus. Ac ipsi quidem; quoties existimant, rem agi posse, & à se posse, & si egerint, fore, ut lateant, aut si non latuerint, ut pœnas non dent, aut dent illi quidem, sed multam minorem compendio ipsi subeant, aut ii, quos caros habent. ac quæ quidem fieri possint, aut non possint, postea dicemus; quia hæc omnibus rhetoricæ partibus communia sunt. Illi uero se impune iniuriam facere posse existimant, qui in dicendo, & qui in agendo ualent, & qui sunt in multis iudiciis exercitati, & si multos amicos habeant, & si diuites sint; in primis

primis autem si ipsi uersentur in iis, quæ diximus, existimant posse; sin minus, si eiusmodi sibi adsint amici, aut ministri, aut socii; quia per hos possunt & agere, & latere, & pœnas non dare; & si amici sint iis, qui iniuriam acceperunt, aut iudicibus; quia amici parum cauent, ne iniuriam patiantur, & reconciliantur ante, quàm litem intendant. iudices autem gratificantur iis, quibus fuerint amici, atque aut omnino absoluunt, aut leui multa afficiunt. Latere uero possunt, quique contrarii criminationibus sunt, ut imbecillus, de uerberibus, & pauper, aut turpis, de adulterio. & quæ nimis in aperto sunt, atque in oculis; neque enim cauentur; quia nemo prorsus opinetur. & quæ tanta sunt, ac talia, quæ nemo; quia ne hæc quidem cauentur. etenim omnes ut ab usitatis morbis, sic ab iniuriis cauent. quo uero nemo dum laborauit, eum nemo cauet. Et quibus nemo est inimicus, aut multi; illi enim putant, se latituros, quia non cauentur, hi uero etiam latent, quia non existimantur eos aggressuri fuisse, qui cauent, & quia defensionem habeant, se nunquam aggressuros fuisse. Et quibus occultatio aut modus, aut locus, aut alienatio prompta est. Et quibus, si non latuerint, aut iudicii depulsio adest, aut in longinquum tempus dilatio, aut iudicium corruptio. Et quibus, si mulctetur, solutionis depulsio adest, aut in longinquum tempus dilatio, aut propter inopiam nihil habeat, quod amittat. Et quibus compendia suppetunt aperta, aut magna, aut propinqua, damna uero aut parua, aut obscura, aut remota. Et cui non est proposita pœna equalis utilitati. quod uidetur inesse tyrannidi. Et quibus iniuriæ lucra sunt, damna

uero

uero probra solummodo . Et quibus contra iniuriæ in laudem aliquam ; ut si contingit , ut simul patrem , aut matrem ulciscerentur , quemadmodum Zenoni , multæ uero in pecunias , aut exilium , aut aliquid eiusmodi ; quia utrique , & utroque modo se habentes iniuriam inferunt , non tamen idem , sed qui contrariis moribus præditi sint . Et qui sæpe aut latuerunt , aut pœnas non dederunt . Et qui sæpe opinione lapsi sunt ; sunt enim quidam etiam in huius generis rebus , ut in re bellica , iterum pugnare parati . Et quibus protinus adsit uoluptas , molestia uero posterius ; aut lucrum quidem , damnum uero posterius . cuiusmodi intemperantes sunt . intemperantia uero omnibus in rebus , quæ concupiscuntur , uersatur . Et quibus contra molestia iam adest , aut damnum , uoluptas autem , & utilitas , posterius , ac diutius sunt , qualia continent , prudentioresque se cœtantur . Et quibus contingit , ut fortuna , aut necessitate , aut natura , aut consuetudine egisse uideantur , atque omnino per errorem , non per iniuriam fecisse . Et quibus æquitatis obitendæ facultas adsit . Et qui indigentes sunt . duobus autem modis sunt indigentes ; quia aut tanquam rerum necessariarum , ut pauperes , aut tanquam exuperantium , ut ciuies . Et qui bonæ admodum existimationis sunt , & qui admodum male , illi quidem , ut qui non existimentur , hi uero , ut qui nihilo deteriore existimatione futuri sint . Ac ipsi quidem hoc modo se habentes aggrediuntur .

Quibus fiat iniuria .

IN IURIAM autem faciunt eis , & eas res possidentibus ,
quarum

quarum ipsi sunt indigentes aut ad necessarios usus, aut ad exuperantiam, aut ad uoluptatis fructum. Et iis, qui sunt procul, & iis, qui propè; horum enim matura est comprehensio, illorum uero sera ultio, ut qui Carthaginenses dispo-
hant. Et eis, qui non cauent, neque obseruant, sed creduli sunt; quia omnes latere facile est. Et ignauie deditis; quia ius persequi hominis est industrii. Et uerecundis; quia de lucro non contendunt. Et iis, qui à multis iniuriam acceperunt, nec ius persequuti sunt, ut qui sint, quemadmodum est in prouerbio, præda Myforum. Et iis, quibus nunquam, et iis, quibus sæpe; neutri enim cauent, illi quidem, ut nunquã, hi uero, ut non amplius. Et eis, quibus oblata calumnia est, & iis, quibus offerri facile potest; quia tales nec præeligunt, quòd iudices reformidant, nec persuadere possunt: ex quibus sunt, qui odio, atque inuidia flagrant. Et eis, aduersus quos prætextum habent, aut proauos, aut ipsos, aut amicos, aut de se, aut de proauis, aut de iis, quos caros habent, aut male meritos esse, aut merituros fuisse. ut enim est in prouerbio: prætextu tantum eget improbitas. Et inimicis, & amicis; his enim, facile est, illis uero, iucundum. Et iis, qui ab amicis inopes sunt, & qui in dicendo, & in agendo minimum ualent; quia aut ius persequi non conantur, aut in gratiam redeunt, aut nihil proficiunt. Et quibus non expedit aut iudicio, aut solutione expectanda tempus consumere: quod genus, peregrini, & opifices; quia paruam ob rem eiusmodi homines transigunt, & facile mitigantur. Et iis, qui multas iniurias fecerunt, aut tales, quales patiuntur; prope enim uidetur esse, ut non faciat iniuriam, quando ta-

lem aliquis accepit, qualem & ipse facere consuevit. dico autem, si quis uerberibus eum, qui contumeliosus esse solet, afficiat. Et iis, qui aut male meriti sunt, aut uoluerunt, aut uolunt, aut merituri sunt. habet enim hoc & iucunditatem, & honestatem, et prope uidetur esse, ut non fiat iniuria. Et quibus, gratificabuntur aut amicis, aut eis, quos admirantur, aut quos perditæ amant, aut dominis, aut omnino iis, quibus ipsi uiuunt, et à quibus obtinere, quod æquū sit, queunt. Et iis, quibus crimen obtulerint, à quibusq; seiuncti sint; quia eiusmodi res prope uidentur esse, ut non fiat iniuria, ut Callippus fecit in Dionem. Et iis, quos læsuri alii sint, si non ipsi; quasi non amplius liceat consilium agitare. quemadmodum dicitur Aenesidemus ἡγοῦντο Geloni misisse, postquam seruitutem induxit; quod præripuisset, quasi & ipse facturus fuisset. Et iis, quos si iniuria affecerint, multas res iustas facere poterunt, tanquam facile sanaturi. quemadmodum Iason Thessalus dixit, nonnulla sibi iniuste agenda esse, ut & iusta multa facere possit. Et eas, quas omnes, aut pleriq. facere soliti sunt; quia putant fore, ut ueniam impetrent. Et quæ ad occultum facilia sunt, qualia sunt, quæ aut celeriter consumuntur, ut esculenta, aut facile commutantur, aut figuris, aut coloribus, aut temperamentis, aut quæ multis in locis abdere promptum est, ut quæ facile portantur, & in angustis locis abduntur. Et quibus indifferentia, aut similia multa ante is, qui facit iniuriam, possidebat. Et quæ narrare pudet eos, qui iniuriam acceperunt, ut propriarum uxorū contumelias, aut in se, aut in liberos. Et in quibus litigiosus esse uideatur ille, qui iudicio persequatur.

quales

quales sunt & parue res, & quibus proposita uenia est. Ac quemadmodum quidem se habentes iniurias faciant, et quales, & qualibus, & quare, hæc ferme sunt.

De iniuriis, & iuste susceptis actionibus, unde iniuriarum nomina distinguuntur.

INIVRIAS autem, iustasq. actiones omnes, hinc ducto initio, distinguamus. Iusta ergo, atque iniusta omnia definita sunt ad duas leges, & ad quos, duobus modis. Dico autem legem unam priuatam, alteram communem. priuatam quidem, quæ singulis constituta est inter ipsos: atque huius unam non scriptam, alteram scriptam; communem uero, quæ est secundum naturam. est enim quoddam, quod uaticinantur omnes, natura commune iustum, & iniustum, etiam si nulla societas inter eos, & pactio intercedat. quemadmodum & Sophoclis *Antigone* dicere uidetur, iustum esse, *Polynicem* quamuis interdictum sit, sepelire, utpote quod natura sit iustum: Hoc nanque non hodie, aut heri, at semper fuit, nec quisquam homo scit, eius ortus unde sit. Et quemadmodum *Empedocles* inquit de non interficiendis animantibus. hoc enim non quibusdam quidem iustum est, quibusdam uero nequaquam, Sed lex summa hæc est extensa per æthera magnum, Aeraque immensum cunctis mortalibus alma. & quemadmodum inquit *Alcidamas* in *Attesemaca*. Ad quos uero sunt definita, duobus modis sunt definita. quia quæ agere oportet, & non agere, aut ad remp. aut ad eorum unum, qui reip. participes sunt, referuntur. quo fit, ut iniu-

rias, iustaſq. actiones duobus modis iniuſte, et iuſte ſuſcipe-
re liceat; quia aut ad unum certum, aut ad rem publicam.
nam qui adulterium committit, aut uerberibus afficit, alicui
certo facit iniuriam, qui uero militiam detrahit, rei publi-
cæ. Cum ergo omnes iniurias diſtribuerimus, ut aliæ per-
tineant ad remp. aliæ ad alium, atque alios, repetito, quid
ſit iniuria affici, reliqua perſequamur. Eſt igitur iniuria af-
fici, ab iis, qui ſua ſponte agunt, iniuſta pati. nam iniuria af-
ficere ſponte eſſe, antea definiuimus. Quoniam autem qui
iniuria afficitur, noxa afficiatur, & quidem inuitus, neceſſe
eſt (noxæ quidem ex iis, quæ diximus, manifeſtæ ſunt, quia
bona, & mala per ſe ipſa diſtincta ſunt, itemq. quæ ſponte,
nimirum, quæcunq. ſcientes) ergo omnia crimina aut ad
remp. pertineant, neceſſe eſt, aut ad priuatum, itemq. aut
ignorante, aut non ſponte, aut ſponte ſua agente, aut ſcien-
te, & ex iis partim præeligente, partim uero propter affe-
ctum. Ac de ira quidem in iis, quæ de affectibus dicemus,
agetur. qualia uero præeligunt, & quemadmodum ſe ha-
bentes, dictum eſt ante. Quoniam autem confitentes ſæpe,
feciſſe, aut nomen non confitentur, aut id, quod nomine con-
tinetur, ut ſuſtulſiſſe, ſed non furatum eſſe; & priorem pul-
ſaſſe, ſed non contumelia affeciſſe; & concubuiſſe, ſed non
adulterium commiſiſſe; aut furatum eſſe, ſed non ſacrile-
gium feciſſe, quia non dei quidpiam; aut coluiſſe, ſed non pu-
blicum; aut colloquutum cum hoſtibus eſſe, uerum non pro-
diditſe: propterea & hæc diſtinguere oportebit, quid ſit
furtum, quid contumelia, quid adulterium, ut ſiue eſſe, ſi-
ue non eſſe, oſtendere uoluerimus, iuſtum aperire queamus.

Sunt

Sunt autem eiusmodi omnia de eo, iniustum ne, ac improbi sit, an non iniustum id, de quo controuersia existit; quia nequitia, & iniuria in præelectione posita est. eiusmodi uero omnia præelectionem ad significant, ut contumelia, ut furtum. neque enim si pulsauit, omnino contumelia affecit, sed si alicuius rei gratia, ut dehonestandi eius, aut uoluptatis percipiendæ, neque omnino, si clam sustulit, furatus est, sed si furatus est, ut noxam afferret, & sibi ipsi ascisceret. Similis uero reliquarum rerum, atque harum ratio est.

Quæ sint æquæ actiones, unde iniuria iuste facta defendi possit.

Q VONIAM autem iustorum, iniustorumq. genera duo erant. si quidem alia scripta, alia non scripta, de iis quidem, de quibus leges loquuntur, diximus. Non scriptorum uero duo sunt genera, quorum partim sunt secundum uirtutis, & uitii exuperantiam, quibus probra, & laudes, ignominie, atque honores, & dona proposita sunt, ut gratiam habere benemerenti, & reddere beneficium ei, qui dedit, et opem ferre amicis, & quæcunq. illius generis alia, partim uero priuatæ legis, & scriptæ sunt supplementa. æquum enim iustum esse existimatur. æquum autem iustum est extra legem scriptam. hoc autem partim inuitis, partim uolentibus legislatoribus accidit; inuitis quidem, quoties lateat; uolentibus uero, quoties distinguere nequeant, uerum in uniuersum loqui necesse habeant; non sit tamen ita, nisi plerunq. & quæcunq. ad distinguendum haud facilia sunt propter infinitatem,

finitatem, ut uulnerare ferro, & quanto, & quali; quia dē numerantem tempus deficeret. si igitur indefinitum sit, lege autem sciendum sit, simpliciter loqui necesse est. quapropter si quis annulum habens manum tollat, aut percutiat, secundum legem quidem scriptam culpæ affinis est, & facit iniuriam, secundum ueritatem uero non facit. & hoc est *Aequum*. si ergo *Aequum* est id, quod diximus, perspicuum est, qualia æqua, & non æqua, & quales non æqui homines sint. Etenim ea sunt æqua, propter quæ ueniam dare oportet. Et non eadem pœna digna censere errata, atque iniurias, neque errata, atque infortunia. sunt autem infortunia, quæcunque præter rationem, & sine malitia, errata uero, quæcunque non præter rationem, nec sine malitia, iniuriæ uero, quæ nō præter rationem, & à malitia; quia quæ propter cupiditatem, à malitia *Aequum* est item rebus humanis ignoscere, nec legem, sed legislatorē spectare, nec uerba, sed sententiam legislatoris attendere, nec actionem, sed præelectionem, nec partem, sed totum, neque qualis nunc, sed qualis semper, aut plerunq. extitit. Et tenere memoria potius commoda, quibus affectus est, quàm incommoda; utq. commoda potius, quæ accepit, quàm quæ attulit. & passum iniuriam, tolerare, & uerbis, quàm factis iudicari malle. quia æquum arbiter intuetur, iudex uero legem. eaq. de re arbiter est inuentus, ut æquum ualeat. Atque æqua quidē hunc in modum sint explicata.

De maioribus, & minoribus iniurijs.

INIVRIÆ uero maiores sunt, quæ à maiore iniustitia
prodeunt.

prodeunt . itaq. minimæ etiam maximæ . quemadmodum
Melanopo Callistratus obiciebat, quòd tribus sacris semio-
bolis templi constructores fraudasset ; in iustitia uero con-
tra . Sunt autem hæc ex eo, quia ui excellunt . nam qui tres
semiobolos est furatus , etiam maleficium quodcunque com-
mitteret . Ac aliquando quidem hoc modo maior est , ali-
quando uero ex damno iudicatur . Et cuius non est par pœ-
na , sed omnis inferior . Et cuius non est medicina ; quia
difficilis res est , neque effici potest . Et de qua non potest
pœnas repetere is, qui est passus ; quia non est medicabilis .
siquidem pœna, & castigatio medicina sunt . Et si qui pas-
sus , & si qui iniuria affectus est , ipse se ipsum grauitèr
multauit ; quia qui fecit , adhuc maiori pœna dignus est .
ut Sophocles Euctemonem defendens, quoniã semetipsum
contumelia affectus occidit , non æstimaturum dixit mino-
ris, quàm quo se ille, qui passus est, æstimauit . Et quam so-
lus fecit , aut primus , aut cum paucis . Et sæpe in eadem
re delinquere , magnum . Et propter quam quæsitæ, & in-
uenta sunt , quæ prohibeant , & quæ puniant . ut Argis
animaduertunt in eum , propter quem lex lata est, & pro-
pter quos carcer ædificatus est . Et iniuria magis ferina, ma-
ior . & quæ de industria magis . Et quam qui audiunt, me-
tuunt potius, quàm miserantur . Atque illa oratoria hu-
ius generis sunt, quòd multa iura sustulit, aut transgressus
est, ut iusiurandum, dextram, fidem, connubium ; quia mul-
tarum est iniuriarum exuperantia . Et quòd ibi, ubi nocen-
tes plectuntur . id quod faciunt falsi testes ; ubi enim non
iniuriosus erit , si & in foro ? Et in quibus pudor est ma-
xime.

xime. Et si ei, à quo beneficium accepit; quia plures facit iniurias, tum quòd male meretur, tum quòd nò bene. Et id, quòd est contra non scripta iusta; quia melioris hominis sit, non ex necessitate iustum esse; ac scripta quidem ex necessitate sint, non scripta uero minime. Alio uero modo, se contra scripta; nam qui in rebus metuendis, & multæ obnoxii iniuriosus est, etiam in iis, quæ non obnoxie sint, iniuriosus erit. Ac de iniuria quidem maiore, & minore dictum est.

Fides artis expertes quinque esse, leges, testes, pacta, quæstiones, iusiurandum, & quo modo eorum singula sint tractanda.

IAM uero fides, quæ arte carere dicuntur, continenter iis, quæ dicta sunt, percurramus. sunt enim iudicialium propriæ, suntq. numero quinque, leges, testes, pacta, quæstiones, iusiurandum.

Ac primum quidem dicamus de legibus, quemadmodum eis uti oporteat, tum adhortando, tum dehortando, tum accusando, tum defendendo. Neque enim dubium est, quin, si lex scripta factò aduersetur, communi lege utendum sit, & æquo, ut iustiore. Et quòd Optima mente est, non utiq. scriptis utis & quòd æquum semper manet, ac nunquam immutatur, neque lex communis, quippe quæ sit secundum naturam, scriptæ uero sæpe. unde dictum est in Antigone Sophoclis (defendit enim, se fecisse contra Creontis legem, uerum non contra scriptam:) Hoc nanque non hodie, aut
beri,

heri, at semper fuit, ideo ego non timeo viri vilius minas. Et quòd iustum uerum est, atque utile quiddam, sed non quod existimatur. quare non lex scripta, quia officio legis non fungitur. Et quòd iudex perinde, ac argentarius est, ut adulterinum iustum discernat à uero. Et quòd melioris hominis est, non scriptis uti, & stare, quàm scriptis. Et si qua in parte probate legi contraria sit, aut etiam ipsa sibi, ueluti interdum una iubet rata esse, quaecunque pacti sint, altera uero pacisci uetat contra legem; itemq. & si ambigua: ut torqueas, & uideas in utram deductionem aut iustum, aut utile quadrabit, deinde eo utaris. Et, si res propter quas lex lata est, non amplius manent, sed lex, enitendum est, ut id aperias, & hac ratione contra ipsam contendas. Quod si lex scripta cum facto sit, tum dicendū, quòd Optima mente, nō est, ut contra legem iudicet, sed ut, si ignoret, quid lex loquatur, ne periurio se obstringat. Et quòd nemo, quod simpliciter bonum est, eligit, sed quod huic. Et quòd nihil interest inter non latum, & non obseruatum. Et quòd in aliis artibus cauillari non expedit, contra medicum; quia non tantum obest erratum medici, quantum introducta consuetudo nō obediendi principi. Et quòd legibus se sapientiores esse studere, id est, quod in laudatis legibus prohibetur. Ac de legibus quidem explicatum hoc modo sit.

De testibus autem. testes sunt duplices, alii antiqui, alii noui. & horum alii periculi particeps, alii expertes. dico autem antiquos, tum poetas, tum alios illustres, quorum clara iudicia extant. ut Athenienses de Salamine Homerum te-

stem adhibuerunt, & Tenedu nuper Periandrum Corinthium aduersus Sigeenses, & Cleophon contra Critiam Solonis elegis usus est, cum diceret, familiam eius olim periculantem fuisse, quia nunquam Solo cecinisset: Dic flauo Cruiam, ut studeat parere parenti. Ac de rebus quidem præteritis eiusmodi testes sunt, de futuris uero . . . & oraculorum interpretes, ut Themistocles, quod muri lignei nauali prælio rem committendam significabant. Præterea uero prouerbia etiam, ut dictum est, testimonia sunt. ut si quis suadeat, ne senex amicus paretur, ei prouerbium attestatur: Seni me bene facias, & ut filii tollantur, quorum & parentes: Stultus, qui natos occiso patre relinquit. Noui uero sunt, qui cum illustres essent, de re aliqua iudicarunt, quia eorum iudicia sunt iis, qui de iisdem rebus controuersantur, accommodata. ut Eubulus in iudiciis contra Charetem, id, quod Plato aduersus Archebium dixerat, usurpauit: Increbuit in ciuitate confessio improbitatis. Et periculi participes, si ementiri existimentur. Atque eiusmodi quidem testes alia duntaxat testantur, factum nec ne, sit nec ne. cuiusmodi uero, non testantur, ut iustum, an iniustum, utile, an inutile. Qui uero longinqui sunt, in his etiam rebus certissimi sunt. antiqui uero certissimi, quia incorrupti. certa uero fides à testimoniis. Ac testibus quidem carenti: quod ex uerisimilibus iudicandum est, & hoc est, Optima mente, & quod uerisimilia pretio corrumpi non possunt; & quod uerisimilia falsi non arguuntur. Habenti uero aduersus carentem; quod uerisimilia iudicio non subiiciuntur, & quod testimoniis non esset opus, si rationibus perpendere satis esset.

esset. Sunt autem testimonia, alia de se ipso, alia de aduersario, itemq. alia de facto, alia de moribus. Ex quo perspicuum est, nunquam fore, ut utilis testimonii inopia laboretur; quia si non de re, quod aut sibi faueat, aut aduersario refragetur, at de maioribus aut sui ipsius ad bonitatem, aut aduersarii ad improbitatē. Reliqua uero de teste aut amico, aut inimico, aut medio, aut probato, aut infami, aut medio, & quæcunq. aliæ eiusmodi differentiæ, ex iisdem locis sunt petendæ, ex quibus & enthymemata petimus.

De pactis autem eatenus orationis usus pertinet, ut ea augeat, aut extenuet, aut idonea efficiat, aut non idonea; si ipsi quidem suppetant, idonea, & rata, in aduersario uero, contra. Ad ea igitur idonea efficienda nihil à tractatione testium differt. quia perinde sint, qui inscripti sunt, aut qui custodiunt, ita pacta idonea sunt. Vbi uero pactum suppetere, constat, si proprium est, adaugendum est. Pactum enim lex est priuata, & in parte. & pacta quidem legē ratā non efficiunt, at leges pacta, quæ cū lege cōueniunt. atq; omnino lex ipsa pactū est quoddam. quare qui non credit, & pactum tollit, leges tollit. Quin etiam pleraq. eorum, quæ contrahuntur, & sponte nostra aguntur, secundū pacta sunt; usque adeo ut his infirmatis hominum inter se societas euertatur; itemq. alia, quæcunq. conueniunt, perspicere promptum est. Quòd si repugnet, & cū aduersariis faciat, primum quidem quibus quis contrariam legem oppugnauerit, eadem conueniunt. absurdum enim sit, si legibus, quoties inique latæ sint, sed fraudem fecerint, qui tulerunt, parere oportere non arbitramur, pactis autem necesse

fit. deinde, quòd iusti dispēsator est iudex, ut nō hoc spectare debeat, sed tanquam iustius, & iustum quidem inuertere neque fraude, neque necessitate licet, quia natura constitutum est, pacta uero & à deceptis; & à coactis hominibus fiunt. Ad hæc uero animaduertere conuenit, an aduersetur alicui aut legum scriptarum, aut communium, et iustis, aut honestis, præterea uero an aliis pactis posterioribus, an prioribus. aut enim posteriora sunt rata, priora uero irrita, aut priora rata, posteriora uero falsa sunt. utroque modo, proficiet. præterea uero commodum est etiam dispicere, si qua in parte aduersetur iudicibus, & quæcunq. sunt huius generis. etenim hæc facilia sunt ad intelligendum eodem modo.

Questiones autem testimonia sunt quædam, quæ certam existimantur habere fidem, quia necessitas urget. quare difficile non est, de his uidere, & quæ incidere possunt, exponere. Ex quibus & si propriæ sint, amplificare licet: quòd ipsæ solæ inter testimonia ueræ sunt; & si repugnent, atq. cum aduersario faciant, ueritas euerti de toto questionum genere disputando potest; quòd qui coguntur, non minus falsa dicunt, quàm uera, & tolerando, ne uera enuncient, & facile mentiundo, ut citius requiescant. Hæc autem oportet ad præterita eiusmodi exempla, quæ nota iudicibus sint, redigere posse.

De iureiurando uero quadripartita afferri distributio potest. Nam aut offert, & accipit, aut neutrum; aut illud quidem, hoc uero nequaquam. Et ex his aut offert quidem, uerum non accipit, aut accipit quidem, uerum non offert.

& præter hæc alio modo, si iusiurandum iuratum est aut ab ipso, aut ab illo. Ac non offert quidem; quia facile peierant, & quia ubi ille iurauit, nequaquam reddit, hos autem arbitratur, etiam si non iurarit, eum damnaturos. & quia hoc periculum inter iudices melius est; his enim credit, illi uero nequaquam. Non accipit autem; quia iusiurandum est pro pecunia, & quia si improbus esset, iureiurando se obstrinxisset. præstat enim alicuius rei gratia improbum esse, quam nullius. quia iuratus habebit, iniuratus uero nequaquam. atque ita propter uirtutem, non propter periurium efficietur, ne iuret. quin etiam Xenophanis illud accommodatum est; quod non est æqualis prouocatio impii aduersus pium, sed similis, atque si robustus imbecillum uerberaret, & ad uapulandum prouocaret. sin autem accipit; quod credit sibi, non illi. & illud Xenophanis inuertendo, ita dicendum, perinde esse, ac si impius offerat, pius autem iuret, & indignam rem esse, ipsum iurare, de quibus iuratos eos uult iudicare. Sin autem offert: quod pium est, diis rem permittere uelle. neq; opus est, ut ipse iudices alios quærat, cum ipsi iudicium deferat. & quod absurdum est, nolle iurare, de quibus alios uult iurare. Quoniam autem perspicuum est, quomodo de singulis dicere conueniat; etiam copulando, quo modo dicendum sit, apparebit. ueluti, si ipse accipere uelit, at non offerre; & si offert quidem, at non accipere; & si accipere uelit, & offerre; & si neutrum. ex iis enim quæ dicta sunt, copulari necesse est. quare rationes etiam ex iis, quæ dicta sunt, copulentur, necesse est. Quod si a se ipso susceptum fuerit, & quidem contrarium; quod


quòd non est periurium; quia iniuriam facere sponte est, periurare autem est iniuriam facere, quæ uero ui, aut fraude, haudquaquam sponte. quo in loco concludendum est, periurium etiam concipi mente, non ore. Sin autem ab aduersario fuerit iuratum; quòd omnia tollit, qui non statim, quæ iurauit. ob id enim & leges obseruant iurati. & uos stare uolumus iis, quæ iurati iudicetis, ipsi uero non stabimus? Ac fides quidem artis expertes tam multis exposita sint.



ARISTOTELIS ARTIS

RHETORICAE,

Carolo Sigonio Interprete,



LIBER SECVNDVS.

De moribus, & affectibus.



CQVIBVS quidē ex rebus oporteat adhortari, ac dehortari, et vituperare, ac laudare, & accusare, ac defendere, & cuiusmodi opiniones, & propositiones ad has res persuadēdas utiles sint, hactenus de his. n. et ex his enthymemata proferūtur,

ut proprie in unoquoque genere orationum dicamus. Quoniam autem rhetorica iudicationis est gratia (si quidem & consilia iudicant, & iudicia iudicatio sunt) sane necesse est, non solum in orationem, quemadmodum demonstrabit, & fidem faciet, intueri, sed etiam se ipsum cuiusdammodi, & iudicem comparare. multum enim ad persuadendum interest in primis quidem in consiliis, deinde uero etiam in iudiciis tum cuiusdammodi uideri eum, qui dicit, tum eundem

erga

erga se ipsos aliquo modo se habere, putare, ad hæc uerò, si
 & ipsi aliquo modo affecti sint. Ac cuiusdammodi quæ-
 dem uideri eum, qui dicit, ad consilia accommodatius est,
 affectum uero aliquo modo eum esse, qui audit, ad iudicia,
 neque enim eadem uidentur iis, qui amant, ac iis, qui odio
 habent, neque iratis, atque placatis, uerum aut omnino
 diuersa, aut magnitudine diuersa; etenim qui amat, eum,
 quo de iudicium facit, aut nihil, aut parum deliquisse ex-
 stimat; qui uero odit, contra. & cupienti quidem, ac bene
 speranti, si quod futurum est, sit iucundum, etiam fore,
 ac bonum fore, uidetur, at uero affectus experti, ac dubi-
 tanti, contra. Ac quam quidem ob rem fides oratoribus
 ipsis adhibeatur, tres causæ existunt. (tot enim sunt eæ,
 propter quæ fidem habemus, præter demonstrationes,) hæc
 autem prudentia, et uirtus, & beneuolentia sunt; si quidem
 fallunt in iis, de quibus dicunt, uel consilium dant, aut hîs
 rebus omnibus, aut aliqua harum; quia aut propter im-
 prudentiam non recte id opinantur, aut recte opinantes, pro-
 pter improbitatem ea silent, quæ opinantur, aut pruden-
 tes, & probi sunt illi quidem, uerum parum beneuoli. quæ
 re fieri potest, ut qui intelligunt, non optima tamen su-
 deant; & præterea nihil. Ergo necesse est, eum, qui hæc
 habere omnia existimetur, apud eos, qui audiunt, auctori-
 tatem habere. Ac unde quidem prudentia, ac uirtute præ-
 diti uideantur, ex iis est, quæ de uirtutibus explicata sunt,
 depromendum; quia ex iisdem & alterum, & se ipsum ta-
 lem aliquis comparauerit. de beneuolentia uero, & amici-
 tia in præceptis de affectibus nunc dicemus.

De affectibus.

AFFECTVS autem sunt, propter quos immutati in indicationibus disident, quos quidem molestia, uoluptasq̃, consequitur, ut ira, misericordia, metus, & omnes eiusmodi, atque his contrarii. Ceterum quæ ad eorum unūquēq̃. pertinent, trifariam diuidere conuenit. dico autem exempli gratia, de ira, & quemadmodum affecti iracundi sint, & quibus irasci soliti sint, et quas ob res. quia si unum, aut duo horum teneamus, non autem omnia, haudquaquam fieri possit, ut iracundiam excitemus. similiterq̃ in ceteris. quemadmodum igitur in iis, quæ ante dicta sunt, propositiones descripsimus, sic in his faciamus, & eo modo, quo diximus, diuidamus.

De ira, ac lenitate.

SIT ergo ira appetitio cum dolore eius in speciem ulciscendi, qui paruifacere uideatur se ipsum, aut suorum aliquem non conuenienter. Si ergo ira hoc est, necesse est, eum, qui irascitur, irasci semper alicui singularium, ut Cleoni, non autem homini, & quia sibi, aut suis aliquid fecit, aut facturus fuit, itemq̃. omnem iram uoluptatem quandam consequi propter spem ulciscendi. est enim iucundum opinari, se consequuturum ea, quæ expetit. nemo uero expetit ea, quæ à se fieri non posse uidentur. qui uero irascitur, quæ ipse efficere potest, expetit. quare egregie de ira dictum est: Melle liquente magis dulcis quæ in pectore crescit. Sequitur enim

L I uoluptas

uoluptas quædam tum propter hoc, tum propterea quia in
 ulciscendo cogitatione uersantur. quæ ergo tunc excitatur
 phantasia uoluptatem efficit, ut quæ in somniis. Quoniam
 autem paruifactio est operatio opinionis circa id, quod ni-
 hili æstimandum uidetur, (etenim bona, & mala, quæq. ad
 hæc pertinent, magni æstimanda esse arbitramur, quæ uero
 nihil, aut admodum parua sunt, pro nihilo habenda esse
 putamus.) idcirco tres paruifactionis formæ sunt, contemp-
 tio, incommodatio, & contumelia. nam & qui contempnit,
 paruifacit; quia quæ nihili æstimanda putant, ea contem-
 nunt, quæ uero nihili æstimanda sunt, parui faciunt; &
 qui incommodat, uidetur contemnere; quia incommodatio
 est impedimentum uoluntatibus oblatum, non ut aliquid si-
 bi, sed ut ne illi. quoniam igitur non ut aliquid sibi, parui-
 facit: quod ex eo perspicitur, quia neque obfuturum arbitra-
 tur; si quidem timeret, & non paruifaceret, neque profuturum
 aliquid, quod sit æstimandum; quia curam adhibuisset,
 ut amicus esset; & qui contumelia afficit, paruifacit; quia
 contumelia est, nocere, & molestiam asferre in iis rebus, in
 quibus dedecus suscipit ille, qui patitur, non ut aliquid sibi
 suppetat aliud, quam quod suppetit, sed ut uoluptate af-
 ficiatur: quia qui rependunt, non contumeliam inferunt,
 sed ulciscuntur. causa uero uoluptatis eorum, qui contume-
 liam inferunt, ex eo est, quod se male afficiendo magis ex-
 cellere arbitrantur. itaq; iuuenes, & diuites contumeliose;
 quia contumelia inferenda se arbitrantur excellere; contumelie
 uero non æstimatio; quia qui non æstimat, paruifacit;
 quod enim nullius pretii est, nullam æstimationem neque

mali, neq; boni in se continet. itaque iratus inquit Achilles: Non æstimauit, quoniam ereptum donum ipse retinet. Itē: Tanquam quendam non æstimandum profugum; ut qui propterea irascatur. Putant autem conuenire, se magnifieri ab iis, qui inferiores sunt genere, facultate, uirtute, & omnino eo, in quo ipso longe excellit, ut in pecuniis diues pauperes, & in dicendo disertus indiferto, & qui imperat eo, cui imperatur, & qui imperio dignus existimatur ei, qui dignus est, cui imperetur. itaque dictum est: Ira magna est diuorum regum. At etiam postea iram seruat, donec efficiat, quia moleste ferunt, propter excellentiam. item ab iis, à quibus aliquis putat cōuenire, ut sibi benigne fiat. hi uero sunt, quibus ipse benigne fecit, aut facit, aut suorum aliquis, aut propter ipsum, aut uult, aut uoluit.

Quibus ex rebus iam liquet, & quonam modo se habentes ipsi irascantur, & quibus, & quas ob res. Ipsi enim: quoties doleant; quia qui dolet appetit aliquid. Ergo & si directo obstiterit aliquis, ut sitiēti in bibendo, & si non, similiter idem facere uidetur. Et si refragetur quispiam, & si non suffragetur; et si quid aliud hoc modo se habentem inturbat, irascitur omnibus. quare dum ægrotant, dum paupertate premuntur, dum amant, dum sitiunt, omnino dum cupiunt, & non recte rem suam agunt, iracundi sunt, & facile cōcitantur, maxime quidem aduersus eos, qui præsentem statum paruifaciunt, ut ægrotus in iis, quæ ad morbum attinent, pauper in iis, quæ ad paupertatem, bellator in iis, quæ ad bellum, amator in iis, quæ ad amorem. similiter uero & in ceteris. præparatur enim quisque ad suam

cuiusq; iram ab affectu eo, qui insitus est. Item si contraria expectauerit; cruciat enim uehementius quod ualde præter opinionem accidit. quemadmodum etiam delectat, quod ualde præter opinionem accidit, si quod uult, accidit. Itaq; perspicuum ex his est, quales horæ, & tempora, & affectiones, & etates ad iram facile concitentur, & quando, & ubi, & ut, quando magis in his uersantur, facilius etiam concitantur. Ac ipsi quidem hoc modo se habentes facile incendi ira possunt.

Irascentur autem irridentibus, & subsannantibus, & illudentibus; quia contumeliam inferunt. Et iis, qui detrimētis illis afficiunt, quæ signa contumeliæ sunt. eiusmodi uero esse necesse est, quæ neque pro re aliqua, neque iis utilia sunt, qui faciunt. tum enim propter contumeliam uideatur. Et maledicentibus, & contemnētib; in iis rebus, in quibus ipsi præcipue studium ponūt, ut qui ob philosophiā efferuntur, si quis in philosophiam, qui ob formam, si quis in formam; similiter uero etiam in aliis; multo uero magis, si suspicentur, hæc non adesse sibi, aut omnino, aut non firme, aut non existimari. ubi uero ualde se putant hæere in iis, in quibus illuduntur, curam non suscipiunt. Et amicis magis, quam non amicis; quia putant, conuenire magis, ut sibi ab iis benigne fiat, quam non. Et iis, à quibus soliti erant honorari, & curari, si non amplius ita consuescant; quia ab iis se contemni putant, alioquin eadem facturos. Et iis, qui mutuam gratiam non referunt, neque parem referunt. Et iis, qui contraria, ac ipsi, faciunt, si inferiores sint; quia qui tales sunt, omnes contemnere uidentur, & illi quidem ut eos, qui

qui inferiores sent, hi uero, ut ab inferioribus. Et iis, qui nullius estimationis sunt, si paruifaciunt, uehementius. positum est enim, iram esse paruifactionis aduersus eos, qui non conuenienter se gerunt. conuenit autem inferioribus, ut non paruifaciant. Et amicis, si non bene dicant, aut faciant, & adhuc magis, si contraria, & si non animaduertant, nos egere, ut Plexippus Antiphontis Meleagro; quia paruifactionis signum est, non animaduertere. quos enim curamus, non latent. Et iis, qui gaudent infortunis. Et omnino iis, qui bono animo sunt in suis infortuniis; quia aut inimici, aut paruifacientis est signum. Et iis, qui non curant, an molestiam afferant. quo fit, ut mala nunciantibus irascantur. Et iis, qui de se auscultant, aut sua mala spectant; quia aut paruifacientibus, aut inimicis similes sunt, quia amici condolent, omnes autem, qui propria spectant mala, dolent; item iis, qui paruifaciunt apud quinque, apud eos, quibus cum de honore contendunt, apud eos, quos suspiciunt, a quibus se suspici uolunt, apud eos, quos reuerentur, inter hos inquit si quis paruifaciat, succensent grauius. Et iis, qui in eiusmodi rebus paruifaciunt, quibus sibi non auxilium ferre, deforme est, ut parentibus, liberis, uxoribus, subiectis. Et iis, qui gratiam non reddunt; quia qui paruifacit, non ita, ut conuenit, facit. Et iis, qui iocantur cum serio agentibus; ualet enim ad contemptionem iocus. Et iis, qui aliis benigne fecerunt, si non & sibi; quia & hoc ualet ad contemptionem, non aestimare se dignum iis rebus, quibus omnes. Quin etiam ad iram concitandam ualet obliuio, ut quae penè nominum est; quia & obliuio signum paruifactionis uidetur

uidetur. ex noncurantia enim obliuio nascitur, noncurantia uero paruifactio est. Ac quibus quidem irascantur, & quemadmodum se habentes, & quas ob res, simul expositum est. ex quibus intelligi potest, opus fore, ut ipse tales eos oratione præparet, cuiusmodi cum sunt, iracunde affecti sunt, atque aduersarios eis rebus affines esse, propter quas irascuntur, & tales esse, qualibus irascuntur.

Quoniam autem irasci contrarium est ipsi leniri, & ira lenitati, intelligendum est, quomodo se habentes lenes sint, & erga quos se leniter gerant, & per quæ reuocantur ad lenitatem. Sit ergo lenitas constitutio, & sedatio iræ. Si ergo irascuntur iis, qui paruifaciunt, qui uero paruifacit, sponte sua agit, profecto lenes sunt & iis, qui nihil horum faciunt, aut non sponte sua faciunt, aut tales esse uidentur. Et iis qui contra uolunt, ac fecerunt. Et iis, qui & ipsi in se tales sunt; nemo enim ipse semet paruifacere existimatur. Et iis, qui contententur, & pœnitet; quasi enim pœnam habeant dolorem ob res commissas, conquiescunt ab ira. cuius rei castigatio famulorum indicio est. nam qui inficiantur, & contradicunt, castigamus uehementius, at uero aduersus eos, qui se iuste castigari fatentur, desinimus excandescere. signum autem est, quia impudentia est, manifesta negare, impudentia uero paruifactio, atque contemptio est. atqui quos ualde contemnimus, eorû pudore non afficimur. Et iis, qui se submittunt ipsis, nec contradicunt; quia uidentur se inferiores esse fateri, inferiores autem timent, qui uero timet, nemo paruifacit. iram autem aduersus eos, qui se submittunt, cessare, canes quoque indicant, qui prostratos non mordent. Et

iis,

iis, qui rogant, ac deprecantur; sunt enim summissiores. Et iis, qui contumelia afficiunt, & subsannant, ac paruifaciunt aut neminem, aut non bonos, aut non tales, quales ipsi sunt. omnino autem ex contrariis scrutari quæ ualeant ad mitigandum oportet. Et iis, quorum timore, & pudore afficiuntur; quia quoad ita se habent, non irascuntur; neque enim fieri potest, ut simul timeamus, & irascamur. Et iis, qui per iram fecerunt, aut non irascuntur, aut imbecillius irascuntur. neque enim ob id uidentur fecisse, quod paruifaciant; quia nemo iratus paruifacit; quia paruifactio est expers doloris, ira uero est cum dolore. Et iis, quos pudet ipsorum. Quin etiam qui contrario modo constituti sunt, atque irati, si sine dubio sunt lenes, ut in ludo, in risu, in festo, & felici die, in re sua bene gesta, in saturitate, omnino in indolentia, & uoluptate contumeliam non inferente, & bona spe. Item qui inueteratam iram, & non recentem habent; quia iram mitigat tempus. Quin etiam grauiorem alterius iram mitigat pœna, quæ ante de alio sumpta est. itaque recte Philocrates, dicente quodam, cum populus esset iratus, cur non te defendis? non dum, inquit. at quando? cum alium in crimen uocatum uidero. siquidem mites fiunt, cum iram in alium consumpserunt, ut accidit in Ergophilo. uehementius enim succensentes, quam Callisthem, dimiserunt, quia Callisthem pridie morte damnauerant. Et si conuicti, & si maius malum passi sint, quam qui irascuntur, attulissent; quia quasi se sumpsisse pœnas existimant. Et si ipsi arbitrentur, se iniuste agere, & iuste pati; neque enim ira aduersus id, quod conuenit, excitatur; quia non amplius se, contra quam conueniebat,

conueniebat, pati arbitrantur. id quod ira erat. itaque oratione prius castigare oportet. etenim & serui minus ægre ferunt, cum castigantur. Et si putant, fore ut non sentiant, quod per ipsos, & pro iis, quæ passi sunt. ira enim est singularium, ut ex definitione liquet. Itaque recte scriptum est, Vlysiem urbis euerforem dicito. perinde, ac si non ultus esset, nisi sensisset, & à quo, & pro quo. quare neque aliis, quicunque non sentiunt, irascuntur, neque amplius mortuis, quippe qui extrema perpeffi sint, neque dolituri sint, neque sensuri, quod qui irascuntur, appetunt. Itaque bene de Hectore poeta, cum uellet Achillem ab ira aduersus mortuum reuocare: Atqui mutam terram furens verberat. Ex his igitur perspicuum est, eos qui placare uolunt, ex his locis dicere oportere, tales quidem ipsos comparando, eos uero, quibus irascuntur, aut pertimescendos, aut reuerentia dignos, aut benemeritos, aut inuitos, aut rebus commissis ualde dolentes.

De amore, & odio.

QVOS autem ament, & odio habeant, & quam ob rem, amicitia, atque amore definitis, dicamus. Sit ergo amare, uelle alicui ea, quæ bona arbitratur, illius caussa, non autem sui, eaque pro uiribus efficere. amicus autem est, qui amat, & redamatur. existimantur autem amici esse, qui hunc in modum inter se affecti existimantur. Quibus positis, necesse est, amicum eum esse, qui simul letatur commodis, & condolet incommodis, non ob rem aliquam aliam

aliam, sed propter illum: gaudent enim omnes, ubi eueniunt
 ea, quæ uolunt, dolent autem contrariis. quare uoluntatis si-
 gnum sunt dolores, & uoluptates. Et, quibus demum eadem
 bona, & mala sunt. Et, qui sunt isdem amici, & qui sunt
 isdem inimici: eadem enim ut hi uelint, necesse est. quare
 qui quæ sibi, alii uult, huic uidetur esse amicus. Et eos quæ
 amant, qui beneficium dederunt aut sibi, aut iis, quos caros
 habent, idq. aut magnū, aut prompto animo, aut in eiusmodi
 tēporibus, aut ipsorū causa: aut eos, quos dare uelle bene-
 ficiū arbitrentur. Et amicos amicorū. Et, qui amāt eos, quos
 ipsi amant. Et, qui amantur ab eis, qui à se amātur. Et qui
 sunt eorundē inimici. Et, qui oderunt illos, quos ipsi oderūt.
 Et, qui odio habētur ab eis, qui à se odio habentur; his. n. om-
 nibus eadē bona uidētur esse, ac sibi, ut eadē illis bona uelīt,
 id quod erat amici. Itē beneficos in pecunias, & in salutem;
 itaq; liberales, & fortes honorant, atq; adeo etiam iustos. ta-
 les aut putāt, qui non ab aliis uiuunt, cuiusmodi sunt qui ex
 labore; & ex his ii, qui ex agricultura, & ex aliis opifices in-
 primis. Et temperatos; quia non iniusti. Et ab agendo remo-
 tos, propter eandē rationē. Et, quibus uolumus amici esse, si
 uideantur uelle. sunt aut tales, & qui uirtute præstant, &
 qui bona existimatione præditi sunt aut apud oēs, aut apud
 optimos, aut apud eos, quos ipsi admirantur, aut apud eos,
 qui se admirantur. Item, qui in uita communi, & quotidia-
 na consuetudine sunt iucundi. quales sunt faciles, neque ad
 redarguenda peccata proclues, neque concertationū, neque
 liliū amantes; quia eiusmodi omnes pugnaces sunt, qui
 uero pugnant, contraria uelle uidentur. Et qui dextri
 sunt

sunt tum in eludendo, tum in perferendo; eidem enim rei ambo student, cui proximus; quia & dicto lacesse possunt, & eleganter lacesunt. Et, qui laudant bona, quæ adsunt, & ex iis ea maxime, quæ sibi ut adsint, uerentur. Et mundos in aspectu, in uestitu, in tota uita. Et, qui exprobrant neque peccata, neque beneficia; ambo enim ad redarguendum propensi sunt. Et, qui non recordantur iniurias, neque crimina obseruant, sed facile reconciliantur; quia quales erga alios esse existimant, etiam erga se arbitrantur. Et, qui maledici non sunt, nec mala propinquorum, neque ipsorum, sed bona norunt; quia boni uiri hoc faciunt. Et, qui non aduersantur irascentibus, aut serio agentibus; tales enim pugnaces. Et, qui erga ipsos aliquo modo studiose se gerunt, ut, qui ipsos admirantur, atque ipsos uirtute præditos arbitrantur, & ipsis delectantur. Et, qui ita maxime affecti sunt in iis rebus, in quibus ipsi uolunt aut suscipi, aut egregios, aut iucundos existimari. Et pares, & eadem profitentes, modo ne impedimentum asserant, neque indidem uictum quærant; sic enim accidit illud: Figulus figulo. Et qui illa appetunt, quorum fieri potest, ut ipsi simul participes sint; sin minus, idem accidit etiam ita. Et erga quos ita affecti sunt, ut apud eos facere non pudeat ea, quæ ad opinionem, non contemnentes. Et, apud quos pudet facere ea, quæ ad ueritatem. Et, quibus cum de honore contendunt, aut à quibus uolunt se æmulari, & non inuideri, hos aut amant, aut amici eis esse uolunt. Et quibus bona procurarint, nisi ipsis maiora mala euentura sint. Et, qui absentes æque, ac præsentis amant.

itaque

itaque qui erga mortuos sunt tales, diliguntur ab omnibus. Et omnino qui amicos unice diligunt, et non derelinquunt; in primis enim ex bonis amant eos, qui boni amici sunt. Et qui nihil secum fingunt, quales & qui uitia sua produnt. dictum est enim, nos apud amicos, quæ ad opinionem, non pudere. si ergo is, quem pudet, non amat, quem non pudet, amanti similis est. Et, qui non sint metuendi. Et, quibus confidimus; nemo enim quem metuit, diligit. Iam uero species amicitiae sunt sodalitas, propinquitas, cognatio, & quæcunque eiusmodi. ad amicitiam autem conciliandam ualent gratia, & si haudquaquam rogatus fecerit, & postquam fecit, non indicarit, sic enim sui causa uidetur, & non alterius. De inimicitia uero, & odio, perspicuum est, ex contrariis esse scrutandum. Ad inimicitiam uero concitandam ualent ira, incommodatio, calumnia. ac ira quidem est ex iis, quæ ad se, inimicitia uero etiam sine iis, quæ ad se. nam si talem esse suspicamur, odio habemus; & ira quidem semper aduersus singularia est, ut Calliæ, aut Socrati, odium autem etiam aduersus genera; si quidem in furem, ac sycophantam odium quisque habet; & illud quidem tempore sanabile, hoc uero insanabile; & illa afficere molestia cupit, hæc incōmodo potius. nam qui irascitur, uult sentiri, huius autem nihil interest; quæ uero molestiam afferunt, sentiuntur omnia; quæ autem maxime mala sunt, minime sentiuntur, iniustitia, & imprudentia; quia præsentia uitii nihil affert molestiæ; et illud adiunctum molestiam habet, ab hoc molestia abest. nam qui irascitur, molestia afficitur, qui uero odit, haudquaquam; & ille quidem, si multa eueniant, miserescit, hic uero

nullius; ille enim talionem pati uult eum, cui irascitur, hic uero, non esse. Ex his igitur perspicuum est, licere inimicos, & amicos, & qui sunt, demonstrare, & qui non sunt, efficere, & qui esse dicuntur, dissociare, & eos qui aut propter iram, aut propter inimicitias controuersantur, ad uitram constituerimus partem traducere.

De metu, & fidentia.

CVIVSMODI uero res metuant, & quos, & quo modo affecti, hoc modo planum erit. Sit ergo metus molestia quædam, aut perturbatio ex phantasia futuri mali, aut interimendi uim habentis, aut molesti. neq. n. mala omnia metuuntur, ut si erit iniustus, aut tardus, sed quæcunq. aut molestias magnas afferre, aut interitus possunt; præsertim uero si non longe, sed prope esse uideantur; quæ enim longe admodum absunt, ea non metuunt; nemo est. n. qui nesciat, se moriturum, sed quia non propediem curam non suscipit. Si ergo metus hoc est, ea metuenda sunt, necesse est, quæ uim magnam habere uidentur interimendi, aut detrimentis illis afficiendi, quæ molestiam magnam exhibeant. itaque & rerum eiusmodi signa sunt metuenda; prope enim uidetur esse, quod metuendum est. si quidem periculum rei metuendæ appropinquatio est. eiusmodi uero ira, & inimicitia sunt eorum, qui efficere aliquid possunt; neque enim dubium est, quin & uelint, & possint, quare parum abest, quin faciant. Et iniustitia, quæ uiribus prædita est; iniustus enim iniustus est, eo quia præligit. Et uirtus contumeliam passa, quæ uiribus prædita est; perspicuum est enim, quotiescunq. contumeliam patiatur, semper præeligere

præeligere, nunc uero posse. Et metus est eorum, qui possunt aliquid facere; in apparatu. n. et occupari necesse est illi, qui talis est. quoniã aut pleriq. improbi, & lucro obnoxii, & in periculis timidi sunt; fit, ut plerunq. metuendũ sit, ipsum in alio esse; quare qui consciũ sunt ei, qui atrox aliquid patrauit, metuendi sunt, ne aut enunciet, aut deserat. Et, qui possunt iniuriam facere, semper iis, qui possunt pati; plerunq. enim homines iniuriam faciunt, cum possunt. Et, qui iniuriam passi sunt, aut qui se passos esse arbitrantur; quia semper obseruant occasionem. Et qui iniuriam fecerunt, si uires habeant, metuendi sunt; quod timeant, ne talionem patiantur. positum est enim tale esse, quod metuendum. Et rerum earundem competitores, quarum non licet simul ambos potiri; semper enim bellum gerunt cum talibus. Et qui sunt præstantioribus, quàm ipsi sint, metuendi, & ipsi metuendi; quia facilius ipsis nocere potuerint, quàm præstantioribus. Et iis, quos præstantiores, quàm ipsi sint, metuunt, propter eandem causam. Et, qui præstantiores se sustulerunt. Et, qui infirmiores se inuaserunt; aut enim iam metuendi sunt, aut ubi creuerint. Et ex iis, qui iniuriam passi sunt, aut ex inimicis, aut ex aduersariis, non qui facile excandescunt, & libere loquuntur, sed faciles, & dissimulatores, & malitiosi; obscuri enim sunt, an propè; quare nunquã aperti, quia longe. Omnia uero quæ metuenda sunt, terribiora sunt, quæcunq. si errarint, corrigi non contingit, sed aut omnino non possunt, aut non in se, sed in aduersariis sunt. Et quorum auxilia nulla sunt, aut non facilia. Vt autem simpliciter dicam, metuenda sunt, aut ea, quæ cum aliis euenerunt,

euenerunt, aut euentura sunt, miserabilia sunt. *Ac quæ qui-
dem metuenda sint, & quæ metuant, ferme, ut ita dicam, quæ
maxima, hæc sunt.*

*Quomodo uero affecti ipsi metuant, nunc dicamus. Si er-
go metus est cum expectatione patiendi alicuius mali, quod
interimendi uim habeat, perspicuum est, neminem metuere
ex iis, qui se nihil arbitrantur passuros, neque ea, quæ se
non arbitrantur passuros, neque eos, à quibus non arbitran-
tur, neque tunc, cum non arbitrantur. Ergo illi metuant,
necesse est, qui se aliquid passuros arbitrantur, et qui ab his,
& hæc, & tunc. Passuros autem se non arbitrantur, nec qui
in magnis fortunæ prosperitatibus sunt, & esse existiman-
tur, unde illi contumeliosi, paruifacitores, audacesq. sunt.
tales autem diuitiæ, uires, amicorum copia, ac potentia red-
dunt. nec qui se iam atrocia passos arbitrantur, & ad futu-
ros euentus obriguerunt, ut qui iam tympano cruciantur. ue-
rum aliquam salutis spem subesse oportet, qua de re angan-
tur. signo est, quod metus consultare cogit, atqui nemo de re-
bus desperatis consilium capit, quare tales præparare opor-
tet, cum eos timere, commodius fuerit, nempe eiusmodi esse,
ut possint pati, quippe cum maiores alii passi sint; atq; si-
miles pati, aut passos esse ostendere, & ab iis, à quibus non
arbitrabantur, & hæc, & tunc, cum non arbitrabantur.*

*Quoniam autem perspicuum est, quid sit metus, & me-
tuenda, & quemadmodum affecti singuli timeant, ex his
etiam perspicuum est, & quid sit fidere, & cuiusmodi in re-
bus, & quemadmodum affecti confidit. fidentia enim me-
tui contraria est, et quæ fidentiam afferunt iis, quæ metum.*

Quare

Quare spes est cum phantasia rerum salutarium, ut quæ prope sint, metuendarum uero aut quæ nullæ sint, aut longe absint. Fidentiam autem afferunt & calamitates, quæ longe absunt, & fidentiam afferentia, quæ prope; & si adsint emendationes, & subsidia, aut multa, aut magna, aut utrunq. & si iniuriam neque acceperint, neque intulerint; & si competitores aut omnino nulli sint, aut uires non habeant, aut si habeant uires, amici sint, aut beneficium dederint, aut acceperint; aut si plures sint, quibus eadem conducant, aut præstantiores, aut utriq.

Ipsi uero hoc modo affecti, fidentes sunt; si sæpe rem bene gessisse neq; offendisse arbitrentur. aut si sæpe in calamitates inciderint, atque euaserint. duobus enim modis homines expertes affectus fiunt, aut quia experti non sunt, aut quia subsidia habeant; ut in periculis maris, & qui imperiti sunt tempestatis, futura confidunt, & quibus subsidia præsto sunt, propter peritiam. Et quoties ea res metum incutiat neque paribus, neque inferioribus, & quibus se arbitrantur præstare; arbitrantur autem iis, quos uicerunt, aut ipsos, aut ipsis præstantiores, aut pares. Et si plura, & maiora sibi suppetere arbitrentur, quibus qui excellunt, extimescendi sunt. hæc uero sunt pecuniarum multitudo, & robur corporum, & amicorum, & regionis, & bellicorum instrumentorum aut omnium, aut maximorum. Et si iniuriæ fecerint aut nemini, aut non multis, aut non iis, à quibus timeant. Et omnino si res diuinæ ipsis egregie se habeant, cum aliæ, tum quæ à signis, atque oraculis; fidentem enim reddit ira. at non iniuriam inferre, sed accipere ad iram incitandam

dam ualet deus autem iis, qui iniuriam patiuntur, præstare adesse existimatur. Et quoties priores impetum facientes, se aut nihil pati, neque passuros, aut rem bene gesturos arbitrentur. Ac de iis quidem, quæ metum, ac fidenciam afferrunt, dictum est.

De pudore, & impudentia.

CVIVSMODI uero rerum pudeat, & non pudeat, & apud quos, et quo modo affectos, ex his liquebit. Sit ergo pudor molestia quædam, & confusio in iis malis, quæ ad estimationis offensionem pertinere uideantur, aut præsentibus, aut præteritis, aut futuris; impudentia uero paruifactio quædam, & affectus uacuitas in his ipsis. Si igitur pudor est, quem definiuimus, ob eiusmodi mala pudere necesse est, quæ uidentur turpia esse ipsi, aut iis, quos caros habet. quales omnes actiones sunt, quæ à uitiositate proficiuntur, ut abiicere clypeum, aut fugam arripere, quia à timiditate; & fraudare deposito, quia ab iniustitia; & concumbere, quibus cum non conuenit, aut ubi non conuenit, aut quando non conuenit, quia ab intemperantia; & questum facere è rebus paruis, aut è turpibus, aut ex impotentibus, ut pauperibus, aut mortuis; unde & prouerbum: Etiam à cadauere ferre; quia à sordibus, & illiberalitate. Et non subuenire, cum possis, in pecuniam, aut parcius subuenire. Et auxilium accipere ab iis, qui minus abundant. Et mutuum petere, cum suspicio erit, ne petat. Et petere, cum, ne repetat. Et repetere, cum, ne petat. Et laudare, ut petitionis

tionis opinione afferat. Et repulsam passum, petere nihilo
secius; quia hæc omnia signa sunt illiberalitatis, laudare au-
tem presentem, adulationis. Et bona quidem laudibus ef-
ferre, mala uero deterere. Et dolentis uicem uehementer do-
lere, & reliqua eiusmodi omnia; quia adulationis sunt si-
gna. Et labores non tolerare, quos seniores, aut delicati,
aut in maiori potestate constituti, aut omnino imbecilliores
tolerant; quia omnia mollitiei sunt signa. Et ab alio bene-
ficium accipere, & sepe. Et collata beneficia exprobrare;
quia pusilli, & humilis animi signa sunt. Et de semetipso
prædicare, ac polliceri. Et aliena sibi uindicare; quia ia-
ētantiæ. Similiter uero & in unoquoq. aliorum moris uitio-
rum actiones, & signa, & similia turpia sunt, & pudenda.
Et ad hæc rerum honestarum, quarum omnes participes
sunt, aut omnes similes, aut plurimi, partem non habere. si-
miles autem dico, qui sunt eiusdem nationis, ciuitatis, etatis,
cognitionis, omnino pares; quia turpe iam pridem est, non
participem esse, ut eruditionis quadamtenus, aliarumq. re-
rum eodem modo. hæc autem omnia turpiora, si sua culpa
accidisse uideantur; sic enim iam est a uitio magis, si ipse
caussa sit rerum, quæ affuerunt, aut adsint, aut affuturæ
sint. Pudore uero afficiuntur, qui patiuntur, aut passi, aut
passuri sunt eiusmodi res, quæ ad existimationis offensione,
& probra pertineant; qualia sunt, quæ ad ministeria cor-
poris, aut operum turpium pertinent, ex quibus contume-
liæ perpeßio est. quorum quæ ad intemperantiam referun-
tur, & sua sponte, & non sua sponte suscepta, turpia sunt,
quæ uero ad uim, non sua sponte; ab ignauia enim, & timi-

ditate tolerantia, & ultionis prætermissio nascitur. Ac quarum quidem rerum homines pudeat, hæc, & eiusmodi sunt.

Quoniam autem pudor est phantasia de existimationis offensione concepta, et eius ipsius gratia, non autem rerum, quæ inde proueniunt, nemo uero existimationem curat, nisi propter eos, qui existimant: eorum pudeat, necesse est, quorum rationem habet. habet autem rationem eorum, qui suspiciunt, & à quibus suspici uult, & quibus cū de honore contendit, & quorum existimationem non contemnit. ac suspici quidem uolunt ab iis, eosque suspiciunt, qui possident bonum aliquod pretiosum, aut à quibus requirunt aliquid uehementius ex iis, quorum illi sunt domini, ut amatores de honore autem contendunt cum similibus. curant autem prudentes, ut eos, qui uera loquantur, quales sunt & senes, & eruditi. Et eorum, quæ in oculis, & quæ in aperto sunt, unde & prouerbum: In oculis hære pudorem. propterea eorum qui semper affuturi sunt, magis pudet, & eorum, qui ipsos attendunt: quia utrunque ante oculos est. Et eorum, qui non iisdem obnoxii sunt: neque enim dubium est, quin hi contraria existiment. Et qui non ignoscunt iis, quæ peccata uidentur: quæ enim aliquis ipse facit, ea in proximis haudquaquam dicitur stomachari: quare quæ non facit, profecto stomachatur. Et, qui in uulgus facile enunciant: nihil enim differt, non existimari, ac non enunciari. facile uero enunciant, qui iniuriam acceperunt, quia obseruant: & maledici, quia si & de eis, qui non peccant, multo magis de eis, qui peccant. Et, qui in proximorum peccatis occupantur,

zur, ut subsannatorum, & comicorum, quippe qui maledici quodam modo sint, & ad enunciandum parati. Et, à quibus nunquam repulsam tulerunt; perinde enim illi affecti sunt, atque ii, qui suspiciuntur. itaque eorum, qui primum aliquid petierunt, pudore afficiuntur, ut qui nondum apud eos existimationem amiserint. tales autem sunt, qui & iandiu amici esse uolunt; quia, quæ optima sunt, cōspexerunt. unde bella Euripidis ad Syracusanos responsio est. Et ex ueteribus familiaribus, qui nullius rei conscii sunt. Pudet autem non solum rerum, quas diximus, pudendarum, uerū etiam signorum. ut non solum cum Veneri dant operam, sed signorum etiam eius. neque solum, cum turpia faciunt, sed etiam, cum loquuntur. Eadem uero etiam ratione non eorum solum pudore afficiuntur, quorum diximus, uerum & eorum, qui indicaturi sunt ipsis, ut famulorum, & qui ipsis amici sunt. Eorum autem omnino nō pudet, quorum, quod ad ueritatem pertinet, existimationem contemnunt. neminem enim pudet puerorum, ac belluarum. Neq. easdem res facere, pudet notorum, atque ignotorum, sed notorum quidem, eas, quæ ad ueritatem existimantur, longinquorum uero, quæ ad opinionem.

Ipsi autem hoc modo affecti pudore afficiuntur: primum quidem, si quidam perinde se habuerint erga ipsos, ac eos diximus, quorum pudore afficiuntur. erant autem hi, aut qui suspiciuntur, aut quos suspiciunt, aut à quibus suspici uolūt, aut à quibus rem aliquam necessariam requirunt, quam, si existimationis nullius fuerint, minime impetrabunt, atque bi aut si uideant, quemadmodum Cydias de Sami colonia

dixit in concione, (petebat enim ab Atheniensibus, ut putarent, circumstare Græcos, tanquam intuentes, nedum audituros, quæ decreuissent,) aut si tales illi in propinquo sint, aut sensuri sint. itaq; cum aduersa fortuna utuntur, se à ueteribus æmulis conspici nolunt; qui enim æmulantur, suspiciunt. Et quoties habeant, quæ dedecus afferant actionibus, & negociis aut suis, aut proauorum, aut aliorum quorundam, quibus cum aliqua ipsis propinquitas intercedit, atq; eorum omnino, quorum ipsi pudore afficiuntur. cuiusmodi sunt ii, quos commemorauimus, aut qui ad ipsos referuntur, quorum præceptores, aut consilarii extiterunt. Et si sint alii similes, quibus cum de honore contendant; multa enim pudore capti propter tales homines & faciunt, et omittunt. Et si futurum est, ut aspiciantur, & cum consciis in aperto uersentur, magis etiam erubescunt. unde & Antiphon poeta, cum tympano torquendus à Dionysio esset, ac qui una morituri erant, se obnubere ex ianua egressos animaduertere, dixit: quid uos obnubitis, an ne cras uos horum aliquis uideat? Ac de pudore quidem hæc, de impudentia uero perspicuum est, fore, ut magna nobis ex contrariis copia suppetat.

De gratia.

QUIBUS autem gratiam habeant, & quas ob res, & quemadmodum se habentes, ubi gratiam definiuerimus, apparebit. Sit ergo gratia, per quā qui possidet, dicitur gratiā tribuere indigenti, non pro re aliqua, neque ut aliquid ipsi tribuenti suppetat, sed ut aliquid illi. Magna autem erit, quam

quam aut ualde indigentibus, aut magnarum rerum, aut difficultium, aut in temporibus eiusmodi, aut solus, aut primus, aut in primis. Indigentiae uero sunt appetitiones, & ex his maxime, quae cum dolore coniunctae sunt rei non suppetentis. tales autem sunt cupiditates, ut amor, & in cruciatibus corporis, & in periculis. nam iis qui in paupertate uersantur, & exiliis, etiam si parua subministrarint, propter indigentiae magnitudinem, & tempus, magnum dedisse beneficium uidentur, ut qui in Lyceo fiscellam dedit. In talia igitur officium tribuere necesse est, sin minus, in paria, aut maiora. Quare quoniam liquet, & quando, & ob quae, & quomodo se habentibus gratia tribuatur, perspicuum est, apparatum ex his esse conficiendum, ostendendo, illos aut fuisse, aut esse in tali molestia, atque indigentia constitutos, hos uero in tali necessitate eiusmodi aliquid officii tribuisse, subministrantes. Quin etiam perspicuum est, unde gratiae detrahere, & expertes gratiae reddere liceat. aut enim, quod sui causa subministrant, aut subministrarunt. (hoc autem non erat gratia,) aut quod fortuito fecerunt, aut quod coacti, aut quod reddiderunt, non dederunt, siue scientes, siue secus. nam utroque modo aliquid pro aliquo. quare ne ita quidem erit gratia. Atque in omnes categorias est intueundum. gratia enim est, aut quia hoc, aut quia tantum, aut quia tale, aut quando, aut ubi. Signum autem est, si rem minorem non subministrarunt, & si inimicis aut easdem, aut pares, aut maiores. neque enim dubium est, quin ne haec quidem nostri causa; aut si uilia sciens, nemo enim se uilibus rebus indigere confiteatur. Ac de tribuenda quidem, & non tribuenda gratia dictum sit.

De Misericordia, & Stomachatione.

Cuiusmodi uero res miserabiles sint, & quos homi-
 nes misereantur, & quomodo ipsi affecti, dicamus. Sit ergo
 misericordia molestia quædam ob malum apparens, interi-
 tus, & molestiæ afferendæ uim habens, eius, qui eo sit indi-
 gnus, quod & ipse se passurum, aut aliquem suorum expe-
 ctet, idq. quoties propinquum uideatur. perspicuum est
 enim, necesse esse, qui miseraturus est, eiusmodi esse, ut ar-
 bitretur, mali aliquid passurum aut se, aut suorum aliquem,
 & tale malum, quale in definitione, expositum est, aut simi-
 le, aut affine. itaq. neque qui funditus perdit sunt, miseri-
 cordia commouentur, quia nihil passuros se amplius arbi-
 trantur, quippe qui passi sint, neque qui se ualde beatos
 existimant, uerum contumeliam inferunt. si enim bona sup-
 petere omnia arbitrantur, profecto se mali nihil pati posse
 arbitrantur. hoc enim ex bonis est. Sunt autem eiusmodi, ut
 arbitrentur, se passuros, & qui iam passi sunt, atque euase-
 runt; & senes, tum propter prudentiam, tum propter peri-
 tiam; & imbecilli, magisq. timidiore; & eruditi, quia consi-
 derati; & qui parentes habent, aut liberos, aut uxores, sui
 enim hæc sunt, & ea quæ diximus, pati possunt; & qui neq.
 in fortitudinis affectu uersantur, ut in ira, & fidentia, quia
 hi de futuro non cogitant; neque in affectione contumeliosæ;
 quia neque hi se passuros aliquid considerant, sed inter hos
 interiecti; neque rursus qui metuunt; neque enim qui timo-
 re perculsi sunt, misericordia capiuntur, quia de se solliciti
 sunt. & si bonos omnes arbitrantur; qui enim neminem ar-
 bitrantur,

bitratur, omnes malo dignos esse arbitrabitur, omninoque quoties ita se habeat, ut recordetur, talia contigisse aut sibi, aut suis, aut speret, fore, ut aut sibi, aut suis contingant. Ac quemadmodum quidem se habentes misericordia commouentur, dictum est.

Quæ uero commiserentur, ex definitione perspicua sunt. Nam quæ ex molestis, et tristibus interimendi uim habent, miserabilia omnia sunt; & quæ perdendi uim habent; & mala magnitudine præstantia, quæ à fortuna proficiuntur. tristitiam autem, atque interitum afferunt mortes, & uerberationes, & cruciatus corporum, & senectus, & morbi, & alimentorum inopia; mala uero à fortuna profecta, inopia amicorum, paucitas amicorum; quo fit, ut ab amicis, familiaribusque diuelli, miserabile sit; turpitude, imbecillitas, debilitas. Et si unde boni aliquid suppetere conueniebat, mali aliquid contigerit, & si sæpe ita. Et si postquam passus sit, boni aliquid superuenerit, ut Diopithi, ad quem regia munera sunt missa, cum iam decessisset e uita. Et si aut nihil boni suppeditatum sit, aut suppeditatis frui non liceat. Ac quam quidem ob rem misereantur, hæc, atque eiusmodi sunt.

Misereantur autem & familiares, nisi arcta coniuncti necessitudine sint, quia erga illos æque, atque erga se ipsos passuros afficiuntur. itaque Amasis propter filium, qui ducebatur ad mortem, non lachrymauit, ut aiunt, uerum propter amicum, qui mendicabat, quia hoc est miserabile, illud atrox. atrox autem à miserabili differt, & misericordie eiiciendæ uim habet, & sæpe in contrarium ualet. Item misereantur, cum atrocitas ipsa propinqua est. Quin etiam commiserantur

miserantur similes ætate, moribus, habitibus, dignitatibus, generibus; in his enim omnibus magis elucet, etiam ipsi contingere posse; omnino enim & hic statuere oportet, quod quæcūq; sibi metuunt, hæc cum aliis eueniunt, miserantur. Quoniam autem mala, quæ propinqua uidentur, miserabilia sunt, quæ uero ad decem millia annorum eueniunt, aut euentura sunt, cum ea neque sperent, neque recordetur, aut omnino nō miserantur, aut non eodem modo, propterea qui figuris, & uocibus, & uestitu, ac deniq. actione representantur, miserabiliores sint, necesse est; faciunt enim, ut malū propinquum uideatur, ante oculos proponentes, aut tanquā futurum, aut tanquam præteritum. Et quæ modo eueniunt, aut breui euentura sunt, miserabiliora, propter eandē causam. Et signa, & actiones, & uestes eorum, qui passi sunt, & quæ sunt eiusmodi. Et uerba eorū, qui in mali perpeſſione uersantur, ut eorum, qui iam animam agunt. Et præcipue uirtutem præstare, cum in eiusmodi temporibus uersantur; hæc enim omnia, quia propinqua uidetur, magis excitant miserationem, quasi uero & ille indignus sit, & mali perpeſſio ante oculos obuersetur.

Opponitur autem ipsi miserari maxime id, quod dicimus, stomachari, quia molestiæ, quæ suscipitur ob indignas res aduersas opponitur quodammodo, & ab iisdem moribus molestia, quæ suscipitur ob res secundas indignas, & utriq. affectus bonorum morum sunt; conuenit enim, eorum, qui indigne male rem suam agunt, uicem dolere, ac miserari, ob ob eos uero, qui bene, stomachari; est enim iniustum, quod cōtra dignitatem accidit. quocirca deis stomachationem tribuimus.

buimus. Existimari etiam possit, inuidiam misericordiae eodem modo opponi, quasi uicinā, atque eīdem cum stomachatione, sed est diuersa. Est enim inuidia quoque molestia turbulenta, & propter secundas res, uerum non eius, qui sit indignus, sed qui par; ac similis. Illud autem: Non ut ipsi eueniat aliquid aliud, sed propter ipsum proximum, omnibus aequae adesse oportet: neque enim amplius erit illud quidem inuidia, hoc uero stomachatio, sed metus, si propterea molestia, ac perturbatio excitetur, quia ipsi mali aliquid ab illius prosperitate continget. Perspicuum est autem, fore, ut hos contrarii consequantur affectus; nam qui dolet ob eos, qui praeter dignitatem male rem suam gerūt, letitia afficitur, aut dolore carebit ob contrarios, qui male gerūt; ut paricidarum, & sicariorum supplicio bonus nemo doluerit; quia uoluptas ex talibus capienda est, non aliter, atque ex iis, qui pro dignitate rem suam bene gerunt. utrumque enim iustum est, & bono uiro letitiam affert. quippe qui speret necesse est, fore, ut quae simili, etiam sibi euemant. atque haec omnia eorundem morum sunt, contraria uero contrariorum; qui enim malis gaudet alienis idem, atque inuidus est. nam qui proter rei alicuius ortum, aut praesentiam dolet, hunc ob priuationem, & corruptionem eiusdem gaudere necesse est. itaque ad arcendam misericordiam ualent haec omnia. at uero propter eas causas, quas diximus, discrepant. quare aequae omnia proficiunt, ne misericordia concitetur.

Ac primum quidem de stomachatione dicamus, & quibus stomachentur, & quas ob res, & quemadmodum ipsi se habentes, deinde post haec de aliis. Atqui haec ex iis, quae

O I dicta



dicta sunt, liquent. Nam si stomachari est dolere ob eum, qui indigne rem suam bene gerere uideatur, primum quidem perspicuum est, fieri non licere, ut aliquis propter bona omnia stomachetur; nemo enim, si iustus sit, aut fortis, aut si uirtutem adeptus erit, stomachabitur ei; quia neque misercordia ob ea, quæ his contraria sunt, commouetur, sed ob diuitias, & potentiam, & eiusmodi res, quibus, ut simpliciter dicā, digni sunt boni uiri, et qui à natura bona adepti sunt, ut nobilitatem, & pulchritudinem, & quæ sunt eiusmodi. Quoniam autem antiqua prope accedunt ad naturalia, necesse est, iis, qui idem bonum possident, si paullo ante adepti sint, & propterea rem suam bene gerant, uehementius stomachari. magis enim offendunt, qui nouis potiuntur diuitiis, quàm qui antiquis, & gentilibus. similiter uero & qui magistratum gerunt, & qui potentes sunt, & qui multos habent amicos, & qui bonos liberos, & quicunque tales. et si ipsi per hæc aliud quid boni adepti sint, eodem modo. etenim tū demum magis offendunt, qui nouis potiuntur diuitiis, quàm qui ueteribus, cum propter diuitias in imperio sunt. similiterq. in ceteris. causa uero est, quia illi quidē res suas possidere existimantur, hi uero non item. quod. n. ita semper se habere uidetur, id uerum existimatur. quo fit ut alteri haudquaquam sua possidere uideantur. Et quoniam singula bona non cuiunque conueniunt, sed est proportio, & conuenientia quedam, ut speciosa arma non iusto conueniunt, sed fortis, & eximium coniugium non nouas diuitias possidentibus, uerum nobilibus; idcirco si qui bonus est, rem conuenientem non adipiscatur, mouet stomachum. & si inferior cum superiore



superiore controuersetur; ac in primis quidem, qui in eodem studio uersantur; unde & illud dictum est: Aiakis autem Telamonidae pugnam declinabat, quia Iuppiter eistomachabatur, quod cum praestantiore viro pugnaret. Siminus, etiam quocumq. modo inferior cum superiore, ut si musicus cum iusto; est enim iustitia, quam musica, praestantior. Ac quibus quidem stomachentur, & propter quae, ex his perspicuum est; haec enim, & eiusmodi sunt.

Ipsi uero stomachosi sunt, si maximis bonis digni, eaq. adepti sint; neque enim iustum est, paria non paribus impetiri; deinde uero, si cum sint boni, etiam uirtute praediti sint; quia tum recte iudicant, tum iniusta oderunt. Et si honoris studiosi, & quarundem rerum agendarum appetentes sint, & maxime in iis rebus honoris studio trahantur, quas indigni alii consequuntur. Et omnino, qui ipsi se dignos iis rebus censent, quibus alios non censent, stomachantur illis, & ob ea itaque mancipiorum similes, abiecti, & minime honoris cupidi, non sunt stomachosi; quia nihil est tale, quo se dignos esse arbitrentur. Ex his autem perspicuum est, propter quos aduersa fortuna utentes, aut male rem suam gerentes, aut quod uolunt, non assequentes, letari, aut non dolere conueniat; ex his enim, quae dicta sunt, contraria elucescunt. Quare si tales oratio indices praepararit, eos uero, qui poscunt, ut sui misereantur, & ob quae misereantur, indignos esse ostenderit, qui impetrent, dignos autem, qui non impetrent, fieri non potest, ut eis misericordia tribuatur.

De inuidia.

PERSPICVVM est etiam, quas ob res inuideant, & quibus, & quemadmodum se habentes: si quidem inuidia est molestia quaedam propter apparentem bonorum, quæ sunt commemorata, prosperitatem, aduersus similes; non ut sibi adsit aliquid, sed propter illos: etenim quibus similes aliqui sunt, aut esse uidentur, tales inuidebunt, similes autem dico genere, cognatione, ætate, habitu, et existimatione, & copiis. Et quibus parum abest, quin omnia superent. itaque qui magnas res agunt, & secunda fortuna utuntur, inuidi sunt, quia suas res ferri ab omnibus arbitrantur. Et quibus eximius ob rem aliquam honor habetur, & præcipue ob philosophiam, aut beatitudinem. Et qui honoris studio ducuntur, inuidi magis sunt, quàm qui non ducuntur. Et qui sapientiæ opinionem consecrantur; quia honoris studio ducuntur ob sapientiam. Et omnino qui gloriam in aliqua re appetunt, in ea inuidi sunt. Et pusillanimi; quia omnia magna illis esse uidentur. Bona uero, propter quæ inuidem, dicta sunt. nam quæcunque opera sunt eiusmodi, ut propter ea gloriæ cupiditate ducantur, & factis de honore contendit, et gloriâ appetant, & quæcunq. à secunda fortuna proficiuntur; ferme in omnibus uersatur inuidia, et præcipue quæ aut ipsi appetunt, aut putant conuenire, se habere, aut in quibus ipsi possessione paullo excellunt, aut paullo superantur.

Neque uero dubium est etiam, quibus inuideant, quia simul expositum est. Inuidem enim iis, qui sibi & tempore, & loco, & ætate, & existimatione proximi sunt. unde dictum

dictum est: Cognatum enim etiam inuidere scit. Et iis, quibus cum de honore concertant. concertant enim cum iis, quos diximus: cum iis autem, qui ad decem millia annorum sunt, aut erunt, aut cum mortuis, nemo: neque cum iis, qui sunt ad columnas Herculeas, neque cum iis, à quibus se uin ei suo, aut aliorum iudicio arbitrantur, neque quos se longe uincere, eodem modo, & cum his, et de rebus eiusmodi. Quamiam autem cum competitoribus, & rivalibus, & omnino eadem expetentibus de honore contendunt, fit ut his potissimum inuidere necesse sit, unde dictum est: Et Figulus figulo. Et iis, qui celeriter, quod uoluerunt, assecuti sunt, ii qui egre, aut nequaquam adepti sunt, inuident. Et iis, qui si uoti compotes fuerint, ac bene rem gesserint, ipsi dedecus suscipient. cuiusmodi & uicini sunt, & pares: perspicuum est enim, ipsorum culpa fieri, ne bonum adipiscantur. quare hoc cum dolorem afferat, inuidiam efficit. Et iis, qui aut ea habent, aut adepti sunt, quæ ipsis conueniebant, aut olim adepti fuerant. itaque seniores iunioribus. & qui magnos in eandem rem sumptus fecerunt, iis, qui exiguos, inuident. Perspicuum uero etiam est, quas ob res, & in quibus, & quemadmodum se habentes lætitia afficiantur, qui tales sunt. ut enim non habentes dolent, sic habentes ob contraria lætabuntur. Quare se ipsi probentur ita se habere, at uero qui misericordiam impetrare, aut bonum aliquod obtinere digni censentur, eiusmodi sint, quales, quos exposuimus, profecto nunquam misericordiam à principibus obtinebunt.

De æmulatione.

QVOMODO uero se habentes æmulentur, et quales res, & in quibus, hinc manifestum est. Si quidem æmulatio est molestia quædam suscepta ex eo, quod in iis, qui natura similes sunt, honorata inesse bona uideantur, quæ & ipsi consequi possint, non quod alii, sed quia non & ipsi potiantur. itaque æmulatio bona est, & bonorum uirorum, inuidia uero mala, & malorum; ille enim semet propter æmulationem accingit, ut bona adipiscatur, hic uero propter inuidiam, ne alter potiatur. Ergo illi ad æmulandum sint propensi, necesse est, qui se bonis eis dignos censent, quæ non habent; quia nemo se dignum censet iis, quæ effici non posse uidetur. itaque iuuenes, & magnanimi, tales. Et quibus talia bona suppetunt, quæ honoratis uiris digna sunt, cuiusmodi diuitiæ, & multitudo amicorum, & magistratus, & quæ sunt eiusmodi generis. tanquam, ipsis probis esse conueniat, quia ipsa probis conueniunt, bona eiusmodi æmulantur. Et ii, quos alii dignos censent. Et quorum maiores, aut cognati, aut propinqui, aut natio, aut ciuitas honore excellunt, eos in his rebus æmulantur, quia ea sibi propria esse, & dignos se arbitrantur. Quod si bona, quæ honore excellunt, æmulabilia sunt, tales & uirtutes esse necesse est, & quæcunque aliis utilitatem afferre, ac beneficium possunt, quia beneficos, & bonos honorant. Et bona, quibus frui proximi possunt, ut diuitiæ, & pulchritudo magis, quam ualeitudo.

Neque uero dubium est etiam, quinam æmulabiles sint; nam qui hæc, & eiusmodi bona possident, illi æmulidi sunt.

hæc autem sunt, quæ diximus, ut fortitudo, sapientia, magistratus. qui enim magistratum gerunt, multis bene facere possunt, imperatores, oratores, omnes, qui talia ualent. Et quibus multi esse similes uolunt, aut multi familiares, aut amici, aut quos multi admirantur, aut quos ipsi admirantur. Et quorum laudes, & encomia aut à poetis, aut ab orationum scriptoribus celebrantur. Contemnunt autem contrarios, quia emulationi contemptio aduersatur, & ipsi emulari id, quod est contemnere. qui uero ita se habent, ut aliquos ipsi, aut ipsos alii emulentur, eos procliuēs esse necesse est ad contemnendum & hos, & ob hæc, quicumque iis malis afficiuntur, quæ bonis emulabilibus aduersantur. itaq. fortunatos sæpe contemnunt, quoties fortuna potiuntur sine bonis iis, quibus honor habetur. Atque ex quibus quidem affectus, aut excitentur, aut sedentur, unde fides proficiuntur, dictum est.

De moribus auditorum.

QVALES autem moribus sint pro affectibus, & habitibus, & etatibus, & fortunis, post hæc persequamur. dico autem affectus, iram, cupiditatem, & eiusmodi, de quibus supra differuimus; habitus autem uitia, & uirtutes, de quibus dictum est etiam ante, & quales res præeligan singuli, & quales agant; etates autem sunt iuuetus, uigor, & senectus; fortunam autem uoco nobilitatem, & diuitias, & potentiam, & quæ his contraria sunt, & omnino prosperam, aduersamq. fortunam.

De moribus ætatum.

Ac iuuenes quidem moribus cupidi, & ad ea, quæ concupierint, conficienda parati sunt, & ex corporeis cupiditatibus Venereis potissimum dediti, earumq. impotentes sunt, inconstantes autem, & rerum concupitarum fastidiosi. Et ualde quidem concupiscunt, sed protinus cōquiescunt; quia acutas habent uoluntates, & non magnas, quales sunt ægro tantum sites, ac fames. Et ad excandescentiam, acutamq. excandescentiam proclines, ad eumq. impetum sequendum parati, atque iræ obnoxii; quia propter honoris desiderium se parui fieri pati non possunt, uerum egre ferunt, si sibi fieri iniuriam arbitrentur. Et honoris cupidi sunt, immo potius uictoriæ; quia iuuentus excellentiam appetit, uictoria uero est excellentia quedam, atque harum rerum ambarū potius, quàm pecuniarum sunt studiosi, pecuniarum uero studiosi minimum, propterea quia indigentiam non dū sunt experti, quale est Pittaci dictum in Amphiaraum. Neq; malis moribus præditi sunt, sed bonis; quia nondum multa flagitia cognouerunt. Et creduli; quia nondum sæpe decēpti sunt. Et bona spe pleni; quia ut temulenti, sic iuuenes natura calidi sunt. simul etiam, quia nondum sæpe opinione lapsi sunt, magnaq. ex parte spe uiuunt; spes enim est futuræ, memoria uero præteritæ, iuuenibus autem futuri est multum, præteriti uero parum; primis enim diebus nihil se meminisse, sperare uero omnia arbitrantur. Et facile decipi possunt, propter eandem rationem, quia facile sperant. Et fortiores sunt, quia iracundi, & bona spe pleni, quorum illud efficit,

efficit, ne metuant, hoc uero, ut confidant. neq; enim quisquē,
dum irascitur, timet. & sperare boni aliquid fidentiū affert.
Et uerecundi; quia nondum honesta alia esse existimant, ue-
rum à lege sola sunt instituti. Et magnanimi; quia nondum
à uita depreſsi sunt, sed rerum necessariorum rudes sunt, et
se ipsum rebus magnis dignum censere magnanimi est. id au-
tem bene sperantis est. Et honesta facere, quàm utilia ma-
lunt; quia moribus potius, quàm ratiocinatione uiuunt. est
autem ratiocinatio utilitatis, uirtus honestatis. Et ami-
corum, ac sodalium studiosi magis, quàm aliæ ætates;
quia conuietui gaudent, & nihil utilitate metiuntur; quare
neque amicos. Et omnia in maius, ac uehementius, contra
Chilonium præceptum, delinquent; quia omnia agunt nimis;
si quidem & amant nimis, & oderunt nimis, & reliqua om-
nia eodem modo; quippe qui & scire se omnia opinantur, &
asseuerant; quæ causa est, ut omnia etiam nimium agant,
& iniurias faciant ad contumeliam, non ad malitiam. Et
misericordes sunt; quia omnes bonos, ac meliores existimant;
si quidem sua innocentia alios metiuntur, quare indigna il-
los pati arbitrantur. Et risu delectantur; itaq; faceti. face-
tiæ uero erudita contumelia est. Ac iuuenum quidem mo-
res eiusmodi sunt.

Seniores autem, & qui uigorem remiserunt, ex iis fer-
me, quæ his contraria sunt, magna ex parte mores adepti
sunt. Etenim quia multos annos uixerunt, & multis in re-
bus decepti, lapsiq; sunt, & res maiore ex parte perditæ
sunt, nihil affirmant, atque omnia multo minus, quàm oportet.
Et opinantur, nihil uero sciunt. Et cū controuersantur,

P I addunt

addunt semper: forsan, & fortasse, atque omnia ita pronunciant, asseuerâter uero nihil. Et malorum morum sunt, quod est omnia in deteriorem partem interpretari. Præterea uero suspiciosi sunt, propter incredulitatem, increduli uero, propter peritiam. Neque ualde amant, neque ualde oderunt, propter hanc rationem, sed ex præcepto Biantis, & amant, tanquàm osuri, & oderunt, tanquàm amaturi. Et pusillanimi; quia à uita depressi sunt; nihil enim magni, nihil eximii, sed ea, quæ ad uitam pertinent, concupiscunt. Et illiberales; quia patrimonium est ex rebus necessariis una. simul uero etiam propter peritiam, quàm sit difficile adquirere, & facile amutare, non ignorant. Et timidi, & omnia præmetuentes; quia, contra ac iuuenes, sunt affecti: quippe qui refrigerati sint, illi uero calidi. quare senectus aditum timiditati patefecit. est enim timor refrigeratio quedam. Et uitæ cupidi, in extremis potissimum diebus; quia cupiditas est rei, quæ abest; & cuius rei indigentes sunt, eam potissimum concupiscunt. Et obiurgationibus delectantur magis, quàm conuenit; est enim pusillanimitas & hæc quedam. Et ad utilitatem, non autem ad honestatem uiuunt magis, quàm conuenit; quia se ipsos diligunt. utile enim bonum est huic, honestum autem, simpliciter. Et inuerecundi potius, quàm uerecundi; quia enim non curant honestatem æque, ac utilitatem, paruifaciunt, quid existimetur. Et mala spe pleni, propter peritiam; quia plerunque res perditæ sunt, & in deteriorem partem plerunque cadunt, & præterea, propter timiditatem. Et memoria magis, quàm spe uiuunt; nam quod uitæ restat, modicum, quod effluxit, multum est;

est; spes autem est futuri, memoria uero prætiorum, id quod eis loquacitatis etiam causam affert; quia res prætēritas narrant; dum enim recordantur, uoluptate afficiuntur.

Ac excalescentiæ quidem acutæ sunt, sed imbecillæ, & cupiditates aliæ defecerunt, aliæ sunt imbecillæ. quare neque cupidi sunt, neque ad ea facienda parati, ad quæ à cupiditatibus adducuntur, sed ad ea, ad quæ à lucro. itaque tales temperati uidentur; quia cupiditates oblaquerunt. Et lucro inserviunt. Et ratiocinatione potius uiuunt, quàm moribus; est enim ratiocinatio utilitatis, mores autem uirtutis. Et iniurias ad malitiam, non ad contumeliam faciunt. Misericordes autem etiam senes sunt, uerum non propter eandem causam, ac iuuenes; illi enim propter humanitatem, hi uero propter imbecillitatem. putant enim omnia sibi uicina esse ad patiendum. id quod erat misericordis. Vnde queruli sunt. Et neque faceti, neque ridiculorum studiosi; quia querulus aduersatur ei, qui delectatur risu. Ac iuuenum quidem, & senum mores, eiusmodi. Quare quoniam omnes eas accipiunt orationes, quæ suis moribus cōuenienter habentur, & eos, qui sibi similes sunt, non est obscurum, quæadmodum tractandis orationibus tales & ipsi, & orationes uideantur.

Qui uero urgent, profecto inter hos interiecti moribus erunt, utrorumque exuperatione detracta, quippe qui neque nimis confidunt; quia audacia tale aliquid est, neque nimium metuunt, sed in utraque re commode se gerunt. Neque omnibus fidem habent, neque omnibus non habent, uerum ex ueritate potius iudicant. Et neque ad solam honestatem uiuunt, neque ad utilitatem, sed ad utrumque. Et neque ad parsimo-

niam, neque ad luxuriam, sed ad id, quod conuenit. similiter uero etiam ad exccandescentiam, & ad cupiditatem. Et temperantes cum fortitudine, & fortes cum temperantia sunt; quia hæc in iuuenibus, senibusq. partita sunt; siquidem iuuenes fortes, & intemperantes sunt, seniores autem temperantes, & timidi. Vt autem in uniuersum complectar, quæcunque commoda iuuentus, & senectus inter se diuiserunt, hæc ambo retinent, in quibus uero exuperant, aut deficiunt, eorum quod moderatum est, & conueniens. Viget autem corpus à triginta annis usque ad triginta quinque, animus uero circiter annum quadragesimum nonum. Ac de iuuentute quidem, & senectute, & uigore, cuiusmodi moribus prædite singule sint, tam multa dicta sint.

De moribus fortunatorum.

DE BONIS autem, quæ à fortuna proficiuntur, quæcunque accidit, ut et hominum mores cuiusdammodi reddant, deinceps dicamus. Ac nobilitatis quidē mores sunt, ut qui eam adeptus est, honoris cupidior sit; siquidem omnes cum suppetit aliquid, id accumulare consueuerunt, nobilitas aut maiorum dignitas est; & ut ad contemnendos propensus sit etiam eos, qui maioribus suis similes sunt; propterea quia remotæ hæc magis, quàm propinqua dignitatem afferunt, & ad gloriandum idonea sunt. Nobilitas uero in uirtute generis posita est, generositas autem in eo, ne à natura desciscat. quod plerunque non contingit nobilibus, uerum abiecti pleriq. sunt. est enim in familiis prouentus uirorum quidam, perinde

perinde ac in iis, quæ nascuntur in agris. & nonnunquam si bonum genus sit, uiri præstantes exoriuntur, deinde rursus retrofertur. familie uero, quæ subtili ingenio præditæ sunt, ad mores insanores deficiunt, ut qui ab Alcibiade, & Dionysio superiore profecti sunt, quæ uero stabili, ad stoliditatem, atq; segnitiem, ut qui à Cimone, & Pericle, et Socrate.

Diuitias uero qui mores sequantur, promptum est omnibus ad uidendum; sunt enim contumeliosi, & contumaces, nempe à possessione diuitiarum aliquid passi; perinde enim affecti sunt, ac si bonis omnibus affluent. siquidem diuitiæ quasi pretium quoddam æstimationis rerum aliarum sunt. quocirca uenalia omnia ipsarum esse uidentur. Et delicati, & arrogantes: delicati quidem propter delicias, et beatitudinis ostentationem; arrogantes autem, & elati; quia omnes in iis rebus occupari soliti sunt, quarum ipsi amore, atque admiratione ducuntur; & quia alios eadem æmulari opinantur, quæ & ipsi, simul uero merito ita quoque animati sunt, quia multi sunt, qui habentium indigent. unde & illud dictum Simonidis de sapientibus, & diuitibus ad Hieronis coniugem extat, rogantem, utrum melius esset, diuitem esse, an sapientem; diuitem respondisse; sapientes enim dixit, se diuitum foribus hærentes uidere: & quia se dignos esse imperio arbitrantur. atque, ut summatim dicam, dementis beati morum diuitiæ sunt. Differunt autem mores eorum, qui nouis fruuntur diuitiis, & eorum, qui antiquis; quia omnibus malis, iisq; grauioribus cumulati sunt magis, qui nouis. nam nouas diuitias possidere est quasi rudem diuitiarum esse; & iniurias inferunt non malitiæ, sed partim contumeliæ, partim

rim incōtinentiæ plenas, ut in uerberationem, et adulteriū.

Eodem uero modo etiam de potentia, mores ferè pleriq. sunt manifesti. nam potentes partim eisdem præditi sunt, ac diuites, partim uero etiam melioribus. sunt enim potentes honoris audiores, & moribus uiriliores, quàm diuites; quia ea affectant negotia, quæ ipsis administrare propter potentiam licet. Et studio magis dediti; quia in sedulitate sunt totti, quòd quæ ad potentiam pertinent, considerare coguntur. Et grandiores, quàm grauiores; quia conspicuos eos dignitas reddit. itaq. moderate se gerunt. granditas autem mollis, et elegans grauitas est. Et si iniuriam faciunt, non paruam, sed magnam faciunt.

Fortunæ uero prosperitas mores habet earum rerum, quas exposuimus, partes; ad hæc enim referuntur, quæ maximæ fortunæ prosperitates existimantur. & præterea secunda fortuna facit, ut meliore conditione simus in iis, quæ ad liberorum probitatem, & ad bona corporis pertinent. Ac superbiores quidem, & inconsideratiores sunt, propter fortunæ prosperitatem. Vni autem illi optimi mores fortunam sequuntur, quòd deos colunt, & erga diuinum numen aliquo modo affecti sunt, fidem habentes, propter ea bona, quæ à fortuna suppeditantur. Ac de moribus quidem etati, & fortunæ conuenientibus dictum est quæ enim expositis rebus contraria sunt, ex contrariis elucescunt, ut pauperis mores, & infortunati, & impotentis.

Quoniam autem usus orationum ad persuadendum ap-
positarum ad iudiciū refertur, (quæ enim nouimus, ac iudicamus, de his nihil amplius oratione est opus) refertur
autem

autem, siue apud unum aliquis uerba faciens adhortetur, aut dehortetur, ut faciunt, qui admonent, aut qui suadent, (nihil enim secius indicator est unus; quia quem persuadere oportet, hic, ut simpliciter dicam, est indicator,) siue aduersus controuersantem, siue ad hypothesim aliquis dicat, eodem modo; quia orationem adhibere necesse est, contrariaq. labefactare, aduersus quæ, ut aduersus controuersantem, uerba facere oportet. eodemq. modo etiam in demonstratiuis; quia oratio ad spectatorem, tanquam ad iudicatorem est instituta. omnino autem solus, & simpliciter indicator is est, qui in ciuilibus contentionibus ea, quæ controuersa sunt, iudicat; quia quæ in controuersiam, & quæ in deliberationem uocantur, quomodo se habent, quærentur. De moribus autem rerum publicarum supra in deliberatiuis est disputatum. Quare explicatum est, & quomodo, & per quæ moratas orationes efficiamus.

De propositionibus communibus possibilis, et impossibilis, facti, & non facti, futuri & non futuri, magni, & parui.

QVONIAM autem in unoquoq. genere orationum finis quidam diuersus erat, de his autem omnibus opiniones, propositionesq. paratæ sunt, ex quibus & suadendo, & demonstrando, & controuersando fides ducant, itemq. & unde moratas reddere liceat orationes, est explicatum, reliquum est iam, ut de communibus persequamur. Est enim omnibus necessarium, ut propositiones possibilis, impossibilisq. ad dicendum

dicendum adhibeant, itemq. ut alii futurum, alii factum esse, demonstrare conentur, præterea uero magnitudinis ratio omnium est orationum communis; quia amplificatione, & imminutione omnes utuntur, & qui suadent, aut dissuadent, & qui laudant, aut uituperant, & qui accusant, aut defendunt. His autem explicatis, dabimus operam, ut de enchymematibus, atque exemplis communiter exponamus, se quid habemus, ut reliquis adiectis, id, quod à principio proposuimus, absoluamus. Ex communibus autem amplificatio demonstratiuis aptissima est, quemadmodum diximus, factum autem iudicialibus. de enim his iudicium est, possibile autem, & futurum deliberatiuis.

Ac primum quidem de possibilibus, & impossibilibus differamus. Si igitur cōtrarium est eiusmodi, ut aut esse, aut factum esse possit, etiam contrarium eiusmodi esse existimabitur. ut si fieri potest, ut homo conualuerit, etiam, ut ægrotauerit. contrariorum enim quatenus contraria sunt, uis eadem est. Et si simile fieri potest, etiam simile. Et si quod difficilius est, fieri potest, etiam quod facilius. Et si fieri potest, ut uirtute præditus, aut pulcher fuerit, etiam ut omnino fuerit, fieri potest; quia difficilius est, ut pulchra sit domus, quàm ut domus. Et cuius principium fuisse potest, etiam finis. nihil enim fit, neque fieri incipit eorum, quæ fieri nequeunt. ut diametron esse symmetron, neque fieri inciperet, neque fit. Et cuius finis esse potest, etiam principium, nempe quia omnia à principio oriuntur. Et si quod essentia, aut origine posterius est, fuisse potest, etiam quod prius. ut si uirum fuisse fieri potest, etiam puerum; prius enim illud fit.

& si

Et, si puerum, etiam uirum; quia illud principium est. Et quorum amor, aut cupiditas est natura; quia plerunq. fit, ut nemo amet, aut concupiscat ea, quæ fieri non possunt. Et quarum rerum scientiæ, & artes sunt, etiam ut illæ sint, & fuerint, fieri potest. Et quarum rerum principium originis in iis est, quæ nos coegerimus, aut persuaferimus. hæc uero sunt quibus præstantiores, aut domini, aut amici sumus. Et quorum partes esse possunt, etiam totum. Et quorum totum esse potest, plerunq. etiam partes. si enim obstrangulum, & ligula, & solea fieri possunt, etiam calcei fieri possunt. & si calcei fieri possunt, etiam obstrangulum, & ligula, & solea. Et, si totum genus eorum, quæ fieri possunt, etiam species. Et, si species, etiam genus. ut si nauis fuisse potest, etiam triremis, et si triremis, etiam nauis. Et, si alterum eorum, quæ naturam habent, ut inter se conferantur, etiam alterum. ut si duplum, etiam dimidium; & si dimidium, etiam duplū. Et, si sine arte, aut apparatu factum fuisse aliquid potest, magis per artem, ac diligentiam potest. unde & Agathon dixit: Atqui alia fortuna facere, alia uero necessitate, & arte nobis suppetunt. Et, si à deterioribus, aut inferioribus, aut imprudentioribus fieri potest, magis etiam à contrariis; quemadmodum etiam Isocrates dixit, graue esse, si Euthynus didicit, ipse uero nō potuit inuenire. De impossibilibus autem, ex contrariis eorum, quæ diximus, suppetere manifestum est.

Factum uero, an non factū sit, ex his perscrutari oportet. Primum enim, si quod minus naturam habet, ut fiat, factum est, etiam factum est, quod magis. Et si quod posterius

solutum est fieri, factum est, etiam quod prius, factum est. ut si oblitus est, etiam aliquando id didicit. Et si potuit, ac uoluit, fecit; qui. n. cū possint, uolūt, faciunt, quia nihil impedimenti habent. Item, si uoluit, & nihil extrinsecus impedit. Et, si fieri potest, & iratus fuit. Et, si potuit, ac cōcupiuit. plerunq. enim, quæ appetunt, si possunt, etiam faciunt, improbi quidem propter intemperantiam, probi uero, quia proba discipiunt. Et si futurum fuit, ut fieret, ac faceret; etenim qui facturus fuit, fecisse uerisimile est. Et, si facta sunt quæcunq. ante illud, aut illius gratia nata sunt, ut si fulsit, etiam intonuit, & si tentauit, etiam effecit. Et si quæcunq. naturam habent, ut posterius fiant, aut id, cuius gratia fiunt, factum est, etiam quod prius, & huius est gratia, factum est. ut si intonuit, etiam fulsit, & si effecit, etiam tentauit. horum autem omnium alia ex necessitate, alia plerunq. ita sunt. De non facto uero, manifestum est, ex contrariis eorum, quæ dicta sunt, peti.

Quin etiam de futuro, ex iisdem liquet. Nam & quod in potestate, ac uoluntate est, erit. Et quæ in cupiditate, & ira, & ratiocinatione cum potestate sunt. Propterea & si in impetu faciendi sit, aut in eo, ut facturus sit, erit. plerunq. enim magis fiunt, quæ futura, quam quæ non futura. Et, si quæcunq. naturam habent, ut prius fiant, antecesserunt; ut si nubilatum est, uerisimile est, pluiturum. Et, si quod huius est gratia, factum est, etiam hoc factum esse, uerisimile est; ut si fundamentum, domus.

De magnitudine autem rerum, ac paruitate, & maiori, ac minori, & omnino magnis, ac paruis ex iis, quæ à nobis ante

ante dicta sunt, perspicui potest. dictum est autem in deliberatiuis de magnitudine bonorum, & de maiori simpliciter, ac minori. quare quoniam in singulis orationibus propositus finis, bonum est, ut utile, & honestum, & iustum, non est dubium, quin ex illis amplificationes sint ab omnibus assumenda. nam si quis præter hæc aliquid de magnitudine simpliciter, & excellentia quærat, inanem disputationem instituat: siquidem ad rerum usum ualent magis res singulares uniuersalibus. Ac de possibili quidem, & impossibili, & utrū factum sit, an non factum, & erit, an non erit, præterea uero de magnitudine rerum, ac paruitate, hæc dicta sint.

De exemplis, quot, & cuiusmodi sint.

RELIQVVM est, ut fides, quæ communes sunt omnibus exponamus, posteaquam de propriis disseruimus. sunt autem communes fides genere duæ, exemplum, et enthymema: quia sententia pars enthymematis est. Ac primum quidem de exemplo dicamus. est enim inductioni simile exemplum, induction uero principium. Exemplorum autem duo genera sunt. siquidem unum exempli genus est, res ante gestas exponere, alterum uero, ipsum confingere. huius autem una est parabola, altera logi, ut Aesopici, & Lybici. Est autem exemplum tale aliquid, ut si quis diceret, bellum aduersus regem apparandum esse, neque, ut Aegyptum in potestatem redigat, patiendum: etenim Darius quondam non prius traiecit, quam Aegyptum occupauit; ubi uero occupauit, traiecit. iterum Xerxes non ante irruptionem fecit, quam oc-

cupauit; ubi uero occupauit, traiecit. quare & hic, si occupa-
uerit, traiciet, quare non permittendum. Parabola uero, di-
cta Socratica. ut, si quis diceret, magistratus forte creari nō
oportere; quia simile est, atque si quis athletas sortiatur, non
qui in decertando ualeant, sed cui forte obtigerit. aut ex nau-
tis sortiatur, quem nam gubernare oporteat; quasi uero
conueniat, cui forte obtigerit, non qui peritus sit, gubernare.
Locus uero, qualis est Stesichori aduersus Phalarim, &
Æsopi de duce populari. Stesichorus enim cum Himeren-
ses Phalarim ducem cum summo imperio delegissent, atque
ei tradituri custodes corporis essent, cum alia differuisset,
logum hunc rettulit. Equus pratum solus olim tenebat. cum
autem ceruus superueniens pabulum dissiparet, cerui ulci-
scendi cupidus, hominem percontatus est, an cum eo pœnam
de ceruo sumere posset? ille uero asseruit, si modo frenum
accepisset, & ipse in illum, tenens iacula, conscendisset. ubi
uero ille conditionē accepit, et hic ascēdit, pro pœna, quā pe-
tebat, confestim homini seruiuit, sic & uos, inquit, uidete, ne
dū hostes ulcisci cupitis, idē, atq. equus, patiamini, frenū. n.
iam habetis, cum ducem cum summo imperio delegeritis.
at uero si custodes tradetis, & conscendere permittetis, proti-
nus Phalaridi seruietis. Æsopus autem in Samo cum po-
puli ducem de capite caussam dicentem defenderet, dixit;
uulpem, dum flumen traiceret, in uoraginem decidisse, cūq.
emergere non posset, conflictatam diu esse, & caninas mu-
scas ei complures adhæsisse, herinaceum uero errabundum,
ut eam conspexit, misericordia captum, rogasse, num cani-
nas inde abigeret, illamq. non permisisse. uerum cum ille
causam

causam quæreret, respondisse, quia hæc iam plenæ mei sunt, & parum sanguinis exugunt; quod si has abegeris, famelicæ aliæ succedentes reliquum sanguinis mei exhaurient. quamobrem et uobis, inquit, o uiri Samii, hic quidē nihil amplius nocet, quia diues est, sin autem hunc necaueritis, succedent alii pauperes, qui publica depeculando ea uobis dilapidabunt. Logi autem concionum sunt, atque hoc boni habent, quod res gestæ similes ad inueniendum difficiles sunt, logi uero faciliores, (fingere enim ita, ut etiam parabolas cōuenit) modo aliquis simile perspicere possit. quod ex philosophia commodius est. Ac logi quidē paratu faciliores sunt, facta uero ad deliberationes utiliora, quia futura præteritis plerunq. similia sunt. Ceterum exempla, tanquā demonstrationes, adhibere, qui non habet enthymemata, debet, quia per hæc fides fit, qui uero habet, tanquam testimonia, post enthymema subiicere. etenim præposita inductioni similia sunt, oratoriis autem inductio non est, nisi paucis in locis, accommodata: subiecta uero, testimoniis, testis autem ubicunq. idoneus. quocirca præponentem commemorare multa necesse est, subiicienti uero unum etiam satis; quia testis idoneus proficit etiam unus. Ac quot quidem genera exemplorum sint, & quo modo ipsis, & quando utendum sit, dictum est.

De sententijs, quid, quàm multæ, & quomodo inuestigandæ sint.

DE sententijs uero dicendis, exposito, quid sententia sit, maxime etiam & cuiusmodi de rebus, & quando, et quibus
sententias

sententias dicere in orationibus conueniat, apparebit. Est autem sententia pronunciatum, nō quidem de singularibus, ut qualisnam Iphicrates sit, uerum uniuersalibus, neque de uniuersalibus omnibus, ut quod rectum curuo contrarium, sed de iis, quorum actiones sunt, eaq., quæ persequimur, aut fugimus, ad agendum. quare quoniam enthymema ferme syllogismus est, ex rebus huiusmodi constitutus, & conclusiones enthymematum, & principia, detracto syllogismo, sententiæ sunt, hoc pacto: Quicumq. prudens est, haudquaquā filios suos ad eximiam erudire sapientiam debet. hæc quidē sententia est, caussa uero adiecta, cur ita sit, totum est enthymema, hoc modo: Quia præter aliam ignauiam, infestam ciuium inuidiam sibi parant. & illud: Nemo ex omni parte beatus est. item: Nemo hominum liber est. sententia; cum eo uero, quod sequitur, enthymema: Aut enim pecuniæ seruit, aut fortunæ. Si igitur sententia est id, quod diximus, sententiarum genera quattuor sint, necesse est. aut enim erunt cum subiectione rationis, aut sine subiectione rationis. ac quæcunq. quidem cōfirmationem desiderant, sunt quæ incredibile, aut controuersum aliquid continent. quæcūq. uero incredibile nihil, sine subiectione rationis. Harum autē alias quidem, quia ante cognitæ sunt, nihil rationis indigere, necesse est, hoc pacto: Viro valere optimum est, ut ego quidem opinor. ita enim plerisq. uidetur; alias uero, simul dum proferuntur, iis, qui aciem intenderint, innotescere: ut: Nemo amator est, qui perpetuo non amet. Quæ uero subiectam rationem habent, aliæ enthymematis pars sunt, ut: Quicumque prudens est, aliæ enthymematicæ quidem, sed non pars enthyme-

enthymematis. quæ in primis quoque probantur. hæc uero sunt, in quibus causa rei, quæ dicitur, extat. ut in hoc: Immortalem iram ne serues, cum sis mortalis. quia si dicas, iram seruare non oportere, sententia est. quod uero additur: Qui est mortalis, quamobrem, aperit. Similiter uero & illud: Mortalia oportet mortalem, non mortalem immortalia sapere. Atque ex his quidem, quæ diximus, planum est, & quam multa genera sententiæ sint, & cuiusmodi in rebus unaquæq. conueniat. nam de controuersis, aut incredibilibus non sine subiectione rationis; uerum aut præponenda ratione sententiâ pro cõclusionem adhibere oportet. ut, si quis dicat: Ego igitur, quoniam neque inuideri, neque ignauum esse conuenit, censeo eruditioni operam dandam non esse. aut hac præposita priora subiicere. de iis autem, quæ incredibilia non sunt, uerum obscura, quamobrem, concinne adiicere. In eiusmodi uero Laconica quoque dicta, ænigmaticaque. cõueniunt, ut, si quis dicat, quod inter Locrenses Stesichorus usurpauit: Non oportere contumeliosos esse, ne humi cica-dæ canant. Iam uero grandiori natu sententias quidem dicere conuenit, sed de iis rebus, quarum est peritus, quia si adolescentulus sententias proferat, quemadmodum etiam si fabellas referat, indecorum; sin autem de rebus iis, quarum est imperitus, stultum, atque ab eruditione remotum. cuius rei signum idoneum est, quod agrestes homines sententias potissimum formant, facileque pronunciant. De re uero non uniuersali in uniuersum dicere, in conuestione, atque indignatione maxime conuenit, & in his, aut cum exordiris, aut postquam demonstraueris. Iam uero peruulgatæ quoque, communesque.

munefq. ſententiæ, ſi ſint utiles, uſurpandæ ſunt. nam quia communes ſunt, quaſi omnium confeſſione, recte ſe habere exiſtimantur: ut ei, qui ad pericula excipiendæ eos, qui ſacriſcium prætermiſerint, adhortatur. Augurium optimum vnum, tueri patriam. & ei, qui inferiores: Mars belli communis. & ei, qui ad tollendos inimicorum filios etiam nulla iniuria laceſſentes: Stultus, qui natos occiſo patre relinquit. Præterea uero nonnulla etiam prouerbia ſententiæ ſunt, ut prouerbium: Atticus inquilinus. Quin etiam ſententiæ aduerſus ea, quæ in ore uulgi uerſantur, proferendæ dico autem in ore uulgi uerſari, ut: Noſce te ipſum, & Nequid nimis, quoties aut mores apparituri ſint meliores, aut cum affectu animi dicitur. Eſt autem cum affectu, ſiquis ira percitus diceret: Falſum eſſe, oportere, ſe ipſum noſſe, quia ſi ſe ipſum hic noſſet, nunquam imperium poſtularet. Mores autem meliores: Non oportere, quæadmodum aiunt, amare, ut odiſſe poſſi, ſed odiſſe, ut amare. Atq; et in dicendo præelectionem indicare oportet: ſi minus, cauſam ſubiicere. exempli gratia, aut hoc modo dicendo: Oportet amare, non ut aiunt, ſed quaſi ſemper amaturum; quia inſidiatoris eſt alterum. aut hoc modo: Nequaquam mihi placet, quod dicitur, quia verus amicus, tanquam ſemper amaturus, amare debet; neque illud: Nequid nimis: quia improbos nimis odiſſe oportet. Quin etiam magnum ad dicendum; auxilium afferunt; unum quidem, propter uanitatē eorum, qui audiunt; quia lætantur, ſiquis in uniuerſum loquens, in opiniones, quas ipſi in parte habent, inciderit. Quod autem dico, hoc modo planum erit; ſimul uero et quo pacto ipſas uenari conueniat. eſt enim ſententia,

quem

quemadmodum dictum est, uniuersale pronunciatum. *Le-*
tantur aut, cum id in uniuersum profertur, quod ipsi in par-
te opinione præceptum habent. ut si quis uicinis, aut filiis
improbis uteretur, probaret, si quis diceret: Nihil est vicini-
tate molestius, aut: Nihil liberorū procreatione demētius.
quare spectare oportet, quam opinionem anteceptam ha-
beāt, deinde hoc modo de his in uniuersum effari. Atq; cū
hunc quidem sententiarum pronūciatio habere usum debet,
tum illum alterū meliorem, quia moratas reddit orationes.
Illæ autem mores habēt orationes, in quibus præelectio elu-
cet. hoc autem omnes sententiæ præstant; quia qui sententias
profert, uniuerse de rebus præeligendis enunciat. quare si
sententiæ probæ fuerint, etiam, ut qui dicit, bonis moribus
uideatur, efficiunt. Ac de sententia quidem, & quid sit, &
quot genera eius, & quo modo ipsis utendum sit, & quam
utilitatem afferant, tam multa dicta sint.

De ratione inuestigandorum enthymematum.

DE enthymematibus autem in uniuersum dicamus, quo pa-
cto inuestiganda sint, ac postea locos; quia genus horum
utriusque diuersum est. Ac enthymema quidem syllogismū
quendam esse, dictum est ante, & quo modo syllogismus, et
quid à dialecticis differat. neque enim longe, neque omnia
sumendo colligere oportet; quia illud propter longitudinem
est obscurum, hoc uero, quod manifesta dicuntur, nugatoriū.
hoc enim caussæ est, cur indocti doctis inter uulgares faci-
lius persuadeant, quemadmodum poete dicunt: Indoctos

R I

conciniores

conciniores esse, qui cum vulgo loquantur. quia illi communia, & uniuersalia dicunt, hi uero ex iis, quæ sciunt, & propinqua sunt. Quare dicere oportet non ex omnibus, quæ probantur, uerum ex definitis, nempe, aut iis, qui iudicant, aut iis, quos ipsi approbant; neque dubium illud esse, quin ita aut omnibus, aut plurimis uideatur; neque solum ex necessariis, sed etiam ex iis, quæ sunt plerumq. colligere.

Ac primum quidem constituendum est, de quo dicere, aut concludere siue civili, siue quocunq. syllogismo oportet, de eo necessario tenenda esse, quæ insunt, aut omnia, aut certe nonnulla. quia si nihil teneas, nihil colligere poteris. dico autem exempli gratia; quo modo suadere Atheniensibus possemus, ut bellum susciperent, aut secus, nisi teneremus, quæ copię illorum essent, utrum nauales, an pedestres, an utrumq. & ipsæ, quantæ, & uestigalia, quæ, aut amici, aut inimici, præterea uero quam multa bella gesserint, & quo pacto, & alia eiusmodi; & eos laudare, nisi teneremus prælium nauale ad Salaminem, aut pugnam in Marathone, aut quæ pro Heraclidis gesserunt, aut aliquid eius generis? Etenim ex iis, quæ insunt, aut inesse existimantur, honestis laudant omnes, eodemq. pacto uituperant etiam ex contrariis, considerantes, quidnam tale in ipsis insit, aut existimetur inesse, ut, quod Græcos seruitute oppresserint, et quod Aeginetas, ac Potideatas, qui ipsis aduersus barbarum socii fuerant, ac præclare se gesserant, subegerunt. & si quod aliud peccatum tale insit in eis. Eadem autem ratione & qui accusant, ac defendunt, ex iis, quæ insunt, adhibita animaduersione, accusant, ac defendunt; hoc autem de Atheniensibus,

nienſibus, an *Lacedæmoniis*, aut homine, an deo faciant, nihil intereſt; nam & qui ſuadet *Achilli*, & qui laudat, ac vituperat, & qui accuſat eum, ac defendit, ea, quæ inſunt, aut ineſſe exiſtimantur, arripere debet, ut ex his dicamus laudantes, aut vituperantes, ſiquid honeſti, aut turpis ineſt; accuſantes autem, aut defendentes, ſi quid iuſti, aut iniuſti ſuadentes autem, ſi quid utilis, aut inutilis. Similiter uero his & de re quacunq., ut de iuſtitia, bonum ne, an non bonū, ex iis, quæ iuſtitie, aut bono inſunt. Quare quoniam tum omnes in hunc modum demonſtrare uidentur, ſiue accuratius, ſiue negligentius concludant, (neque enim ex omnibus ſumunt, ſed ex iis, quæ in quaque re inſunt;) tum propter rationem, quia perſpicuum eſt, fieri non poſſe, ut aliter demonſtretur: proſecto neceſſe eſt, quemadmodum in *Topicis*, primum in quaque re ſelecta habere, quæ incidere poſſunt, & oportuniſſima ſunt. de iis autem rebus, quæ derepente fiunt, indagare eodem modo, intuendo non in ea, quæ indefinita, ſed in ea, quæ inſita ſunt, de quibus habetur oratio, & quàm plurima, eaq. rei proxima complectendo. Nam quo plura habebuntur eorum, quæ inſunt, eo facilior demonſtratio erit, quò uero propiora, eò magis propria, & minus communia. dico autem communia, laudare *Achillem*, quòd homo ſit, & quòd ex ſemideis, & quòd ad *Ilium* miles uenerit; hæc enim in aliis quoque inſunt multis. quo ſit, ut nihilomagiſ hic talis *Achillem* laudet, quàm *Diomedem*: propria uero, quæ nemini alii acciderunt, quàm *Achilli*, ut quòd interfecerit *Hectorem* *Troianorum* fortiſſimum, & *Cycnum*, qui omnes exſcendere prohibebat, cum ſauciari nequiret; &

quod maxime iuuenis, & iniuratus ad illam expeditionem profectus sit, & huius generis alia. Ac unus quidem selectiois locus, isque primus topicus hic est.

De locis enthymematum.

ENTHYMEMATVM autem elemēta dicamus, (elementum uero, & locum enthymematis idem uoco,) primum autē dicamus, de quibus necesse est dicere primum. Sunt enim enthymematum genera duo: nam alia ad demonstrandum, esse, aut non esse, apposita sunt, alia ad refutandum. eaq. inter se differunt, perinde, ac in dialecticis elenchus, & syllogismus. ad demonstrandum uero appositum enthymema est, quod colligit ex confesis, ad refutandum uero, quod inconfessa. Ac de singulis quidem utilibus, ac necessariis formis loci ferme nobis habentur; siquidem in singulis selectæ propositiones sunt; quare, quibus ex locis enthymemata de bono, aut malo, aut honesto, aut turpi, aut iusto, aut iniusto petere oporteat. quin etiam de moribus, & affectibus, & habitibus æque parati sunt nobis antea loci. Nūc uero alio modo de omnibus generatim paremus, ac differamus, adnotantes, qui ad refutandum, quiq. ad demonstrandum accommodati sint, itemq. qui sint enthymematum eorum, quæ uidentur, sed enthymemata non sunt; quia neque syllogismi. Quibus demonstratis de solutionibus, & obiectionibus explicemus, unde eas ducere aduersus enthymemata opus sit.

Vnus ergo ex iis, qui ad demonstrandum appositi sunt, locus est: A contrariis. Videndum est enim, an contrario con-

contrarium insit, refellenti quidem, an non insit, confirman-
ti uero, an insit. ut, quòd temperantia bonū, quia intemperā-
tia nocet. aut quemadmodum in *Messeniacā*: Quod si bel-
lum præsens incommodum est causa, ea corrigamus
pace, oportet. Si enim ijs, qui inuiti malefecerunt, æquum
non est irasci, neque etiam, si quis coactus bene fecerit, huic
habere gratiam decet. At si inter mortales falsis sermoni-
bus fides habetur, contra etiam putandum est, multa, quæ
fide careant, mortalibus euenire.

Alius: A similibus casibus. æque enim esse, ac non es-
se oportet. ut: Non omne quod iustum est, bonū est; alioquin
& quod iuste. ceterum iuste necari, expetendum non est.

Alius: Ab iis, quæ inter se cōferuntur. Nam si in alte-
rum cadit, ut honeste, aut iuste fecerit, in alterum, ut passus
sit. & si, ut iusserit, etiā, ut fecerit. quemadmodum publica-
nus *Diomedon* de uectigalibus: Si uobis uendere non est tur-
pe, neque nobis emere. Et, si qui passus est, honeste, aut iu-
ste passus est, etiam, qui fecit. & si qui fecit, et qui passus est.
Licet autem captionem in hoc adhibere. si enim iuste neca-
tus est, iuste passus est, at non fortasse à te. quocirca uiden-
dum est separatim, an qui passus est, pati, & qui fecit, face-
re debuerit, deinde, in utram partem conuenerit, usurpare.
nam aliquando discrepat, & nihil prohibet. quemadmodum
est in *Alcmæone Theodectis*: Matrem tuam nemone mor-
taliū oderat? Respondens aut affirmat: At hæc distincte
cōsiderare oportet. quærit uero *Alphesibæa*: quo tādē
modo? *susciptēs* dixit: Necari quidē illam decreuerunt, ve-
rum non à me necari. & quale iudicium est de *Demosthene*,
& iis,

Et iis, qui Nicanorem interfecerant. nam quia, iure interfecisse iudicati sunt, iure interfectus esse existimatus est. Et de eo, qui Thebis occisus est, de quo iudicium est constitutum, utrum morte dignus esset; quasi uero iniustum non esset, mortem asferre ei, qui iure moreretur.

Alius: A maiori Et minori, hoc pacto: Si dii non omnia sciunt, multo minus homines. est autem hoc: Si cui magis inesse debet, non inest, profecto neque cui minus. Illud autem: Proximum cadet, qui patrem etiam credit, ab eo est: Si quod minus, est, etiam quod magis, est, in utram partem demonstrare opus erit, siue esse, siue secus.

Præterea: Si neque magis, neque minus; unde dictum est: Ac pater quidem tuus amissis filiis miserandus, Oeneus autem non, qui præstantissimum Græciæ filium perdidit? Et: Si non iuste Theseus fecit, neque Alexander. Et: Si Patroclum Hector, etiam Achillem Alexander. Et: Si alij artifices non mali, neque philosophi. Et: Si imperatores non mali, quia sæpe vincuntur, neque sophistæ. Et: Si priuatus vestre gloriæ rationem habere debet, & vos Græcorum.

Alius: Ab animaduersione temporis, ut Iphicrates in ea, quam contra Harmodium: Si, prius quam facerem, à vobis statuam postulasssem, si fecisssem, concessissetis, ubi vero feci, non permitte-tis? ne igitur beneficio afficiendi promittatis, affecti vero, auferatis. Et rursus, ut Thebani Philippo aditum in Atticam patefacerent: Si prius quam opè contra Phocenses ferret, postulasset, certe promississent, profecto absurdum est, si, quia neglexit, & credidit, transire non patientur.

Alius: Ab iis, quæ ex se dicta sunt aduersus eum, qui dicit.

dicat. modus autem excellit, ut in Teucro. atque eo usus est Iphicrates aduersus Aristophontem, cum quæreret, num propter pecuniam proditurus naues esset. negante autem illo. ergo tu, inquit, cum sis Aristophon, non proderes, ego vero, qui sum Iphicrates, prodidi? Oportet autem, ut ille existimetur iniuriusior, sin minus, res ridicula uideatur, si in Aristidem accusatorem hoc aliquis proferat; uerum in exiguan fidem accusatoris. omnino enim qui accusat, melior esse uult eo, qui accusatur. hoc igitur semper est conuincendum. in uniuersum autem ineptus ille est, qui alius obiiicit, quæ ipse faciat, aut facturus esset, aut ad ea suscipienda hortatur, quæ ipse nec faciat, neque facturus esset.

Alius: A definitione, hoc modo: Daemoniū nihil aliud est, quàm aut Deus, aut Dei opus. atqui qui Dei opus esse opinatur, hic & Deos esse opinetur, necesse est. & ut Iphicrates: Qui generosissimus, optimus ē, quia in Harmodio, & Aristogitone nihil generosi fuit, priusquā aliquid generosi gesserūt. & quòd ipse propinquior erat: Quia res meæ gestæ Harmodij, & Aristogitonis reb. propinquiores sunt, quàm tuæ. & quemadmodū est in Alexandro: Cōfessuros omnes esse, parum temperatos esse illos, qui vno frui corpore haud satis haberent. & unde Socrates se iturum ad Archelaum negauit, quòd parem contumeliam esse diceret, si quis referre non posset, qui beneficium, ac qui maleficium, acceperet. siquidem omnes hi definitionem adhibentes, & quid sit, sumētes, de iis, de quibus dicūt, syllogismo cōcludūt.

Alius: Cum, quotupliciter. ut in Topicis, de ipso Recte.

Alius: A diuisione. Si trium rerū gratia omnes iniuriam faciunt, quippe aut huius, aut huius, aut huius, ac propter duas non potuit, propter tertiam aut ne ipsi quidē dicūt.

Alius:

Alius: Ab inductione. ut ex Peparrethia: Mulieres de liberis verum ubiq. discernunt, hoc enim Athenis Mantix oratori de filio disceptanti mater indicauit, hoc itē Thebis, cum Ismenias, & Stilpo contenderent, Dodonis Ismeniae filium demonstraui, propterea q. Thessalicum Ismeniae filiū esse statuerūt. & rursus ex lege Theodoc̃tis: Si ijs, qui alienos equos male curarunt, suos non tradunt, neque ijs, qui naues alienas subuerterunt, & si similis est ratio in omnibus, neque nos ijs, qui male alienam salutem defenderunt, cōmittere nostrā debemus. & ut Alcidamas; quōd sapientes ab omnibus honorantur: quia Parij Archilochū, quāuis maledicus esset, honore affecerunt, & Chij Homerum, quanuis ciuis non esset, & Mitylenæi Sapphonem, quanuis mulierem, & Lacedæmonij Chilonem in senatum legērunt, cum tamen parum studiosi humanitatis essent, & Itali Pythagoram, & Lampfaceni Anaxagoram, quanuis peregrinum, sepulchro decorarunt, atque in hunc vsque diem honorant, & Athenienses Solonis legibus vtētes beati fuerunt, & Lacedæmonij Lycurgi; & Thebis simul atque philosophiæ studio se præsides tradiderunt, beata ciuitas illa fuit.

Alius: A iudicio de eadem re, aut simili, aut contraria, præsertim uero si omnes, & semper, sin minus, at saltem plurimi, aut sapientes, aut omnes, aut plurimi, aut boni, aut si ipsi iudices, aut ii, qui à iudicibus approbantur, aut ii, contra quos iudicare non licet, ut dominos, aut contra quos iudicare honestum non est, ut deos, aut patrem, aut præceptores, quemadmodum in Mexidemidem dixit Autocles: Si Seueris deabus in Areopago iudicium pati honestū fuit, Mexidemidi vero nequaquā. aut quemadmodū Sappho: Mori malum esse, quia dii ita censuerunt, alioquin mortui essent. aut quemadmodum Aristippus aduersus Platonē
nescio

nescio quid, ut rebatur, iactantius proficiente. Atqui sodalis noster, inquit, nihil tale, Socratem innuens. & Hegisippus Delphis deum consuluit, cum antea Olympiæ sciscitatus esset, an eiusdem ipse, cuius pater, sententiæ esset? quasi uero turpe esset, contraria respondere. & Helenam, ut scripsit Isocrates, uirtute præstitisse, quia Theseus ita iudicauit. ite Alexandræ: quia deæ iudicem asciuerunt. & Euagorâ, ut inquit Isocrates, quia Conon aduersa fortuna iactatus, omnibus alijs posthabitis se contulit ad Euagoram.

Alius: A partibus. quemadmodum in Topicis: Quinam motus est anima? aut enim hic, aut ille. exemplum ex Socratis Theodecte petatur: Quod templum violauit? quos deos non coluit, quos ciuitas asciuerit?

Alius, quoniam plurimis in rebus usuuenit, ut eas boni, & mali aliquid consequatur. A consequentibus adhortari, aut dehortari, & accusare, aut defendere, & laudare, aut uituperare. exempli gratia, eruditionem mali illud sequitur, ut inuideatur, boni uero illud, ut sapiens sit: Non ergo eruditioni operam dare oportet, ne inuideamur. Ergo eruditioni operam dare oportet, ut sapientes simus. Atq; hic locus Callippi ars est, possibili, atque aliis assumptis, ut dictum est.

Alius: Quoties duabus de rebus, iisq. oppositis aut adhortari, aut dehortari conueniat, ad utraq. eum quoque, cuius modo mentionem fecimus, modum asferre. differt tamen, quòd ibi quæcunq. res opponantur, hic uero contrariæ, ut sacerdos quædam filium cum populo agere non sinebat. quia, inquit, si iusta dixeris, in hominû offensionem incurres, si iniusta, in deorum. Immo uero cum populo agere debes, quia, si iusta dixeris, deorum tibi amorem conciliabis,

S I si iniusta,

si iniusta, hominum. Hoc autem idem ualet, atque id, quod dicitur: Oleum, & salem emere. & hæc est *παλιδωσις*; quando duorum contrariorum utrique boni, et mali aliquid ita consequens est, ut utraque utrisque contraria sint.

Alius: Quoniam non easdem res palam, atque occulte laudant, sed palam quidem iustas, atque honestas summis laudibus efferunt, priuatim uero utiles anteponunt, ex his alteram pro uirili colligere. atq; hic locus inter eos, qui contra opinionem proferuntur, est potentissimus.

Alius: Ab eo, quod res ex proportionem contingant. ut Iphicrates, cum filium suum, natu minorem, quod magnus esset, publicum obire munus cogerent, dixit: Si magnos pueros pro uiris accipiunt, profecto paruos viros pueros esse constituent. & Theodectes in lege: Si mercenarios milites, ut Strabacæ & Charidemum probitatis ergo in ciuitatem accipitis, non ne mercenarios, qui res nefarias commiserunt, è ciuitate pelletis?

Alius: Si quod contingit est idem, etiam ea, ex quibus contingit, eadem esse. ut dixit Xenophanes, pari impietate præditos esse, qui natos deos dicunt, ac, qui mortem obire; quia utroque modo contingit, ut aliquo tempore non sint dii. Et omnino quod ex utroque contingit, sumere pro eo, ac si idem sit semper. Estis autem non de Socrate iudicaturi, verum de professione, utrum operam dare philosophia cōueniat. item: Terram, atq; aquam dare, est feruitutē feruire: itē: Communis pacis participes fieri est imperata facere. Sumendum est autem, utrum fuerit utile.

Alius: Quod non idem semper uidetur posterius, ac prius eligant, aut contra. quale est hoc enthymema: Si fugati quodam pugnauiamus, ut resitueremur, resituti uero fugiemus,

ne depugnemus? aliquando enim constituerunt pugnare, ut manerent, aliquando uero non manere, ne depugnarent.

Alius: Cuius gratia sit, si non factum sit, huius gratia esse, aut factum esse, asserere. ut si cui quis donum daret, ut eo ablato, dolorem afferret. unde & illud dictum est: Multis dea magnas affert prosperitates, nō quod eos diligit, sed ut calamitates habeant insigniores. & illud ex *Meleagro Antiphōtis*: Nō ut ferā interficiant, sed ut testes sint Meleagri virtutis apud Græciā. & illud ex *Aiace Theodectis*: quod Diomedes Vlysem præ cæteris asciuerat, non ut ei honorem tribueret, sed ut comes se esset inferior. fieri enim potest, ut huius rei gratia fecerit.

Alius litigantibus, suadentibusq. communis: *Videre*, quæ adhortentur, ac dehortentur, & quorum gratia & agāt, & fugiant. hæc. n. sunt illa, quæ si adsint, agenda sunt, nempe, si possibile, & facile, et uile, et aut ipsis, aut amicis, aut inimicis noxam, ac damnum afferat. aut si damnum leuius sit, quàm res. Atque ab his quidem adhortantur, dehortanturq. à contrariis. ab iisdem autem his & accusant, & defendunt, ab adhortantibus quidem defendunt, à dehortantibus uero accusant. Est autem locus hic ars integra tum *Pamphili*, tum *Callippi*.

Alius: Ab iis quæ fieri existimantur illa quidem, sed fide carent. Quod in existimationem non cecidissent, si non essent, aut parum abessent. Et quod magis; quia aut ea, quæ sunt, aut quæ uerisimilia sunt, opinantur. quod si credibile, & uerisimile non est, uerum erit; neque enim quia uerisimile, & credibile sit, ita existimatur, quemadmodum *Androcles* *Pitheus* legem accusans, cum oranti sibi obstreperent,

dixit, leges legem emēdatricem desiderare; quia & pisces salem, atqui neque credibile, neque uerisimile est, qui in salso aluntur, egere sale, & oliuæ oleum: atqui alienum à fide est, unde oleum fit, ea oleo indigere.

Alius ad refutandum appositus: Repugnantia considerare, siquid repugnans sit in omnibus & temporibus, & actionibus, & sermonibus. ac separatim quidem in litigatore, hoc modo: Et ait quidem amare vos, verum cum triginta viris cōspirauit. Separatim uero in se ipso: Et ait quidē, me litibus delectari, neque tamē me iudicium ullum intentasse, potest ostendere. Separatim autem in se ipso, ac litigatore: Et hic quidem nihil vnquā mutuo dedit, ego uero multos uestrum etiam liberaui.

Alius: Hominibus, & rebus calumnia affectis, nec tamen hominum existimatione probatis, causam improbabilitatis exponere; si quidem est aliquid, propter quod uideatur, hoc modo: Mulier quædam, cū filium amplexandi gratia subiisset, uidebatur cum adolescente concumbere; causa uero exposita, calumnia dissoluta est. & quemadmodum in Aiace Theodectis, Ulysses Aiaci causam exponit, cur cum Aiace fortior sit, non tamen existimetur.

Alius: A' causa, & si extat, esse, & si non extat, nō esse. nam & causa, & id cuius est causa, simul sunt, ac sine causa nihil est. quemadmodum Leodamas in defensione sui dixit, cū Thrasylbulus obiiceret, quod in columna notatus esset in arce, uerum ipsum Trigintauires dominantibus abrafisse. at nō licuit, inquit, immo uero plus mihi Trigintauires credidissent, si gesta cū populo inimicitie extitissent.

Alius: Videre, num licuit, aut liceat alio modo commodius,

dius, quàm quemadmodum aut suadet, aut agit; satis enim liquet, si non ita se habet, non egisse: nemo enim sponte sua, ac sciens deteriora praelegit. est tamē hoc falsum; quia post sepe apparet, quemadmodum commodius agi poterat, quod prius obscurum erat.

Alius: Simul uidere, num quando gerendum aliquid sit, quod iis, quae gesta sunt, aduersetur. ut Xenophanes rogantibus Eleatis, num sacrificarent Leucotheae, atque lugerent, respondit, si deam putarent, ne lugerent, si hominem, ne sacrificarent.

Alius locus: Ab iis, in quibus peccatū est, accusare, aut defendere. ut in Carcini Medea: Sunt, qui accusent, quod liberos interfecerit: neque enim eos extare. peccauit. n. Medea, quod eos amandauit. Illa uero defendit, se non liberos, sed Iasonem interfectorum fuisse; hoc enim si praetermisisset, peccasset, si modo illud etiam alterum perpetrasset. Est autem locus hic, & forma enthymematis prior ars Theodori tota.

Alius: A nomine, ut Sophocles: Aperte σιδυρά, & ferens nomen. & ut in deorum laudibus solent dicere. & ut Conon Thrasybulum θρασύβουλον nominabat, & Herodicus Thrasymachum, semper θρασύμαχος es, & Polum, semper πῶλος es, & Draconem legislatorem, quod non hominis leges essent, sed draconis, quippe asperæ. & ut Euripidis Hecuba in Aphroditem: Et nomen deæ recte ἀφροσύνης initium. & quemadmodum Chæremion: πενέως futurae calamitatis nomen fert. Probantur autem magis quæ ad refutandum, quàm quæ ad demonstrandum idonea sunt. quia quod refutandi

tandi uim habet rerum est cōtrariarum in angusto loco collectio. quæ uero iuxta se posita sunt, auditori facilius innotescunt. ex omnibus autem & qui ad refutandum, & qui ad demonstrandum idonei sunt, syllogismis maxime perturbant quæ sunt eiusmodi, ut cum proferri incipiunt, ea prouideant, non quòd eminentia sint; quia simul & ipsi præsentes secum letantur; & quæ catenus subsequuntur, ut ea simul ac sint dicta, intelligant.

De locis adumbratorum enthymematum.

QVONIAM autem accidere potest, ut unus syllogismus sit, alter non sit quidem, sed uideatur, necesse est & enthymema unum quidem esse enthymema, alterum uero non esse, sed uideri; quia enthymema syllogismus est quidam. Loci autem eorum, quæ uidetur, enthymematum, unus est in dictione. atque huius una pars est, perinde ac in dialecticis, nullo adhibito syllogismo, extremū in modum cōclusionis afferre. Non igitur hoc, & hoc, Necesse est igitur hoc, & hoc. Et enthymematibus contorte, oppositeq. differere, enthymema uidetur; quia eiusmodi dictio campus est enthymematis. tale autem uidetur esse, à figura dictionis. Ad syllogistice uero dictione dicendum proficit, multorum capita syllogismorum efferre, hoc modo: Alios seruauit, alios ultus est, Græcos autem in libertatē vindicauit. quippe quia ex aliis horum unumquodq. probatum est. quæ si coniungantur, iū ex his effici aliquid uideatur. altera uero est in homonymia, ut si quis dicat, uirtute præstante esse μῦν, à quo angustissi-

ma omnium Initia existunt. Siquidem *Μυστήρια* omnium augustissima initia sunt. aut si quis canem celebrans, caelestem etiam, aut *Pana* complecteretur. quia *Pindarus* dixit: O Beate, quæ magnæ deæ canem varium vocant olympij, aut: nullum esse canem inhonoratum esse; quare canē esse, honoratum. & si quis dicat: Mercurium omnium deorum maxime esse *κοινωνιόν*; quia solus vocatur *κοινός* Mercurius. item *λόγον* esse rem præstantissimā, quia boni viri non pecuniarum, sed *λόγον ἄξιον* sunt; neque enim *λόγον ἄξιον* dicitur vno modo.

Alius: Quod distinctum est, coniunctim, aut quod coniunctum, distincte proferre; quoniam enim idem videtur esse, cum sæpe non sit idem, utrum oportunius erit, id facere conuenit: est autem hoc oratio *Euthydem*i, ut illud: quod nouit triremem in *Piræco* esse, quia singula nouit. & illud: quod qui scit elementa, carmen scit, quia carmen idem ipsum est, &: quoniam bis tantum morbosum est, neque vnum salubre esse asserere: quia absurdum est, si duo bona, unum malum sit. atque hoc quidem modo ualet ad refutandum, hoc uero ad demonstrandum; neque enim unum bonū duo sunt mala. totus autem locus est captiosus. item *Polycratis* illud in *Thrasylbulum*; quod triginta tyrānos fustulit, siquidem coniungit. rursus illud in *Oreste Theodectis*: (ex distinctione nanque est.) Aequum est, si quæ maritum interficiat, ipsam mori, & filiū patrē vlciſci, hæc igitur facta sunt. nam si coniungantur, fortasse non æquum. poterit etiam à defectione proficiſci, quia tollitur, a quo.

Alius locus est: Confirmare, & infirmare cum indignatione. hoc autem est, quoties, quam rem factam esse non demonstrarit,

monstrarit, eam exaggeret. efficit enim ut uideatur, aut non fecisse, quoties qui arguitur, exaggerat, aut fecisse, quoties qui accusat, irascitur. quare non est enthymema; fit enim ut aut fecisse, aut non fecisse, falso credat auditor, quanuis demonstratum non sit.

Alius: A signo; quia neque hoc concludi Syllogismo potest. ut si quis dicat, ciuitatibus utiles amatores esse, quia Harmodij, & Aristogitonis amor Hipparchum tyrannum euertit. & Dionysium furem esse, quia improbus sit. nam neque hoc Syllogismo concludi potest. neque enim omnes improbi fures, sed omnes fures improbi sunt.

Alius: Ab accidenti; quale quod in mures protulit Polycrates, eos comedēdis neruis auxilium attulisse, aut si quis dicat, ad cenam inuitari, honorificentissimum esse, quia Achilles, q̄ inuitatus nō fuit, in Tenedo Achiuis succensuit. at ille quia parum aestimatus fuerat, succensuit. id autē accidit ex eo, quia inuitatus non fuit.

Alius: A consequenti; ut in Alexandro: Magnanimū esse, quia solus in Ida vulgaris multitudinis consuetudine neglecta versetur; quandoquidem magnanimi tales. & aduulterum esse, quia se comat, & de nocte vagetur, quia aduulteri quoque tales. eadem uero etiam ratione, quia mendici in templis & cantant, & saltant, & quia exulibus ubicunq. libet, incolere licet: quia enim hæc iis suppetūt, qui beati esse putantur, & ii, quibus hæc adsunt, putabuntur esse beati. differt autem, quo modo fiat; quocirca in defectione incurrit.

Alius: A non caussa, quasi caussa, quippe propterea quod simul, aut post eam euenerit. quod enim post illam est, æque ac propter illam accipiunt, maximeq. qui in rep. uersantur.

santur, ut Demades, Demosthenis politiam caussam calamitatum omnium extitisse, quia post eam bellum est excitatum.

Alius: A defectione temporis, & modi, ut quod Alexander iure Helenā rapuit, quia à patre optionē acceperat. neq; enim fortasse in perpetuum, sed primis temporibus. nam eatenus in potestate pater habuit. aut si quis dicat, liberum hominē cadere, contumeliā esse. neq; n. usq; quaq. uerum quoties iniuriosas manus prior intulerit.

Præterea uero ut in Eristicis, apparens Syllogismus existit ab eo, quod est simpliciter, & nō simpliciter, sed quiddā; quale in dialecticis: Non ens esse ens, quia nō ens est nō ens, & Quod cognosci non potest, sciri posse, quia quod cognosci non potest, sciri potest, cognosci non posse; sic etiā in rhetoricis apparens enthymema est ab eo, quod non simpliciter uerisimile, sed quiddam uerisimile est. hoc autē generale non est, quemadmodum etiā Agathon inquit: Fortasse uerisimile illud esse aliquis dixerit, mortalibus multa non uerisimilia euenire. euenit. n. id quod est cōtra uerisimile. quare uerisimile etiā est id, quod cōtra uerisimile est. si autē hoc, quod nō est uerisimile, uerisimile fuerit illud quidem, sed non simpliciter. Verum quemadmodum in Eristicis, nisi addantur, Secundum quid, & Ad aliquid, & Alicubi, calumniam afferunt, item hic, contra uerisimile est, non simpliciter, sed quoddam uerisimile. Ex hoc autem loco ars Coracis est constituta. nam si culpæ non sit affinis, ut si imbecillus de uerbis arguatur; non enim uerisimile est. et si sit affinis, ut si robustus. non enim uerisimile est; quia futurum erat, ut uerisimile in opinionem incurreret. eademq. etiam ratione in ceteris; aut enim culpæ affinem, aut non affinem esse necesse est.

ac uerisimilia quidem ambo uidentur. uerum illud est uerisimile, hoc uero non simpliciter, sed quemadmodum dictum est. et hoc est, inferiorem causam dicendo superiore efficere. Quo factum est etiam, ut iure Protagoræ professionē moleste homines ferret. quia falsum, et non uerum, sed apparet uerisimile est, atque in nulla arte, nisi in rhetorica, eristicaque. uersatur.

Ac de enthymematibus quidem, & quæ sunt, & quæ uidentur, dictum est.

De dissolutionibus enthymematum.

DEINCEPS sequitur, ut de dissolutionibus exponamus. Licet autem aut opponendo syllogismo, aut afferenda obiectione dissoluere. Ac syllogismi quidem oppositio quin ex iisdem afferri locis possit, haud sane dubium est; si quidem syllogismi ex probabilitibus sunt, probabilia uero multa inter se contraria sunt. At uero obiectiones quadrifariam, ut dictum est in Topicis, afferuntur: nempe aut à se, aut à simili, aut à contrario, aut à iudicatis. Dico aut à se: ut si enthymema esset, amorem bonum esse, duplex afferri obiectio posset, quippe aut in totum, omnem indigentiam malam esse dicendo, aut in parte, quod non diceretur Caunius amor, nisi mali quoque essent amores. A contrario uero obiectio ducitur: ut si enthymema esset, probum uirum de amicis omnibus bene mereri: at neque improbus male. A similibus aut: si esset enthymema, quod qui incommodum acceperunt, semper oderunt: at neque qui commodo affecti sunt, semper diligunt. Iudicia uero sunt, quæ ab illustribus uiris accipiuntur: ut si quis enthymema afferret, temulentis ignosci conuenire, quia
ignorantes

ignorantes delinquant, obiici poterit: non igitur laudandus Pittacus; neque enim grauiorem pœnam lege constituiſſet, ſi quis ebrius deliquiſſet. Quoniam autem enthymemata ducuntur ex quattuor, nempe uerifimili, exemplo, tecmerio, et ſigno; quæ autem ex iis, quæ plerunque ſunt, aut eſſe uidentur, enthymemata colliguntur, ex uerifimilibus; quæ uero ex inductione rei ſimilis, aut unius, aut pluriû, quoties quidem ſumpto uniuerſali, deinde quod eſt in parte concludat, ab exemplo; quæ autem ex neceſſario, ac exiſtente, à tecmerio; quæ uero ex uniuerſali, aut particulari, ſiue exiſtat, ſiue ſecus, à ſignis: ſane dubium non eſt, quin eiſmodi enthymemata obiectione afferēda diſſoluere ſemper licuerit. diſſolutio tamen adumbrata, & non perpetuo uera erit: neq; enim qui obiicit, uerifimile non eſſe, ſed qui neceſſarium non eſſe, diſſoluit. itaque propter hanc captionem fit, ut qui defendit, commodiore conditione ſit, quàm qui accuſat. Etenim quia qui accuſat, ex uerifimilibus probat. (neque uero diſſolutio eadem eſt, aut uerifimile nō eſſe, aut neceſſarium non eſſe;) quod uero plerunq. eſt, ei ſemper obiici poteſt, alioquin non uerifimile, ſed perpetuum, ac neceſſarium eſſet; qui uero iudicat, arbitratur, ſi eo modo ſolutū ſit, id aut uerifimile nō eſſe, aut haudquaquā ad ſuū iudicium pertinere; in quo decipitur, quemadmodū diximus; neq; enim ipſe ex neceſſariis tantūmodo iudicare, ſed etiā ex uerifimilibus debet; quia hoc demū eſt, Mente optima iudicare: non igitur ſatis erit, ſi ſoluerit, neceſſarium non eſſe, uerum ſoluere debet, uerifimile non eſſe; hoc autem accidet, ſi obiectione afferetur: quod ſæpius; (talis autem obiectione duobus afferri modis po-

T 2 teſt,

test, aut tempore, aut rebus; uerum ab utrisq. firmissima est;) nam quod ita est sæpius, id demum est uerisimilius. At uero tum signa, tum quæ à signis ducuntur, enthymemata, etiam si existunt, eo, quo supra dictum est, modo soluentur. nam nullum concludi syllogismo signum posse, liquet nobis ex *Analyticis*. Eorum uero quæ ab exemplis eliciuntur, eadem, ac uerisimilium dissolutionis est ratio: nam si unum aliquod non ita euenisse possimus ostendere, solutum est, quia non est necessarium, quippe cum & complura, & sæpe facta sint aliter. quod si & complura, & sæpe ita se habuerint, contendere oportet, id, quo de agitur, aut simile non esse, aut similiter factum non esse, aut dissimilitudinem aliquam obtinere. Tecmeria uero, & quæ a tecmeriis ducuntur, enthymemata, eo quidem euertere non possunt, quòd syllogismo concludi nequeant: (id enim nobis liquet ex *Analytici*) uerum quod dicitur, nullum esse, nobis ostendendum relinquitur. quod si & esse, & tecmerium esse pateat, iam hoc insolubile euadit, quia omnia iam demonstratione sunt patefacta. Amplificatio uero, & imminutio non sunt enthymematis elementum, (idem enim elementum uoco, & locum, est autem elementum, & locus, in quem multa enthymemata incidunt;) uerum amplificatio, & imminutio enthymemata sunt ad ostendendum, magnum, aut paruum esse, perinde ac etiam bonum, aut malum, aut iustum, aut iniustum, aut aliorum quodlibet. hæc autem omnia sunt, in quibus syllogismi, enthymemataque uersantur. quod si nullum horum locus enthymematis est, neque amplificatio, & imminutio est. Neque uero quæ ad soluendum ualent genus sunt
enthyme-


enthymematis ab iis, quæ ad confirmandum apta sunt, separatum. nam sine dubio soluit quidem, qui aut demonstrat, aut obiectionem affert; uerum oppositum contra demonstrant. exempli gratia, si ostendit, factum esse, hic non factum esse; sin autem non factum, hic factum: quare nihil intererit; quia iisdem ambo utuntur: si quidem ad ipsum non esse, aut esse, enthymemata adhibent: Neque uero obiectio est enthymema, sed quemadmodum in Topicis, opinionis alicuius pronuntiatio, ex qua syllogismo conclusum non esse, aut falsi aliquid sumptum esse, patebit. Quoniam autem tria sunt, quæ tradere de oratione oportet, de exemplis quidem, & sententiis, & enthymematibus, & omnino de iis, quæ ad animi sensa pertinent, & unde copiam comparabimus, et quemadmodum ea dissoluemus, tam multa nobis exposita sint. reliquum est autem, ut de elocutione, & dispositione pergamus.



ARISTOTELIS ARTIS

RHETORICAE,

Carolo Sigonio Interprete,



LIBER TERTIUS.

De elocutione.



VM TRIA SINT, quæ tradere de oratione oportet, unum, unde fides existet, alterum de elocutione, tertium, quemadmodum partes disponere orationis expediat: fides quidem expositæ sunt, & ex quot sint, nempe ex tribus, & hæc qualia, & quare tot sola. aut enim, quia ipsi aliquo modo sint affecti, qui iudicant: aut quia cuiusdammodi existiment eos, qui dicunt: aut quia demonstratum sit, assentiuntur omnes. dictum uero est etiam, unde promenda enthymemata sint, nempe partim ex formis enthymematum, partim ex locis. consequens ergo est, ut de elocutione dicamus: neque enim satis est, habere, quæ oportet dicere, sed necesse est etiam hæc dicere, ut oportet: ualetq. ad id multum, ut oratio cuiusdammodi uideatur.

uideatur. Ac primum quidem quæsitum est secundum naturam, quod natum est primum, res uidelicet ipsæ, unde fide habeant, deinde uero quemadmodum cædicendo tractentur, tertium autem horum, quod uim quidem habet maximam, nondum uero tentatum est, actio. etenim in tragicam, & rhapsædiâ sero prodiit: quippe quia tragædias ipsi poetæ primum agebant: ex quo apparet, perinde in rhetorica usuuenire, atque in poetica quoque. id quod nonnulli alii tradiderunt, tum Clauco Teius. Hæc autem uersatur in uoce, quemadmodum eam ad singulos affectus adhibere conueniat, ueluti, quando magnam, & quando paruam, & quando mediocrem, & quo modo tonos, ut acutum, & grauem, & medium, & quos rhythmos ad singulos: tria enim sunt, quæ inquirunt: nempe magnitudo, concentus, & rhythmus. ac præmia quidem ferme ex certaminibus isti referunt, & ut illic plus ualent actores hodie, quàm poetæ, item in ciuilibus contentionibus uitio rerum publicarum. nondum autem ars harum rerum est constituta: quia & sero elocutio prodiit. quæ quidem, si probe iudicetur, leuis res esse uidetur: uerum cum ad opinionem tota rhetoricæ pertractatio referatur, non ut rei, quæ recte habeat, sed ut necessariæ suscipienda cura est. neque enim plus in dicendo laborare debemus, quàm ut neque molestia, neque iucunditate afficiamus. siquidem rebus ipsis decertare oportet: quare cetera præter demonstrationem inania sunt, sed multum tamen ualent propter prauitatem, ut diximus, auditorum. Ac paruam quidem nescio quam elocutio habet in omni doctrina necessitatem: interest enim nonnihil ad declarandum, ita ne, an ita dicas, uerum non
tantopere

tantopere. sed hæc omnia phantasia constant, & referuntur ad auditorem. itaque nemo geometriam ita tradit. illa igitur cum prodibit, idem atque histronia efficiet; fuerunt tamen qui de ipsa etiam nonnihil prodere sunt conati, ut *Thrasymachus* in *Disserationibus*: quin etiam ad agendum aptius esse naturæ est, et minus artificiosum, elocutio uero artis est. itaque oratoribus, qui hac ualent, quemadmodum & iis, qui actione, altera præmia tribuuntur. nã, quæ scribuntur, orationes plus dictione, quàm sententiis pollent. Ac poetæ quidem primum, ut natura tulit, eã excitare coeperunt. siquidem nomina imitationes sunt, & uox tributa nobis est omnium partium ad imitandum aptissima, unde artes tum rhapsœdia, tum histronia, tum aliæ constituerunt. quoniam autem poetæ, cum inania dicerent, ex elocutione gloriam peperisse hanc uidebantur, propterea poetica elocutio prima exiit, ut *Gorgias* hodieq. eorum pleriq., qui disciplinis exculti non sunt, tales pulcherrime loqui existimant. non est autem ita, uerum alia orationis elocutio est, quàm poematis. quod ex euentu declaratur. neq; enim qui tragœdias faciunt, amplius eo modo utuntur, sed ut ex tetrametris ad iambos se contulerunt, quia hoc metrum inter alia est sermoni simillimum, sic & nomina à sermonis consuetudine aliena deposuerunt, ea uero abiecerunt, quibus prisca ornarunt, & qui hodie quoq; hexametra scribunt. quocirca ridiculum est, eos, qui ipsi eo modo non utuntur amplius, imitari. Ex quo perspicuum est, non omnia, quæ de elocutione præcipi possunt, nobis esse accuratius conquirenda, sed quæ de eiusmodi, quã dicimus. de illa uero in præceptis de poetica disseruimus.

Elocutionem

Elocutionem perspicuam esse debere, non tamen humilem, nec elatam.

SINT ergo illa pertractata, ac uirtus elocutionis cōstituat, ut perspicua sit; argumento est enim, quòd oratio, si non declarat, officio suo non fungitur; & ut neque humilis, neque supra dignitatem sit, sed decorā. poetica enim fortasse humilis non est, uerum orationem nō decet. Ac perspicuam quidem nomina, & uerba propria reddunt, non humilem uero, sed ornatam alia nomina, quæ in præceptis de poetica sunt exposita; quia immutatio efficit, ut grandior uideatur. Siqui dem homines ut erga peregrinos, & ciues, sic etiam erga elocutionem afficiuntur. quare peregrinus sermo reddendus est, quia admiratores sunt eorum, qui absunt, admirabilia uero iucunda sunt. Ac in metris quidem tum multa hoc efficiunt, tum illic conuenit. nam & res, & homines, de quibus sermo habetur, magis excellunt, in nudis autem orationibus, multo paucioribus; quia argumentum inferius est. quoniam & ibi si seruus, aut ualde iuuenis ornate loqueretur, minus decorum esset, aut si de rebus ualde minutis. sed uersatur in his etiam decorum aut angustius, aut latius. Quocirca oportet, ut occulte faciamus, & non fecte, sed à natura dicere uideamur. hoc enim ualet ad fidem, illud uero secus; quia tanquam ab insidiatore cauent, quemadmodum à uinis permistis. & quale Theodori uoci ad aliorum uocem histrionum accidit. hæc enim eius, qui dicebat, esse uidebatur, illæ uero alienæ. Egregie uero occultitur, si quis è communi sermonis consuetudine seligendo componat. quod Euripides facit, &

primus ostendit. Verum cum nomina, & uerba sint, ex quibus constat oratio, cumq. nomina tam multas habeant formas, quàm multæ in præceptis de poesi traditæ sunt, harum quidem linguis, & duplicibus nominibus, & nouatis raro, & paucis in locis uti debemus; ubi uero, post dicemus; nam quam ob causam, dictum est; quippe quia in maius, quàm decet, immutant. proprium uero, & ad naturam accommodatum, & translatum ad nudarum duntaxat elocutionem orationum proficiunt. cuius rei signi est, quòd his solis omnes utuntur. siquidẽ omnes translatis, & ad naturam accommodatis, propriisq. loquuntur. Ex quo intelligi potest, si quis probe fecerit, fore, ut peregrinitatẽ adhibeat, & occulte faciat, et perspicue dicat, quæ sermonis oratorii uirtus est. Ex nominibus aut̃ sophistæ quidem homonymiæ utiles sunt, quia fraudẽ his facit, poetæ uero synonymiæ uoco aut̃ propria, et synonyma, ut ire, et proficisci: hæc. n. ambo inter se propria, & synonyma sunt. Ac quid horum quidẽ unumquodq. sit, et quot species translationis, & ut translationes hoc in primis tum in poesi, tum in orationibus ualeant, expositum est, quemadmodum diximus, in iis, quæ de poetica scripsimus. tanto autem uehementius de ipsis in oratione laborare oportet, quanto paucioribus oratio, quàm uersus, præsidii est instructa. Ac translatio quidem perspicuitatem, suauitatem, & peregrinitatem in primis habet. neque eam ab alio sumere licet. oportet autem & epitheta, & translationes dicere, quæ cõueniant: id quod erit, ex proportionibus; sin minus: indecorum uidebitur. quia contraria inter se collata maxime elucescunt. uerum uidere oportet, ut iuuenem purpura,

sic

sic senem quid; neque enim eadem decet uestis. Et si ornare
 uelis, à meliore eorum, quæ eodem genere continentur, duce-
 re translationem, & si uituperare, à deterioribus. dico au-
 tem exempli gratia, quoniam contraria in eodem genere exi-
 stunt, dicere, mendicantem quidem precari, precantem uero
 mendicare, quia utrunq. petitio est, id est, quod dicimus, face-
 re. quemadmodum Iphicrates Calliam $\mu\eta\tau\rho\alpha\gamma\upsilon\rho\tau\eta\nu$ uocauit,
 non $\delta\alpha\delta\omicron\upsilon\chi\omicron\nu$. ille autem respondit, non esse illum iniiatum,
 neque enim se $\mu\eta\tau\rho\alpha\gamma\upsilon\rho\tau\eta\nu$, sed $\delta\alpha\delta\omicron\upsilon\chi\omicron\nu$ uocasset. utrunque
 enim ad deam, sed illud honorem habet, hoc non habet. ac
 ille Dionysi assentatores, ipsi uero semet artifices nominant.
 hæc aut ambo translata sunt, illud quidem inquinantiū, hoc
 uero secus. hodieq. prædones ipsi se lucrifactores appellant.
 itaq; licet dicere, eū, qui iniuriā facit, delinquere, & qui de-
 linquit, iniuriā facere, & qui furatus est, eū et sumpsisse, &
 populatū esse. Illud aut, quod Telephus Euripidis inquit,
 remo imperare, est indecorū; quia maius est imperare, quàm
 pro dignitate. quare haud occultum est. Inest etiam in syl-
 labis error, si non suauis indicia uobis sint. quo pacto Diony-
 sius Chalcheus in Elegis clāgorem Calliopes uocat poesim,
 quia ambæ sunt uoces. mala uero trāslatio è uocibus existit
 significationis expertibus. Præterea uero non longe trāsfer-
 re oportet, sed ab iis, quæ cognata, & conformia sunt, nomi-
 ne afficiendo, quæ carent. quod cum dictum sit, pateat esse
 cognatum, ut in ænigmate illo celebri: Virū vidi igne æs vi-
 ro agglutinantem. Affectus enim uacat nomine. est tamen
 utrūq. appositio quædā. quare agglutinationem applicatio-
 nem cucurbitule nominauit. Atq; omnino ex probe fictis

ænigmatibus elegantes ducere translationes. siquidē translationes ænigmata pariunt. ex quo probe translātū esse appareret. Et ab honestis; nominis autē honestas, ut inquit Licymnius, in sono, & significato, eodēq. modo turpitudine, cōsistit. præterea uero tertia, quæ sophisticā rationem dissoluit; neque .n. est, quemadmodū dixit Bryson, ut nemo turpiter loquatur, quòd idē ualeat hoc pro illo dicere; est .n. hoc falsum, eò, quòd aliud alio magis propriū, & magis simile est, & ad rē ante oculos constituendam magis accommodatum. præterea non eodem modo se habens significat hoc, & illud. quare ita quoq; aliud alio honestius, ac turpius statuendum. ambo .n. honestum, & turpe significant illa quidem, uerum non quatenus honestum, aut nō quatenus turpe, aut hæc quidem, uerum magis, & minus. translationes igitur hinc ducendæ sunt, nempe ab honestis rebus aut uoce, aut ui, aut aspectu, aut alio quopiam sensu. interest autem dicas exempli gratia auroram roseodigitā potius, quàm purpureodigitā, aut, quòd adhuc deterius est, rubrodigitam. Item in epithetis. licet epitheta à malo, aut turpi formare, ut matricida; licet etiam à meliori, ut patris uindex. & Simonides, cum præmium ei exiguum dabat is, qui mulabus uictoriam reportarat, carmen facere recusauit, quasi in mulas carmen facere grauarietur; ubi uero idoneum dedit, fecit: Salute volucrum filie equorum. atqui asinorum quoque filie erant. Item eandem rem diminuere. est autē diminutio, quæ minus efficit et malum, & bonum. quemadmodum Aristophanes cauillatur in Babylonis, pro auro autulū, & pro toga togulam, & pro conuicio conuiciolum, & morbulum. caute tamen agere oportet,

oportet, et modū in utroq; tenere. Frigora uero quattuor in rebus ex elocutione existunt; in duplicibus nominibus, ut *Lycophron*: Multiforme cælum, Magniceruicæ terræ, & Littus angustiuu. & *Corgias* dixit: πτωχόμους adulator, ἐπιπορίσοντας, καὶ κατενορίσοντας, & ut *Alcidas*: Furor quidem animum repletum, igniuomos uero oculos factos. & τελεσφόρον putauit alacritatem eorum futuram, & τελεσφόρον suadelam uerborum constituit, & CæulicOLOR maris solum. quandoquidem hæc omnia poetica propter duplicationem uidentur. Ac una quidem hæc caussa est, altera uero linguarum usus, ut *Lycophron*: Xersem virum πέλωρον, & Sciron σύννυς vir, & *Alcidas*: ἄθυρμα poesi, & naturæ ἀπαθάλειν, & Mera animi ira τεθηγμένον. Tertiū uero in epithetis, nepe aut longis, aut intempestiuis, aut frequentibus usurpandis. in poemate. n. lac albū licet dicere, in oratione uero partim indecora sunt, partim uero, si nimia sunt, arguunt, ac planum faciunt, poesim esse. Quoniā aut ipsa uti oportet, quia consuetudinē immutat, & peregrinā elocutionē efficit, saltē modū intueri conuenit; quia plus mali affert, quā si temere dicas; illa enim non habet quod rectum est, hæc uero quod uitiosum. quocirca frigida *Alcidamātis* scripta uidentur, quia epitheta nō cōdimēti loco adhibet, sed tāquā cibi, usque adeo crebra, & maiora, & aperta. ut non sudorē, sed humidū sudorē, neq; ad *Isthmia*, sed ad *Isthmiorū* mercatū, nec leges, sed reginas ciuitatū leges, neq; cursu, sed cursorio animi impetu, nec *Museum*, sed, cū naturæ Musēū accepisset, & tristē animi curā, neq; gratiæ, sed popularis gratiæ opifex, & dispensator audientium voluptatis, neque ra-

mis, sed sylvæ ramis occultavit, neque corpus uelavit, sed corporis pudorē, & ἐντίμωv animi cupiditatem. hoc autem simul & duplex est, & epithetū. quare poema euadit, & ita ἱεῖς & ποῖv improbitatis exuperantiam, itaque poetice loquentes cum indecoro risum, frigus, & obscuritatem propter loquacitatem cōmifcent. quia quidquid cognoscenti inculcas, tenebris offundedis perspicuitatem euertit. Homines autem duplicibus utuntur, quoties res uacat nomine, & facile iungi oratio potest, ut χρὸς ὅττι βέλγν. quòd si multum sit, prorsus poeticum est. itaque dithyrambis duplex dictio commodissima est, ut pote, qui pleni strepitus sint, epicis autem linguæ, quòd res grandis, atque superba sit, iambicis uero translatio, quòd has hoc tempore frequentent, ut dictum est. Præterea uero quartū frigus in translationibus oritur. etenim trāslationes quoq; sunt indecoræ, partim, quia ridiculæ sunt, siquidē & comici translationes usurpant, partim, quia grādes nimis, ac tragicæ. obscuræ uero, si longē, ut Gorgias: Pallidas, atque exagues res. Tu uero hæc turpiter seminasti, male uero metisti. nimis enim poetice. & ut Alcidamas: philosophiam propugnaculū legum, & Odyssēā humanæ vitæ speculum, & Nullum eiusmodi ἀδύναμ ποῖσι afferens. quia hæc omnia parum ad fidem apposita sunt, ob ea, quæ diximus. illud uero Gorgiæ in hirundinem, quæ reliquias aduersus eum uolans demiserat, optime inter tragicos. dixit enim: Turpe sane ὀ Philomela. aui enim, si fecisset, non turpe, at uero uirgini turpe. recte igitur conuicium dixit, cum quod fuit, non quod est, dixit. Est autem similitudo quoq; translatio. siquidem paulum discrepat. cum enim de Achille dicit: Ὡς τε κλέο

leo ruit, similitudo est, cum uero, leo ruit, translatio. quia ambo fortes sunt, leonem Achillem transferendo uocauit. utilis est autem etiam in oratione, sed raro, quia poetica est. eliciendæ uero, quo modo translationes. siquidem translationes sunt eo, quod dictum est, differētes. sunt autem similitudines, ut quam Androtio in Idrieum; quippe similem canibus esse, qui ex uinculis; illi enim obuios mordent, et Idrieū ex uinculis relaxatum esse molestum. & quo modo Theodamas Archidamum cōparabat Euxeno geometriæ ignaro; & ex proportionē; erit enim & Euxenus Archidamus geometricus. & illud in politia Platonis, quippe qui mortuos spoliānt, similes esse canibus, qui lapides mordent, nec iacentes attingunt. & in populum; similem esse nauclero robusto quidē, sed surda stro. & in uersus poetarum; similes esse uenustis sine pulchritudine, quia illi ubi desfloruerint, hi ubi dissoluti sunt, similes non uidentur. & illa Periclis in Samios; similes eos esse infantibus, qui mansum accipiunt, sed cum ploratu; & in Boeotos, similes esse ilicibus; ilices. n. à se met contundi, item Boeotos inter se depugnare. & Demosthenes in populum, similem esse iis, qui in nauibus nau-searent. & quomodo Democrates oratores nutricibus comparauit, quæ mansum deglutientes saliuā infantes inungunt. & quo modo Antisthenes gracilem Cephisodotum thuri assimilauit; quia dum consumitur, iucunditate perfundit. has enim omnes & ut similitudines, & ut translationes licet proferre. quare quæcunq. probabuntur translationum modo prolata, profecto eadem etiam similitudines erunt, et similitudines translationes rationis egentes. Oportet autem

ut translationem ex proportionem ductam semper partem etiam in alteram referamus, item in iis, quæ eiusdem generis sunt. ut si poculum scutum est Dionysii, & scutum Martis poculum dicere conuenit. Ac oratio quidem ex his constituitur.

Elocutionem emendatam esse oportere.

ELOCUTIONIS autem principium est, emendate loqui. id autem in quinque rebus uersatur. primum in coniunctionibus, si quis reddiderit, prout naturaliter inter se antecedunt, ac subsequuntur, quemadmodum nonnullæ requirunt. ueluti Quidem, & Ego quidem requirunt Vero, & Ille uero. Debemus autem, quoad meminit, inter se referre, neque longe separare, neque coniunctionem ante coniunctionem necessariam reddere; quia paucis in locis congruit: Ego uero, postquam mihi renunciavit, uenit enim Cleon rogans, atque obsecrans, profectus sum illis assumptis. in his enim coniunctiones multæ ante reddendam coniunctionem sunt inculcæ. quod si multa essent inter profectus sum, obscuritas oriretur. ac una quidem uirtus est in coniunctionibus. Altera uero est, propriis nominibus, & non ambientibus eloqui. Tertia uero non ambigua; hæc autem: nisi consulto contraria eligat. quod faciunt, quoties nihil habent, quod dicant, uerum aliquid dicere simulant. tales enim ea de industria dicunt, ut Empedocles. decipit enim circuitus, si sit multus. atque afficiuntur auditores æque, ac uulgus inter ariolos; quia cum ambigua dicunt, annuit: Croesus Halym penetras
magnam

magnam peruertet opū vim. & quia omnino minor errori locus est, per rei genera loquuntur arioli: in ludo. n. paris, et imparis facilius aliquis paria, aut imparia dixerit, quam quot teneat; & futurū, quam quando. quocirca arioli nō definiunt, quādo. hęc igitur omnia sunt similia; quare nisi alicuius eiusmodi rei gratia fugienda. Quarta, ut Protagoras genera nominū diuidebat in uirilia, & muliebria, & instrumenta; quia & hęc recte reddere conuenit: Illa uero reuerfa, & collocuta discessit. Quinta in multis, & paucis, & uno recte nominādis: Illi uero reuerfi me verberarunt. Omnino uero opus est, ut quod scribitur, facile legi, ac proferri, quod idē est, possit. id quod multæ coniunctiones non habēt, nec quæ ad interpungendū difficilia sunt, ut scripta Heracliti. siquidem scripta Heracliti interpungere operosum est, quod obscurū sit, utri adiaceat, posteriori ne, an priori. ueluti in principio ipsius libri. inquit. n. Rationis huius existētis semper imperiti homines fiunt. obscurū est. n. illud semper, utri interpungēdo adiungas. Iā uero hęc solæcismū pariūt, non reddere, nisi adiungas ambobus quod conuenit, exempli caussa, aut strepitum, aut colorem, uidens quidem non est commune, sentiens uero commune. Obscuritas porro gignitur, si multa in medio inculcaturus, non præponendo dixeris, hoc modo: Debebam enim locutus cum illo hęc, & hęc, & hoc modo, proficisci. non autem: Debebā enim locutus cū illo, p̄ficisci, deinde, hęc, & hęc, & hoc modo facta sunt.

Quæ tumorem orationis efficiant.

Ad tumorem uero orationis hęc ualent, orationem pro nomine

X

I

mine

mine adhibere, ut nō circulum, sed planiciem à medio equalem; ad concisionē uero cōtra, pro oratione nomen. Et si turpe, aut indecorū sit, si in oratione sit turpitudine, nomen dicere, sin aut in nomine, orationē. Et trāslati, & epithetis elo. qui morē declinando poeticum. Et unum multa facere: quod poetæ factitant, cū unus sit portus, tamen dicunt: Portus in Achaicos; & Epistolæ hæc luctuosa volumina. Et nō coniungere, sed utriq. utrūq. adiungere: τῆς γυναικὸς τῆς ἡμετέρας. sin aut cōcise, cōtra: τῆς ἡμετέρας γυναικὸς. Et cum coniunctione dicere. sin autem concise, sine coniunctione quidem, non inconiuncta tamen, ut Profectus, & Locutus, profectus locutus sum. Quin etiā illud Antimachi utile est, quæ non habet, cōmemorare, quod ille facit in Teumesso: Est quidā ventosus paruus collis; quia sic augetur in infinitū. ualet aut & in bonis, et in malis, hoc nō habere, utro modo fuerit utile. unde etiā poetæ nomina ducūt, ἄχορδον, & ἄλυρον μέλος; quia ex priuationibus inferunt. probatur. n. hoc, si in trāslationibus ex proportionē dicatur. ut si dicamus, tub. i esse ἄλυρον μέλος.

Orationem decoram esse debere.

DECORVM aut elocutio retinebit, si affecta erit, & morata, & subiectis rebus proportionē respōderit. Proportionē uero respōdet, si neq; de amplis rebus summissē dicatur, neq; de tenuibus grauitē, neq; tenui nomini adhibeatur ornatus. sin minus, comædia uidetur. quemadmodū facit Cleophon. similiter. n. quæd i protulit, ac si diceret: venerādas ficus. Affecta uero: si cōtumelia sit, irati dictio sit, si impia,

ac turpia, indignabunde, & caute dicat: si laude digna, admirabunde: si miseraabilia, humiliter. eodeq. modo in ceteris. Fide uero rei etiã accommodata ad naturã elocutio parit: quia in errorẽ impellitur animus, quasi ille uere dicat. nam in rebus huiusmodi sic afficiuntur: quare existimant, etiã si non ita se habeat, ut inquit orator, res ita se habere. & semper simul afficitur ille, qui audit cũ eo, qui affecte dicit, etiã si nihil dicat. itaq. pleriq. tumultum excitantes attonitos reddunt auditores. Morata uero est ipsa quæ à signis demonstratio ducitur, quia ei comes ea est, quæ cuiq. generi, atq; habitui conuenit. dico autẽ genus quidẽ secundũ etatẽ, ut puer, aut uir, aut senex, & mulier, & uir, & Laco, aut Thessalus; habitus autẽ, ex quibus uita cuiusdammodi aliquis est. neq. n. ex omni habitu cuiusdammodi uitæ sunt. si igitur & nomina habitui accommodata protulerit, mores excitabit; neq. n. eadem, neq; eodem modo agrestis, & eruditus loquetur. Afficiuntur uero nonnihil auditores eo etiã, quo affatim ii, qui scribunt orationes, utuntur: Quis non intelligit? Omnes sciunt. quia auditor uerecũdia captus assentitur, ut eius rei particeps sit, cuius & omnes alii sunt. Oportunus autẽ, & non oportunus usus omnibus formis cõmunis est. Verũ in omnium exuperatione remedium est id, quod uulgo dicitur. etenim semetipsum increpare oportet. uerũ. n. esse existimatur; quoniam oratorem quod facit, nõ fugit. Præterea uero non omnia ex proportionẽ respondentia simul adhibere debemus; sic. n. decipitur auditor. dico autẽ exẽpli gratia, si nomina dura sint, non & uoce, & uultu, & iis, quæ conueniunt. sin minus, apparet, quid unũquedq; sit. sin autẽ hoc

quidem, illud uero non, clā efficit idem. Quod si mollia duri-
ter, & dura molliter dicantur, minus ad fidem proficit. No-
mina uero epitheta, & duplicia plura, & peregrina maxi-
me conueniunt affecte dicenti. ignoscitur. n. irato, si dicat,
malum οἰρανόμενος, aut πλωέρον, & quando iā teneat audito-
res, & furere fecerit, aut laude, aut uituperatione, aut ira,
aut beneuolentia, quemadmodum Isocrates in Panegyrico
facit in extremo: φέρων δὲ καὶ μνήμων, & οἷτινες ἔτλησαν; quia talia
furore inflammati dicunt. quocirca eodem etiam nimirum
modo affecti recipiunt. itaq; ad poesim accommodata sunt;
quia poesis diuinum numinis plena est. Aut igitur hoc modo
oportet, aut per iocum, ut Gorgias fecit, & illa in Phædro.

Elocutionem numerosam esse debere.

ELOCUTIONIS uero figura neq; metri cōpos, neq; rhy-
thmi expers esse debet. illud. n. parum ualet ad fidem, quia fi-
ctum existimatur, & simul etiā auocat, quia facit, ut atten-
datur, quādo iterum simile reuertetur. ut igitur pueri præ-
cones præoccupant, quem patronum adoptet is, qui manu-
mittitur, Cleonem. quod autem expers est rhythmī expers
est termini. terminari uero conuenit, sed non metris; quia in-
finitū suauitate caret, et cognosci non potest. omnia uero nu-
mero terminantur, rhythmus autem figuræ elocutionis nu-
merus est, cuius & metra segmenta sunt. itaq; rhythmū ora-
tio habeat oportet, uerum nō metrum, alioquin erit poemas;
neque uero rhythmum exquisite. id autem euomet, si quadā-
tenus sit. Rhythmorum uero herous grandis est, & canorus,

& harmoniam requirens. Iambus autē ipse uulgi sermo est. quo fit, ut maxime omnium metrorum iambos in dicendo effundat. uerum granditatem effici, & excitationem oportet. Trocheus autem cordaci uicinior est. id quod tetrametra indicant; siquidem uolubilis tetrametra rhythmus sunt. Relinquitur ergo pæan, quo uti quidem à Thrasymacho incæperunt, sed quoniam esset, dicere non potuerunt. tertius autē est pæan, & iis, quos diximus coniunctus. tria enim ad duo est. eorum uero ille quidem unū ad unum, hic uero duo ad unū. coniuncta uero his est ratio, scilicet sesquialtera, hic autem est pæan. Ac alii quidem tum ob ea, quæ diximus, abiiciendi, tum quia metrici. pæan autem sumendus; quia ex solo eorū, quos diximus, rhythmorū, nō constat metrum, ut maxime lateat. Ac nunc quidē uno pæane etiā incipiendo utuntur, uerū finē à principio discrepare oportet. pæanis autē duæ inter se oppositæ formæ sunt. quarū una principio conuenit, quæ admodū etiā utuntur. atq; hic est, qui à longa incipit, & tribus breuibus terminatur: δαλογενὲς ἔτελυκ' ἄν, & χρυσεοκόμα ἔκατε παῖ δ' ὀδός, alter uero cōtra, cuius primæ tres breues sunt extrema uero producta. μετὰ δ' ἐγὼ νῦν δ' ἄρα τ' ὠκεανὸν ἠφάνισεν. hic autem finem conficit, quia breuis propter imperfectionem decurtat. uerum in longa amputari oportet, & finem patere non per librarium, aut per paragraphen, sed per rhythmum. Ac concinnam quidem, & rhythmum non expertem elocutionem esse debere, & qui rhythmum concinnā efficiant, & quemadmodum constituti, dictum est.

Elocutionem aut fusam, aut versam esse debere.

ELOCVTIO

ELOCUTIO uero aut fusa sit, necesse est, & uinculo una, quales sunt in dithyrambis anabolæ, aut uersa, & antiquorum poetarum antistrophis similis. Ac fusa quidem elocutio prisca est: ὑποδοῖτον δοῦναι οὐκ ἔστι ἰσοπλάγιον ἀπὸ δέξιος. quippe qua olim omnes, nunc uero parum multi utantur, fusam uero appello, quæ nullum per se finem adipiscitur, nisi res, quæ dicitur, absoluitur. ea uero propter infinitatem est iniucunda, quia omnes finem aspicere cupiunt. quocirca in flexionibus anhelant, ac deficiunt, prius autem non laborant, dum metam prospiciunt. ac fusa quidem elocutio hæc est. Versa uero est, quæ ambitibus constat. uoco autem ambitum orationem habentem principium, & finem ipsam per se, & facilem conspectu magnitudinem. eiusmodi uero tum suauis, tum ad percipiendum facilis est; suauis quidem, quia interminato aduersatur, & quia auditor semper se tenere aliquid arbitratur, eo, quod ipsi semper est aliquid terminati; illud autem nihil præsentire esse, neque aperire, suauitatem non habet; ad percipiendum autem facilis, quia facile teneri memoria potest. hoc uero, quia numerum continet, quæ ambitibus constat, oratio, qui memoria custodiri commodissime potest. unde uersuum facilius omnes recordantur, quàm solutorum, quia numero, quo dimetiuntur, astricti sunt. ceterum ambitus etiam cum sententia terminetur, oportet, neque, ut iambica Sophoclis, abrumptur: Calydon quidem hæc, terra Pelopei foli; quia contrarium etiam suspicari, quàm si diuidatur, licet, ut in eo, quod diximus, Calydonia esse Peloponnesi. Ambitus autem unus quidem membris continetur, alter uero simplex est.

est. ex membris uero constat, elocutio quæ perfecta est, & distincta, & facile comprehendi spiritu potest, non propter distinctionem, ut commemoratus ambitus, sed tota. Membrum uero illius pars altera est. Simplicem autem appello unimembrem. Ceterum tum membra, tum ambitus neque mutilos, neque longos esse oportet. nam quod pusillum est, efficit, ut auditor sæpenumero hæreat. etenim cum ad id, quod adhuc est ultra, & ad eius, quem in semetipso continet, termini modum festinans, quiescente oratore retrahitur, quodammodo propter repulsionem hæreat, necesse est. longa uero efficiunt, ut deficiat, uelut ii, qui ultra terminum se conuertunt; quia & isti eos, qui secum deambulant, derelinquunt. similiter uero et ambitus, qui longi sunt, oratio, & simile aliquid anabolis fiunt. quare euenit, quod Democritus Chius in Melanippedem est iocatus, qui pro antistrophis anabolas fecerat: Nempe capiti suo malum fuit ille, qui alteri malum fuit, longa uero anabola ei, qui fecit, pessima; hoc enim in eos etiam, qui longis membris utuntur, dicere conuenit. qui uero nimium breuia membra habent, ambitus non sunt. quo fit, ut auditorem præcipitem agant. Eius autem, quæ membris continetur, elocutionis una quidem distincta est, altera uero opposita; distincta quidem, ut: Sæpenumero admiratus sum eos, qui conciliabula coegerunt, & gymnicos ludos instituerunt. opposita uero, in qua in utroque membro aut contrarium cum contrario componitur, aut idem e contrariis iungitur, hoc modo: Verisq. autem profuerunt, & qui remanserunt, & qui sequuti sunt; illis enim plura quàm quæ domi essent, adquisuerunt, his uero satis eorum, quæ domi essent, reliquerunt. contraria remanere,
sequis

sequi; satis, plus. Quare & pecuniarum indigentibus, & frui volentibus. *fructus acquisitioni opponitur. item:* Contingit sæpe in his, ut & prudentes male agant, & imprudentes bene. Statim quidem virorum fortium præmia obtinuerunt, non ita vero multo post maris imperium pepere-
 runt. Terram quidem nauigasse, mare vero inambulasse. Hellesponto quidem iuncto, Atho vero perfosso. Et natura cum sint ciues, lego ciuitatis priuari. Alij enim eorum male perierunt, alij vero turpiter seruati sunt. Priuatim quidem barbaris seruis uti, publice vero multos socios serui-
 entes despiciere. Aut viuentes habituros, aut mortuos reli-
 cturos. *Et quod in Pitholaum, & Lycophrone* quidam in iudicio dixit: Hi, cum domi essent, vos vendebant, ad nos profecti venundati sunt. hæc enim omnia id, quod diximus, pariunt. Habet autem eiusmodi dictio suauitatem; quia cō-
 traria notissima, & inter se comparata notiora existunt, & quia prope ad syllogismum accedunt. si quidem collectio op-
 positorum elenchus est. ac eiusmodi quidem uocatur Oppo-
 sitio; Compar uero, si æqualia membra sint; Similiter au-
 tem desinens, si utrumque membrum similes exitus habeat. at uero aut in principio, aut in fine habeat, necesse est; & principium quidem semper nomina, finis autem extremas
 syllabas, aut eiusdem nominis casus, aut ipsum nomen; in principio quidem ita: ἄργον γὰρ ἐλαβεῖν ἄργον παρ' αὐτοῦ. Δωρη-
 τοῖτ' ἐπέλοτο παρρηγοῖτ' ἐπέεσιν. in extremo uero. ὠνὴν σὰν
 αὐτὸν πᾶσι δὴν τετοκέναι, ἀλλ' αὐτοῦ αἵτιον γεγονέναι. Ἐν πλείσταις δὲ
 φροντισί, καὶ ἐν ἐλαχίσταις ἐλπίσι. casus autem eiusdem: ἄξιός δὲ πα-
 θῆναι χαλκοῦς, οὐκ ἄξιός ὢν χαλκοῦ. idem autem nomen: σὺ δ' αὐ-
 τὸν καὶ ζῶντα ἔλεγες κακῶς, καὶ νῦν γράφεις κακῶς. à syllaba uero:
 τί ἄν' ἐπαθεῖς θεινόν; εἰ δὲς ἄργον; Fieri autē potest, ut idem
 εἰρηρῶ
 simul

simul omnia habeat, idemq. Oppositum, & Compar, & Similiter desinens sit. principia uero ambituum ferme in Theodectis numerata sunt. uerum & falsæ oppositiones existunt, quales fecit Epicharmus: τὸ αὖ μὲν ἐν τήντοις ἔγωγε ἴν, τὸ αὖ δὲ παρὰ τήντοις ἔγωγε.

Qualis urbana elocutio sit.

Q UONIAM autem explicatum de his est, unde urbana demum, et probata dicta ducantur, aperiamus. Ac ea quidem fingere, ingeniosi, aut exercitati hominis est, tradere uero, artificii huius. quamobrem exponamus, ac numeremus. hinc uero capiamus exordium. Omnibus sane illud à natura insitum est, ut uoluptatem facile discendo percipiant; nomina uero significant aliquid; quare ut quodq. nomen maxime efficit, ut discamus, ita plurimum efficit uoluptatis. ac linguae quidem incognitæ, propria uero cognita sunt. translatio uero hoc potissimum præstat. cum enim senectutem stipulam aliquis dixit, effecit, ut disceremus, atque ex genere cognosceremus; quia utrunq. defloruit. Ac idem quidem poetarum etiam similitudines præstant. itaque si recte, urbanae uidentur. est enim similitudo, quemadmodum supra diximus, differens adiunctione translatio. quare minus delectat; quia longior est, neque hoc illud esse inquit. uerum neque animus hoc requirit. Necesse est igitur et locutionem, & enthymemata illa urbana esse, quæ, ut celeriter discamus, efficiunt. quocirca neque eminentia enthymemata probanda, (eminentia uero uocamus, quæ sunt omnibus nota,

et quæ scrutari nō attinet.) neq; quæ postquā prolata sunt, ignoramus, sed quæ simul dum proferuntur, intelligimus, etiam si ante non intelligebamus, aut quæ paulo post mentis agitatione consequimur. siquidem efficitur quasi perceptio quedam, illo uero modo neutrum. Ac si sententia quidem eorum, quæ dicuntur, spectatur, huius generis enthymemata probantur; sin autem elocutio, figura quidem; si opposite dicatur, hoc modo: Et pacem alijs communem priuatis suis rebus bellum existimantibus. bellum paci opponitur. nominibus uero; si translationem contineant, eamq. neque alienam, quia ad uidendum difficilis est, neque eminentem, quia haudquaquam afficit; præterea ante oculos ponanti quia cernere, quæ aguntur potius, quàm quæ agenda sunt, conuenit. quo fit, ut hæc tria spectare debeamus, translationem, oppositionem, & actum. Ceterum cum translationes quattuor sint, probantur in primis, quæ ex proportionē ducuntur, quemadmodum Pericles dixit, iuuentutem, quæ in bello ceciderat, non aliter è ciuitate sublatam esse, quàm si quis ver ex anno eximeret: et Leptines de Lacedæmoniis: Non oportere pati, vt altero oculo Græcia orbaretur. & Cephisodotus, Charete de referendis rationibus belli Olynthiaci laborante, moleste tulit, cum diceret, eum, cum in furno populū inclusum haberet, rationes referre conari. & cum aliquando Athenienses adhortaretur, ut frumentatum in Euboeam irent, dixit, oportere Miltiadis decretū exire. & Iphicrates, cum Athenienses fædus cum Epidauriis, maritimamq. oram incolentibus percussissent, grauiter tulit, cum diceret, eos belli viatica sustulisse. & Puholaus

Paralum

Paralum populi clauam uocabat, *Sestum* uero cellam frumentariam *Piræei*, & *Pericles* *Aeginam* lippitudinem *Piræei* tolli oportere censebat, & *Noerocles* cum quendam bonum uirū nominasset, dixit, se illo nihilo nequiores esse; nam illum in ternis τούτοις nequam esse, se in denis. & *Anaxandridæ* *Iambi* de filiabus nubere cunctantibus: ὑπερπεποιμένοι τῶν γάμων αἱ παρὲναι. & illud *Polyeucti* in quēdam *Speusippum* apoplecticum, eum non posse consistere, quamuis πεντεσπύη ὁ morbo constrictum, & *Cephsodotus* *triremes* picta pistrina uocabat, *Canis* autē *cauponas* *Attica* phiditia. *Aesion* uero dixit: Ciuitatem *Siciliam* effuderūt. hoc enim translatio est, & ante oculos ponit. item: Vsq; adeo ut *Græcia* inclamarit. & hoc quodammodo translatio, & ante oculos. & *Cephsodotus* monebat, ut cauerent, ne multas conflictiones susciperent, conciones. & *Isocrates*: Ad eos, qui ad mercatus cōcurrunt. & ut in oratione funebri: Aequū erat, ut in sepulchro eorum, qui in *Salamine* occubuerunt, *Græcia* tonderetur, quia libertas cū illorū virtute sepelliretur. si. n. dixisset, æquum esse, ut lacrymaret, quòd uirtus sepelliretur, translationē adhibuisset, & rē ante oculos subiecisset. at illud, libertas cum virtute, quādam continet oppositionē. & quod *Iphicrates* dixit: Iter orationis meæ fiet per medias res à *Charete* administratas, translatio est ex proportionē, illudq; per medias, ante oculos ponit. & dicere, Aduocare pericula, ut periculis subsidio sint, translatio est, quæ ante oculos subiicit. item *Lycoleon* pro *Chabria*: Neq; supplicem æneam illius statuam reuerentes. translatio est. n. in presenti, non aut semper, uerum ante oculos ponit; quia dum ille in periculo est, statua supplicat. quare anima inanimato tri-

buitur: Commentarium rerum à ciuitate gestarum. item:
 Quacunque ratione vt humilia saperent, meditantes;
 quia Meditari est quiddam augere. item: Men tem deus lu-
 men accendit in animo; quia ambo illuminant aliquid. Neq;
 enim bella dissoluimus, sed differimus; quia ambo futura
 sunt, tum dilatio, tum pax eiusmodi. item dicere, Pañiones
 trophæum esse multo præclarius, quàm quæ in bellis erigū-
 tur, quòd hæc pro paruis rebus, & vno fortunæ successu po-
 nuntur, ille vero pro toto bello concipiuntur; quia ambo vi-
 ctoriae insignia sunt. Nam & ciuitates magnas pœnas homi-
 num vituperatione soluerunt; quia pœna iusta quædam no-
 xa est. Ac urbana quidem ex translatione proportionis,
 ipsaq. sub oculos subiectione duci, expositum est. Quid au-
 tem sub oculos subiicere appellemus, & qua re obeunda hoc
 assequemur, est exponendum. dico ergo, ea sub oculos subi-
 cere, quæcunq. res agentes significant, ut bonum uirum dice-
 re esse quadratum, translatio est; quia ambo perfecta sunt,
 uerum non significat actum, sed illud. Florentem vigorem
 habentis, actus est. & illud: Te vero tanq̃ ἀρετον, actus. &
 Hinc Græci concitati pedibus. Concitati, actus, & transla-
 tio. & quemadmodum multis in locis factitauit Homerus.
 inanimatis animū tribuendo per translationem. in omnibus
 autem actus conformatio commendatur, ut in his: Iterum
 ad ima voluebatur lapis impudens. Item: Euolauit sagitta.
 item: In terra stabant cupientia corpore saturari. item: Cu-
 spis penetrauit pectus sanguinis auida. in his enim omnibus
 eo quia animata sunt, actus elucet. nam impudentē, & aui-
 dum esse, & alia actus sunt. quæ quidem ex proportionem
 translationis applicuit. quam enim rationem habet lapis ad
 Sisyphum,

Sisyphum, eandem impudens ad id, cuius ipsum non pudet. atq; idem in probatis quoq; similitudinibus efficit, in rebus inanimatis: Curux, albescētes, nūc hinc, nūc inde recurrūt. facit enim omnes moueri, & uiuere. actus uero imitatio est. Ceterum à rebus propriis, & minime apertis trāsferre oportet, quemadmodum ante dictum est. quo pacto etiam in philosophia similitudinem longe distantibus in rebus cernere, solertis hominis est. quemadmodum dixit Archytas, idem arbitrum, atq; aram esse, quia utroq. confugit, qui iniuriā passus est. aut si quis diceret, anchoram, atq; cremastram idem esse, uerum superno, atq; inferno differre. et illud: Ciuitates adæquatas, in longe distantibus rebus, superficie, & opibus eadē est æqualitas. Maxima uero pars urbanorū à trāslatione, & à præcedente deceptione ducuntur, eò quia apparet magis ipsum didicisse, & uidetur animus dicere: Quā uere, ego autem errabam. Et apopthegmata, quæ urbana sunt, ex eo sunt, quia non, quod inquit, dicunt. ut illud Stesichori: Fore, ut cicadæ apud se humi canant. Et quæ egregie in modum ænigmati obscurata sunt, propter eādem rationem iucunditate afficiunt; quia perceptio fit, & translatio dicitur. Et, ut inquit Theodorus, res nouas dicere. id quod fit, quoties incredibile, & non, ut eius uerbo utar, priori opioni consentaneum sit: qualia in ridiculis, quæ leuiter immutata sunt. Atq; hoc etiam sales ab annominatione ualent. nam errorem obiciunt etiam in uersibus. neq; n. quemadmodum suspicabatur auditor: Ingrediebatur habens sub pedibus perniones. sed ille calciamenta dicturum existimauit. hoc autem simul ac dictum est, patere oportet. annominationes

nationes uero efficiunt, ut non, quod inquit, dicat, sed quod nomen inuertit. ut illud Theodori in Nicodem citharædum: ἑρᾶττα σε. simulat. n. dicere, ἑρᾶττα σε, & decipit; quia aliud dicit. itaq; discentem oblectat; quia nisi Thracem illum esse suspicetur, urbanum illud esse non uidebitur. item illud: Vis illum πέσαι. utrunq. autem nomen conuenienter prolatum esse oportet. Eadem uero urbanorum etiam ratio est. ut si quis dicat, Atheniensibus maris ἀρχὴν non ἀρχὴν fuisse malorum, nam quæstum fecisse. aut quemadmodum Isocrates: τὴν ἀρχὴν ciuitati ἀρχὴν fuisse malorum; quia utroque modo quod nemo dicturum putasset, id dictū est, idq. uerum esse cognitū est. nam τὴν ἀρχὴν dicere ἀρχὴν esse, haud sapientis sane hominis est. uerum non ita inquit, & ἀρχὴν, non quod dixerat, negat, sed aliter. in omnibus autem his, si nomen per homonymiam, aut translationem cōuenienter intulerit, tūc uirtus inest. ut Anaschetus non ἀνασχέτος, homonymiam negauit. Ceterum conuenienter fit, si semper bis. & Non eris magis, q̄ te oportet, hospes hospes. aut, Non magis, quā te oportet, idem. & Non oportet, hospitem semper hospitem esse; quia & hoc alienum est. quin etiam eandem uim scitum illud dictum. Anaxandridæ habet: Aequum est mori, priusquā morte dignū aliquid gerat. idē est enim, atque si dicatur: Aequum est, mori. cū non sit dignus mori. aut, Aequum est mori, cum morte non sit dignus, aut cum res morte dignas non gerat. Atque horum quidem elocutionis forma eadem est. sed quo breuius prolata, atque oppositius erunt, eò magis laudata erūt. idq. ob eam causam, quòd propter oppositionem percipiuntur facilius, propter exiguitatem uero, celerius. semper uero adsit, oportet aut is, in quem

in quem dicitur, aut recta prolatio, si quod dicitur, uerū, & non inane futurum est. siquidem hæc separatim habere licet. ut Mori oportet, nihil peccantem, sed urbanum non est: Dignam ducere dignum oportet, sed urbanum non est, uerum si simul utrumq. habuerit: Dignum est mori, qui non sit dignus mori. quo uero plura habuerit, eò urbanius iudicabitur. ueluti si nomina translata sint, & id genus translata, & opposita, & comparia, & actum habētia. Iā uero similitudines etiam, ut supra quoq; perpetuo admonitum est, probatæ quodammodo translationes existunt. semper. n. ex duobus ducuntur, ut proportionis translatio. quomodo scutum (dicimus) est poculum Martis, et arcus cithara sine chordis. ac ita quidem si dicamus, non est simplex. at si arcum citharam dicamus, aut arcum poculum, simplex. quin etiam ad hunc modum similitudines conferunt, ut tibicinis cum simia, lusciosi cum stillante lucerna; quia utrunq; cōtrahitur. uirtus autem elucet, cum translatio inclusa est. licet. n. scuti poculo Martis simile esse dicere, & parietinas p̄ ænei domus, & Niceratum dicere Philocratem esse à Pratyē morsum, quemadmodum Thrasymachus comparauit, cum Niceratū à Pratyē in rhapsēdia superatum, ceterum promisso capillo adhuc, & sordidatum conspicatus esset. quo in genere in primis exploduntur poetæ, nisi bene se gesserint, etiam si magni nominis sint. dico autem, quando ita reddunt: Vt apium distorta crura gerit, ut Philammon de iugo cum Coryco decertans, & alia eiusmodi omnia similitudines sunt. similitudines autem esse translationes, dictum est sæpius. Præterea prouerbia translationes à specie ad speciem sunt. ut si quis quid,

quid, quasi commodum capturus, inuexerit, deinde detrime-
ntū accipiat, Vt Carpathius, inquit, leporem. ambo enim id,
quod dictum est, pertulerunt. Ac unde quidem urbana di-
cta ducantur, & quamobrem, ferme exposita caussa est. Ii
uero probatæ etiam superlationes translationes sunt; ut in-
eum, qui sigillatis distinctam faciem habeat, hunc esse mo-
rorum calathum putassetis. est. n. rubrū quiddam sigillatū.
uerum nimium admodum. illud autem: Vt id, & id, superla-
tio est, locutione differens: Vt Philammon de iugo cum Co-
ryco decertans. Existimassetis ipsum Philammonē esse, qui
cum Coryco decertaret. Vt apium crura distorta fert. Fu-
tabam non crura, sed apia habere, vsque adeo distorta sunt.
Ceterum superlationes pueriles sunt, quippe quæ uehemen-
tissimi indicant. itaq; eas potissimū irati frequentant: Nō si mihi
tā multa det, q̄ multa sunt arena, & puluis, Agamemnonis
Atridæ filiā ducam, neq; si cum aurea Venere pulchritudi-
ne cōtendat, industria vero cum Minerua. Hoc aut maxime
Attici oratores utuntur. Itaq; senibus dicere, indecorum.

Elocutionem conuenientem esse debere.

NEQVE uero lateat nos oportet, diuersam elocutionem
unicuiq. generi conuenire; neq; enim eadem est scriptorum,
ac contentionum, neque concionum, ac iudiciorum. utranq.
autem cognitam habere necesse est; quia illud est, scire emen-
date loqui, hoc uero silere non cogi, siquid communicare cum
aliis uelit; id quod accidit iis, qui scribere nesciunt. Ceterum
scriptorum elocutio est, quæ accuratissima, contentionum
uero, quæ maxime cum actione coniuncta. huius autem duæ
sunt

sunt species, morata una, affecta altera. quo fit, ut actores fabulas eiusmodi, poetæ uero actores eiusmodi consecrētur. In manibus autem uersantur, qui leguntur, ueluti Chæremonepe quia accuratus est, ut qui scribit orationes; & Lycymnius inter dithyrambicos. quin si inter se comparentur orationes, quæ quidem scriptorum sunt, in contentionibus angustæ, quæ uero oratorum, quanq. bene habitæ, tamen inter manus uulgares uideantur. causa uero est, quod in contentionibus cōueniūt. itaq; quæ in actione uersantur, actione detracta, cum munere suo haud fungantur, insulsa, perinde ac dissoluta, uidentur. Et idē sæpe dicere in scriptione recte repudiatur, in contentione uero etiā ab oratoribus usurpatur; quia cū actione coniuncta sunt ceterū qui idē dicūt, uariant, necesse est. id quod quasi uiam munit actioni: Hic est, qui vos expilauit, hic est, qui decepit, hic, qui postremū prodere tentauit. quemadmodum Philemon histrio fecit tū in Anaxandridæ Gerontomania, quando colloquuntur Rhadamāthus, & Palamedes, tū in prologo Piorum in illo Ego. nā si quis ad hæc actionē non adhibeat, euadit ille, qui tragem gestat. Quin etiā eadē dissolutorum est ratio: Veni, occurri, rogauī. quia actionem eis adhibere necesse est, neq; quo modo, qui unum dicit, iisdem moribus, & tono proferre. præterea proprii habēt aliquid dissoluta, quod in equali tēpore multa dicta esse putantur. coniunctio enim quæ multa sunt, unum efficit. quare ea detracta dubitandum non est, quin cōtra unum multa fuerit. habet igitur amplificatiōe: Veni, narraui, supplicauī, multa: Videtur autem negligere, quæ narro, quæ dico. Atq; hoc quoq; præstare uult Homerus in illo: Nireus, qui ex Simo, Nireus, qui Aglaïæ filius,

qui pulcherrimus; quia de quo multa dicta sunt, is sepe etiam dictus sit, necesse est. si ergo sepe, etiam multa putantur, quare astute amplificauit, qui uis semel eius meminerit, memoriamque prodidit, quanuis haudquaquam postea uerba de illo fecerit. At concionum quidem elocutio umbratilis utique picturae similitudinem imitatur; quia quanto maior turba fuerit, tanto longius spectatur. quare summum studium in utraque inane, malumque uidetur. Iudicium autem accuratius est, & adhuc magis id, quod ad unum iudicem est; quia praesidium minimi in oratoriis est. siquidem quod rei proprium, quodque alienum est, facilius conspici potest. quin etiam contentio abest, usque adeo ut sincera iudicatio sit. itaque non iidem in his omnibus oratores laudantur, uerum ubi maxime actione est opus, ibi minimi est diligentiae locus; hoc autem, ubi uoce, & in primis, ubi magna. At demonstratiua quidem elocutio ad scribendum aptissima est, quia opus eius est lectio, secundo uero loco iudicialis. Ceterum illa elocutionis partitio, ut suauis, ut magnifica debeat esse, inanis est. cur enim magis, quam temperans, aut liberalis, & si qua alia moralis uirtus existit? nam suauitatem afferent nimirum ea, quae diximus. si modo probe uirtus elocutionis est definita. cuius enim rei gratia perspicuam, & non humilem, uerum decoram esse oportet? neque enim si loquax, aut etiam si concisa erit, perspicuitatem habebit; uerum medium scilicet conuenit. item suauitatem afferent, quae diximus, si uerba usitata, & peregrinitatem habentia, & rhythmus, & fides ex decore probe fuerint temperata.

At de elocutione quidem dictum est cum communiter de

de omnibus, tum priuatim de singulis generibus. reliquum est autem, ut de dispositione dicamus.

Quot, & quæ partes sint orationis, & de dispositione illarum.

CETERVM due sunt partes orationis. etenim & rem, de qua dicendum est, exponere, & eam demonstrare necesse est itaq; fieri non potest, ut qui exposuit, non demonstret, aut demonstret, qui non prius exposuerit. nam qui demonstrat, aliquid demonstrat, & qui præloquitur, demonstrandi causa præloquitur. horum autem illud propositio, hoc fides est, perinde ac si quis illam quæstionem, hanc demonstrationem esse distinguat. Nunc uero ridicule partiuntur. quia narratio orationis duntaxat iudicialis est. demonstratiue autem, & concionalis quo modo narratio esse, qualem quidem asserunt, potest? aut quæ contra aduersarium dicuntur, aut peroratio demonstratiuarum? proæmium uero, & aduersa collatio, & repetitio tum demum in concionibus adhibetur, cum, qui contradicat, existit. siquidem & accusatio sæpe, & defensio adhibentur, uerum non quatenus cõsultatio est. quin etiam peroratio non omnis iudicialis orationis est, ueluti, si pusilla oratio sit, aut res custodiri memoria commode possit; quia accidit, ut ex longitudine amputetur. Ergo propositio, & fides necessarie partes sunt. ac præcipue quidem hæ; quæ uero plurimæ, proæmium, propositio, fides, peroratio. nam quæ contra aduersarium dicuntur, inter fides reponuntur; & aduersa collatio suarum est rationum amplificatio. quare pars quædam est fides; quia qui hoc facit, demonstrat ali-

quid: non autem proœmium, neq; peroratio, uerum in memoriam redigit. Quod si has aliquis, ut Theodorus fecit, distribuat, narratio altera erit, & supernarratio, & prænarratio, & refutatio, & superrefutatio. uerum qui formam, ac differentiam aliquam infert, imponere nomen debet: alioquin inane id, ac nugatorium sit, ut Licymnius in *Arte* facit, *ἡ προῤῥωσις* nominans & *ἡ ποσὶ ἀντιστις*, & ὁλοσ.

De proœmio.

Ac proœmium quidem principii orationis est, perinde atq; in pœsi prologus, & in auleſi proaulium (hæc n. omnia principia sunt) & quasi uia munitio inuadenti. Ac proaulium quidem demonstratiuarum proœmio simile est, quia tribu-
τὸ ἐνδοξίῳ nes quodcunque commodè canere possunt, id præcinentes *τὸ ἐνδοξίῳ* adnectunt, atq; in demonstratiuis orationibus ita scribere conuenit: quidquid n. placuerit, initio exponentem, copulare, atq; adnectere oportet. cuius rei exemplum omnes Isocratis Helenæ proœmium afferunt, quod nulla propin-
ἡ εὐαγία quitas intercedat. Helenæ cum sophistis. simul uerò etiam, si euagabitur, ut non tota oratio uniusmodi sit, conuenit.

Ceterum demonstratiuarum proœmia à laude, aut uir-
ἡ εὐαγία peratione ducuntur, ut Gorgias in Olympica oratione: Digni, quos pleriq; admirentur, Græci sunt. laudati. n. eos, qui conciliabula cogunt, quos Isocrates uiruperat: quia muneribus corporum uirtutes excoluerunt, bene sentienti-
ἡ εὐαγία bus aut hominibus nihil præmij dlatuerūt. Et a suasionem, ut Bonis uiris tribuendum honorem esse, (unde ipse laudat Aristidem,) aut certe eis, qui neq; probau, neq; improbi
ἡ εὐαγία sint,

sint, sed qui cum boni sint, tamen in obscuritate versantur, ut Alexander Priami filius. siquidem hic consilium dat. Præterea à iudicialibus præmiis, idest ab iis, quæ referuntur ad auditores, si de re incredibili dicatur, aut difficili, aut inter multos divulgata, ut ueniā largiantur. quemadmodum Choerilus: Nunc vero cum omnia dissipata. Ac demonstratiuarum quidem orationum præmia ab his dicuntur, à laude, à uituperatione, ab adhortatione, à dehortatione, ab iis, quæ referuntur ad auditorem. uerum aut aliena, aut affinia orationi tā in dōcipia esse oportet.

Proemia uero iudicialis idem, atq; prologos dramati, et præmia epicorū ualere, tenendū est. siquidē dihyrāborum quæ sunt, demonstratiuarū similitudinē imitantur. Propter res, tuaq. munera, atq; spolia. In logis aut, & epicis orationis ostentatio sūt, ut prospiciāt, qua de re sermo habetur, neq; suspēs animus teneatur. etenim uagari, quod indefinitū est, cogit. qui ergo quasi in manū principiū tradit, facit, ut hæres sequatur orationē. ob id: Irā diua, refer. Dic mihi Musa virū. Recipe mihi sermonē aliū, ut ex Asia bellū magnū in Europā transferit. Quin etiam tragici in dramate indicāt, quanuis non statim, ut Euripides, sed in prologo tamē etiā indicat, perinde ac Sophocles: Pater mihi fuit Polybus. eodemq. modo comædia. Ac maxime quidem necessariū, & propriū præmii munus hoc est, indicare, quinā sit finis, cuius causa oratio instituta est: itaq; si nota, & parua res sit, non est utendum præmio, reliquæ uero, quas afferunt, formæ, medicamenta sunt, & communes. eæ uero & ab oratore, & auditore, & re, aduersarioq. ducuntur. Ac ab ipso
quidem,

quidem, & aduersario, quæcunq; ad depellendam, offerendamq; criminationem attinent. eorum tamen dispar est ratio; nam qui defendit, primo loco criminatione, qui accusat, in peroratione neque uero causa obscura est. nam qui defendit, quotiescunq; semetipsum est illaturus, quæ obstant, remouere nescire habet; usque adeo ut primo loco criminatione diluenda sit. qui uero criminatur, in peroratione criminari debet, ut firmitus memoria teneant. Quæ uero referuntur ad audientem, ab illo benenolo reddendo, aut irato, interdum uero etiam attento, aut contra. neque enim attentum facere, semper expedit. quo fit ut ad risum traducere multi conentur. ad docilitatem aut omnia perducunt, si cui placuerit, tum si bonus appareat; hos enim magis attendunt. attenti uero rebus magnis, propriis, admirabilibus, iucundis fiunt. quare hi de rebus agi, iniicere oportet; sin autem non attentos: de paruis, nihil ad eos pertinentibus, iniucundis. Neque uero nos fugiat, extra causam eiusmodi omnia esse, quia ad prauum auditorem, & ea, quæ sunt extra causam, audientem, referuntur. quoniam nisi talis sit, nulla alia de re opus præmio sit, quam ut summam rem exponat, ut æque ac corpus, caput habeat. Iam uero attentos facere, omnium partium est commune, si opus sit; quia ubicunq; magis, quam incipiendo, languescunt. quocirca ridiculum est, id in principio collocare, cum maxime omnes attente audiunt. quare ubi tempus tulerit, dicendum est, & Mihi animum adhibete, neque enim ad me hoc magis, quam ad vos pertinet. & Exponam enim vobis rem, qualem nunquam alias audistis, atque orem; aut adeo mirabile. hoc autem est, ut Prodicus dixit,

dormitan-

dormitantibus auditoribus aliquid quinquaginta drachmarum demonstrationis inferre. uerum hæc ad auditorem referri, non quatenus auditor est, eo apparet, quod omnes aut crimina obiciunt, aut metus discutunt in proœmiis. (Non dicamò rex, quanto studio. Quid proœmiaris?) & qui malam causam habent, aut habere uidentur. præstat enim ubiq. quàm in causa consistere. unde serui haudquaquam interrogata respondent, sed ambages, & proœmia dicunt. Vnde uero beneuolentiam comparare conueniat, & de rerum eiusmodi aliarum unaquaq. præceptum est. quoniam aut probe dictum est: Fac, ut ad Phæacas amicus, ac miserandus veniam, hæc duo spectare oportet. In demonstrationis autem danda opera est, ut putet auditor, collaudari aut ipsum, aut genus, aut studia ipsius, aut aliquo alio modo. quod enim inquit Socrates in Funebri, uerum est, nihil negocii esse, Athenienses apud Athenienses laudare, uerum apud Lacedæmonios.

Proœmia uero cōcionalis orationis ex proœmiis iudicialis existunt. uerum natura nequaquam habet. etenim & de quo agatur, intelligunt, & res nullam aliam ob causam proœmium postulat, quàm aut propter ipsum, aut aduersarios, aut si non quantam uelis, uerum aut maiorem, aut minorem, existiment. quare aut criminationem offerre, aut depellere, itemq. aut augere, aut extenuare necesse est. horum igitur causa proœmium postulat, aut certe ornatus gratias quia nisi eo prædita sint, abrupta uideantur; tale enim Corgie encomium est in Eleos; quia nullo connixu, nulloq. motu ante adhibito confestum orditur. Elis beata ciuitas.

De

DE CRIMINATIONE uero, unum est, unde malam aliquis opinionem detraxerit. etenim aliquo ne orante, an secus, nihil refert. quare hoc generale est.

Alius modus est, occurrere non aliter, atque iis, de quibus controuersia existit, nempe aut non esse, aut noxium non esse, aut non huic, aut non tantopere, aut iniustum non esse, aut non ualde, aut non turpe, aut non magnopere. tales enim res in controuersiam ueniunt. ut Iphicrates audersus Naisicratem, asseruit enim, se fecisse, quod ille dicebat, itemq. nouisse, uerum non iniuste fecisse.

Aut qui iniuste facit, compensare; si noxium, at honestum, si molestum, at utile, aut aliquid tale.

Alius modus est, quod errore commissum est, aut infortunio, aut necessitate. ut Sophocles confessus est ille quidem, se tremere, uerum, non quemadmodum qui criminabatur, aiebat, ut senex uideretur, sed ex necessitate. neque enim se annos octoginta libenter agere.

Et cuius gratia, compensare; quod non nocere uoluit, sed hoc, & non illud, quod ille fecisse criminatus est. accidit autem, ut ei noceretur. atqui odio dignus essem, si ut hoc euaderet, commisisssem.

Alius: num qui criminatur, simul teneatur, aut nunc, aut prius, aut ipsi, aut propinquus eius.

Alius: num simul teneantur, quos illi crimini affines non esse fatentur: ut si purus adulter est, ergo & hic, & ille.

Alius: an alius crimen conflagrit; aut ipsi alius. aut sine criminatione suspecti, ut ipse hoc tempore, fuerint, qui innocentes esse reperiuntur.

Alius:

Alius: criminantem recriminari, quia absurdum est, se ille indignus sit, cui credatur, uerbis eius fidem haberi.

Alius: si iudicium factum est, ut Euripides contra Hygienontem, à quo in antidosi impietatis accusabatur, ut qui periurium faciendo carmine tradidisset: Iuravi lingua, mentem iniuratam gero. respondit enim, inique illum agere, qui iudicia ex Dionysiaco certamine in fora traduceret. nã ibi se rationem reddidisse, ac redditurum esse, si accusare libuerit.

Alius: calumniam, quarta res sit, accusare, atque hanc diuersa iudicia constituere.

Communis autem ambobus locus est, notas afferre, ut in Teucro Vlysses, quòd Priamo sit affinis, quia Hefione soror sit. ille uero: quòd pater Telamon Priamo inimicus sit, & quòd exploratores non indicarit.

Alius: criminatoris rem parua multis uerbis, magna paucis laudando, uituperare. aut multis bonis allatis id unum, quòd ad rem pertineat, reprehendere. tales autem sunt qui callidissimi, atque iniquissimi sunt; quia rebus bonis officere, iis malo temperandis, conantur.

Illud autem crimen inferenti, diluentiq. commune est, quoniam contingit, ut eadem res plurium rerum gratia gesta sit, qui criminatur, eam deprauare in deteriore partem arripiendo, debet, qui uero purgat, in meliorem exempli gratia, quòd Diomedes Vlysses præ ceteris sibi asciuit, hic quidem, quòd Vlysses optimum indicauit, ille uero, quòd non, sed quia solus ille, ut ignauus secum non erat concertaturus.

Ac de criminatione quidem tam multa dicta sint.

De narratione.

NARRATIO uero in demonstratiuis quidem est, non cōtinenter, sed in partibus. siquidem actiones persequi conuenit, ex quibus constat oratio. constat autem oratio partim ex iis, quæ arte carent, quia qui dicit, actionum auctor non est, partim ex iis, quæ artem habent. hoc autem est, ut res aut esse demonstretur, si fide careat, aut qualis sit, aut quanta, aut etiam omnia. Propterea uero cōtinenter narrare omnia aliquando non conuenit, quia quæ ita demonstrantur, ægre custodiri memoria queunt. Atque ex his quidem fortis est, ex his autem sapiens, aut iustus. Et hæc quidē oratio simplicior est, illa uero uaria, Et non attenuata. Notas aut actiones in memoriā reuocare oportet. quo fit, ut pleriq. narratione non egeant. ut si Achillem ornare uelis; nempe quia facta uniuersi norunt; uerum illis utendum est, sin aut Critiam, oportet. neque enim multi norunt.

Nunc uero ridiculæ narrationem breuem esse oportere præcipiunt. Atqui ut ille pistori quærenti, utrum durum, an mollem subigeret, quid, inquit, bene, non potest? item hic eadem ratione. oportet. n. narrationem non longā adhibere, perinde atq; neq; præmium, neq; fides longas afferre, (neq; enim in hac parte uirtus sita est in breuitate, aut cōcissione, sed in modo: hoc aut est, ea dicere, quæ rem declarent, aut quæ adducit ad opinandum, fecisse, aut iniuste fecisse, aut ea, quanta uis, tanta esse, aduersario uero contraria.) sed narrationi tamen attexere quæcūq. ad tuā uirtutem pertineant. exempli gratia: Ego uero illum assidue

due admonēbam, quæ iusta essent, subijciens, ne liberos de-
fereret; aut ad improbitatem alterius. Ille vero mihi respō-
dit, sibi vbiq̃ue fuisset, alios liberos affuturos. id quod
Aegyptios deficientes respondisse, prodit *Herodotus*; aut
certe quæcunq̃. iudicibus grata sunt. Defensori uero minor
narratio est. Controuersie autem sunt, aut factum nō esse,
aut noxium non esse, aut non iniustum, aut non tantopere.
quocirca confessis in rebus insistendum non est, nisi quid ad
illud attineat; ut si factum est, at non iniustum. Præterea
res gestas commemorare oportet, quæcunq̃. dum geruntur,
aut miserationem, aut indignationem non excitant. cuius rei
exemplo est *Alcinoi* apologus, qui apud *Penelopem* uersi-
bus sexaginta confectus est. & ut *Phayllus* circulum, &
qui est in *Oeneo* prologus. Morata uero esse narratio de-
bet. erit autem, si, quid mores efficiat, cognouerimus. Ac-
uum quidem est, indicare prælectionem. mores autem cu-
iusdammodi sunt, quia hæc cuiusdammodi est. prælectio
uero cuiusdammodi est propter finem. propterea mathema-
tici sermones non habent mores, quia neque prælectionem;
siquidem ipsum cuius causa non habent. Reliqua uero mo-
rata sunt, quæ moribus singulis consequentia sunt. ut Cum
hæc diceret, incedebat. quia audaciam, & rusticitatem mo-
rum declarat. Et non tanquā ex ratiocinatione dicere, ut
huius ætatis homines, sed tanquā ex prælectione: Ego ve-
ro volebam (siquidem id prælegarem, etiam si quæstum
nullum facerem) quod melius. illud enim prudentis est, hoc
uero boni. prudentis enim est in utilitate persequenda, boni
uero in honestate. Et, si res fide careat, tum demum causam

subiicere: cuius rei Sophocles exemplum nobis suppeditat ex *Antigona*, quod fratrem cariorum haberet, quam maritum, aut liberos. nam eos, etiam si perierint, affuturos: Matre vero, & patre mortuis, frater nunquam poterit exoriri. Et si causam non habeas, at te non ignorare, quod incredibilia narras, sed te talem esse natura. neque enim adduci possunt, ut credant, aliquem aliud quid sponte sua obire, quam quod est utile. Præterea ex iis, quæ afficiendi vim habent, dicere, narrare, & quæ consequuntur, & quæ sciunt, & quæ proprie aut ipsi, aut illi ad sunt: Ille vero me respiciens abiit. & ut de *Cratylo* *Aeschines*, quod Exhibens, & manibus explodens. quia ad fidem faciendam proficiunt, propterea quod ea, quæ sciunt, indicia fiunt eorum, quæ nesciunt. plurima uero eiusmodi mutuari ab *Homero* licet. Sic ait, ast anus manus. faciei obtendit. quia qui lacrymare incipiunt, oculos attrahunt. Atque ilico te ipsum. cuiusdammodi inserto, ut te eiusmodi intueantur: itemque. aduersarium. uerum oculi te facito. hoc autem quam facile sit, ex iis, qui nunciant, cognoscendum est. quas enim res penitus ignoramus, de iis tamen aliquam suspicionem concipimus. Multis autem in locis narrare conuenit, atque interdum etiam non in principio. In concione uero nullus narrationi locus est, quia de futuris rebus narrat nemo. sed si narratio extiterit, rerum præteritarum erit, ut earum recordati melius deliberent de futuris, aut criminando, aut laudando. uerum tunc suaseris munere non funguntur. Quod si res fido careat, pollicere, te & causam statim allaturum, & ad eorum arbitrium tractaturum. ut *Iocasta* *Carcini* in *Oedipode* pollicetur assidue, cum percontatur.

cū percōtaretur is, qui filiū quærebat, & *Aemō Sophoclis.*

De Fide.

FIDES autem ad demonstrandum accommodatas esse oportet. demonstrare autem opus est, (quoniam quattuor de rebus est controuersia) demonstratione ad id, quod in controuersiam adducitur, afferenda. exempli caussa, si non fecisse contendit, in disceptatione ad hoc maxime demonstratio cōferenda est, si uero non nocuisse, ad hoc, & quod non tantopere, aut quod iure. eademq. ratione, si num factū hoc esset, in controuersiam uocaretur. Nec uero lateat, in hac sola controuersia necesse esse, ut alter improbus sit. neque. n. ignorantio caussam sustinet, quemadmodum si qui de iusto contendere. quare in hoc consistendum est diu, in aliis uero non itē. In demonstratiuis autem plerunq. utilium, et honestorū amplificatio inerit. facta enim credi oportet. etenim raro horū quoq; demonstrationes afferunt; si fide careant, aut si caussa in alium conferatur. In concionibus autem aut euentura nō esse contendemus, aut euentura illa quidem, quæ ille censet, uerum iusta non esse, aut non utilia, aut non tantopere. Videndum porro illud etiam est, si quid extra caussam metiatur; quia hæc indicia certa uidentur, quod in aliis etiam rebus mentitur. Iam uero exempla concionibus aptissima, enthymemata iudiciis accommodatiora sunt. illa enim de futuris est, unde ex præteritis exempla ducere oportet; hoc uero de iis, quæ sunt, aut non sunt. cuius rei demonstratio, necessitasq. magis existit; quippe quia necessitatem quod factū est continet. Neq; uero enthymemata continenter proferre debet,

bes, sed permiscere. *sin minus*; mutuo se lædunt. *siquidē* quā-
ti quoq; terminus est: Care mihi, quoniam tam multa dixi-
sti, quā multa prudens vir, non autem talia. Neq; de omni-
bus rebus enthymemata indagare. *sin minus*; facies, quod
nonnulli faciunt eorum, qui in philosophia uersantur, qui
res concludunt notiores, ac certiores, quā sint eæ, ex qui-
bus dicunt. Et cum affectum excitas, enthymema ne pro-
feras; quia aut affectum eiiciet, aut enthymema frustra pro-
latum erit. motiones enim se inter se eiiciunt, quæ simul sunt,
& aut se ipsæ conficiunt, aut certe infirmant. Neq; cum mo-
ratam affers orationem, simul enthymema aliquod indaga-
re oportet; quia neque mores, neq; prælectionem demonstra-
tio continet. Sententiis autem uti debes tum in narratione,
tum in fide; quia ad mores id pertinet. Et ego dedi, quāuis
scirem, credere non oportere. *sin autem affecte*. Neq; tamē
me pœnitet, quanuis iniuriam acceperim, quia isti lucrum,
mihi ius superest. Est autem difficilior concionem habere,
quā de iure contendere. merito; quia de rebus futuris agi-
tur, ibi uero de præteritis; quas uates demum quoq; nosse, ut
dixit Epimenides Cres, possunt. ille enim de futuris rebus
non diuinabat, sed de præteritis illis quidem, uerum obscu-
ris. atq; etiam in iudicialibus lex hypothesis est; qui uero
principium tenet, demonstrationem facile reperit. nec mul-
ta sane diuertacula habet, ueluti contra aduersarium, aut de
semetipso, aut ad afficiendum, uerum minime omnium, nisi
egrediatur. cui ergo copia non suppetit, is id facere debet,
quod Athenis faciunt oratores, præsertim Isocrates. qui
suadendo accusat, ut Lacedæmonios in Panegyrica, Chare-
tem in Sociali. In demonstratiuis autem intexenda laudibus
oratio

oratio est. ut facit Isocrates, qui semper aliquem inserit. & hoc est, quod dicebat Gorgias, haudquaquam sibi orationem deesse: quia si de Achille dicat, Peleum laudet, deinde Aecum, deinde deum, similiter uero etiam fortitudinem, aut hoc & illud faciat, aut aliquid tale. Ac si demonstrationes quidem habeas, & morate, & demonstratiue dicere debes; sin autem enthymematibus careas, morate. quin probo uiro magis conuenit, ut bonus uideatur, quàm ut exquisita oratio. Ex enthymematibus autem quæ refellendi uim habent, uehementius probantur, quàm quæ demonstrandi: quia quæ refellunt, syllogismo conclusa esse, apertius est. siquidem contraria inter se collata sunt notiora.

QVAE VERO contra aduersarium dicuntur, diuersi alicuius generis non sunt, sed inter fides numerantur. quod est alia obiectione, alia syllogismo, dissoluere. In consultatione autem, & in iudicio, qui priore loco dicit fides suas prius exponere, post autem contrariis occurrere soluendo, atq; euando debet; quod si aduersa causa multiplex sit, ante contrariis. ut fecit Callistratus in Messeniaca cōcione. iis enim, quæ dicturi erant, sublati, tum ita ipse dixit. qui uero posteriore loco dicit, prius contra aduersarii orationem dicere soluendo, & syllogismum opponendo debet, & maxime, si approbata sint. ut enim hominem, qui in crimen ante uocatus sit, animus non recipit, sic neque orationem, si aduersarius bene dixisse putetur. oportet igitur locum futurae orationi in auditore parare. fiet autem, si remoueris. itaque aut contra omnia, aut quæ maxima, aut quæ approbata sunt, aut facile redargui possunt pugnando, ita suis ipsius fides est comparanda:

comparanda: Deabus primum socius ero. ego enim Iunonem, in his, quod insulsissimum est, primum attigit. *Ac de fide quidem hæc.*

AD MORES aut. quoniã nonnulla de semetipso dicere aut inuidiã, aut loquacitatẽ, aut obtrectationẽ habet, de alio uero aut cõuitiũ, aut rusticitatem; Alterũ dicẽtem i ducere debemus. quod Isocrates facit in Philippo, & in Antidosti, & quo modo uituperat Archilochus. quippe qui patrem de filia dicentẽ in Iãbo facit: Rerũ insperata nulla est, nec iure iurando negari potest; et Charonẽ fabrũ in Iãbo, cuius principiũ est: Non mihi Gyge opes. & ut Sophocles Aemonẽ de Antigona apud patrem, perinde ac si alii loquerentur. Iam uero enthymemata etiam immutare, & interdum in sententias transferre conuenit, hoc pacto: Prudẽtes pactiones facere oportet, cum prospera fortuna vtuntur; sic enim optima conditione fuerint. *enthymematice uero:* Si enim cũ pactiones commodissimæ sunt, ac optimam conditionem afferunt, tum pacisci oportet, profecto tum, cum prospera est fortuna, pacisci oportet.

DE INTERROGATIONE uero oportunũ est, eã adhibere, in primis quidẽ cũ unum asseruerit, usq; adeo ut altero præterea interrogato, consequatur absurdum. ut Pericles Lamponem de initiis sacrorũ Sospitæ sciscitatus est. Cui cũ ille diceret, non posse, qui non initiatus esset, audire, rogauit, an ipse nossent? aiente illo. at quo modo, cum nõ sis initiatus?

Secundo loco, cum unum quidem pateat, alterũ uero interroganti dubium non sit, quin cõcessurus sit. cum. n. unam propositionem percontatus fuerit, quod patet, interrogare non conuenit, sed conclusionem inferre. ut Socrates, cum

Melitus

Atelitus negaret, ipsum deos esse putare, dixit, num demonium aliquid assereret? assentiente autem illo, rogauit; non ne demones aut deorum filii, aut diuinum aliquid sunt? aien te illo. est igitur, inquit, qui deorum filios esse putat, deos autem nequaquam.

Præterea, quando futurum est, ut aut cōtraria, aut incredibilia eum dicere demonstret.

Quarto autem loco, quando non licet, nisi sophistica responsione dissoluere. nam si ita responderit, esse, & non esse, aut hæc quidem, illa uero non, aut aliqua ex parte quidem, ex aliqua uero non, conturbantur, ut hesitantes. aliter aut tentare nō oportet. nam si restiterit, uictus esse existimatur. neque. n. multa interrogare propter auditoris infirmitatem licet. quocirca enthymemata quàm maxime contrahere conuenit.

Respondere autem oportet, ad ambigua quidem, oratione distinguendo, & non concise, ad ea uero, quæ contraria existimantur, statim cum responsione solutionem asserendo, priusquàm quod reliquum est interroget, aut syllogismo concludat. neque enim, quam in re ratio consistat, prospicere difficile est. uerum tam hoc, quàm solutiones nobis intelligentur ex Topicis.

Et ei, qui concludit, si conclusionem interrogando confecerit, causam asserre. ut Sophocles rogatus à Pisandro, an idem ipse, quod alii præconsultores de quadringentis uiris constituendis censuisset, assensus est. quid uero? non ne hæc tibi nefaria esse uidebantur? assensus est. non ne igitur hæc tu nefaria commisisti? sane inquit. non enim meliora

alia suppetebant. Et Laco cum rationem de ephoratu in iudicio redderet, rogatus, an ipse alios iure perisse existimaret, assensus est. ille uero: non ne hæc tu cum illis decreuisti? & ille assensus est. non ne igitur iure? & tu, inquit, peribis? minime uero, inquit: illi enim pecuniis acceptis hæc commiserunt, ego uero nequaquam, sed ex sententia. quocirca neque post conclusionem, neque conclusionem interrogare debemus, nisi multum ueritatis supersit.

DE RIDICULIS autem, quoniam usum quedam in contentionibus habere uidentur, & Gorgias aduersariorum seriarisum, risumque feritis discutiendum esse, præcepit, & recte præcepit, quam multa ridiculorum genera sint, in præceptis poetica dictum est. quorum unum quidem libero homini conuenit, alterum uero secus. id igitur, quod sibi aptum est, sumat. est autem iocus scurrilitate liberalior. ille enim sui causa ridiculum fingit, scurra uero alterius.

De peroratione.

PERORATIO uero quattuor in rebus consumitur, tum ut auditorem erga se bene, erga aduersarium male constituat, tum ut amplificet, ac deprimat, tum ut in affectus auditorem impellat, tum demum, ut memoriam renouet. Etenim ita comparatum natura est, ut postquam semetipsum uerum, aduersarium falsum esse ostenderit, tum & laudet, & uituperet, & expoliat. duorum autem alterum spectare oportet, aut se his bonum esse, aut simpliciter, illum uero his malum esse, aut simpliciter. unde uero tales constituere debeat, expositi

positi loci sunt, ex quibus bonos, malosq. conformare conueniat. Postquam uero demonstratum hoc fuerit, natura fert, ut augeat, aut extenuet. etenim facta consent, oportet, si dicturus est, quanta sint. siquidem corpora ex iis, quæ ante inerant, adaugentur. unde autem augere, ac extenuare conueniat, loci supra monstrati sunt. Vbi uero hæc & qualia, & quanta sint, patent, post hæc sequitur, ut auditorem in affectus impellat, hoc est ad misericordiam, & indignationem, & iram, & odium, & inuidiam, & contentionem. quorum etiam traditi loci sunt. Quamobrem reliquum est, ut quæ ante dicta sunt, in memoriam redigat. hoc aut ita facere conuenit, uti præcipiunt in præmiis; non recte admonentes. iubent enim, ut quo facile perdiscantur, semel, atque iterum dicat. uerum ibi quidem exponenda res est, ne id lateat, de quo est iudicandum, hic uero, ex quibus est demonstrata, summam. Principium autem ab eo sit, ea se, quæ pollicitus fuerat, persoluisse. quamobrem & quæ, & ex quibus, aperiendum. ducitur autem ab aduersa collatione aduersarii. conferre uero oportet, aut quæcûq. de eadem re ambo dixerunt; idq. aut e regione: Atque hic quidem hæc de re hæc, ego uero hæc, & ex his; aut a dissimulatione, ut: Hic enim hæc dixit, ego uero hæc, item, Quid fecisset, si hæc ostendisset, non autem hæc? aut ab interrogatione: Quid non ostensum est? aut sic: Quid iste tandem ostendit? aut igitur ita, nempe a collatione, aut secundum naturam, prout exposita sunt, quæ ab ipso, & rursus, si libuerit, separatim quæ ab aduersario dicta sunt. Fini uero dissoluta dictio conuenit, ut peroratio sit, non oratio: Dixi, audistis, tenetis, iudicate.

F I N I S.

SEQVENTIA LOCA SIC

legito, aut corrigo.

11. 15 permittere necesse est. neq; enim, vt ea legislator
prouideat, fieri potest. Quæ
14. 7 persuasibilia insint, quemadmodum & in aliis
artibus omnibus. neque enim
15. 15 quod aut bonum est, aut malum
34. 10 futura, aut præsentia, & quæ
37. 18 tum quæ fiant, tum quæ facile fiant
39. 14 sacrilegium surreptio, quia qui sacrilegium fece-
rit etiam surripuei it. Et quæ
48. 23 excellentiam arguunt. Et ad memoriã illustria.
Et quæ
55. 19 vtrum nonnulla secundum naturam
55. 27 intemperantes nonnulla vtilia faciunt
56. 11 iucunda sunt, aut bonorum, ac iucundorum
speciem
59. 25 sunt enim alii iucundi, si quis assueuerit, alii con-
tinuo iucundi, vt venatio
62. 12 & orationes, & actiones. de ridiculis
68. 18 qualia vero præligant
69. 3 eiusmodi vero nomina omnia
70. 22 quàm factis iudicari malle. Et ad arbitrum, quàm
ad iudicem ire malle; quia æquum
75. 5 at de moribus aut sui ipsius
77. 17 ipsum iurare nolle, de quibus
78. 2 peierare autem.
78. 8 ipsi uero non stabimus? & quæcunq; aliquis ad
augendum attulerit. Ac fides
83. 8 eo, qui dignus
86. 28 mordent. Et iis qui serio agunt cum serio agenti-
bus. quia curari, & nō contemni videtur. Et iis,

qui maiorem gratiam tribuerunt. Et iis, qui rogant.

87. 8 ad quos sunt, duobus
 92. 14 sed propè esse videatur, vt impèdeant. quæ enim
 93. 1 nunc vero potest. Et metus
 94. 19 capit. Quare
 97. 13 & similia; quia turpia sunt
 98. 2 hæ, & eiusmodi
 98. 9 qui suspiciunt, & quos suspicit, à quibus
 101. 6 & in periculis. si quidem qui in periculo, molestiaq; versatur, appetit. nam iis,
 102. 25 neq; rursus qui valde metuunt
 102. 26 & si bonos aliquos arbitrantur
 106. 10 antiqua prope accedere videntur ad naturalia;
 107. 11 si boni & virtute præditi sint;
 113. 17 nimium agant. Et iniurias faciunt ad contumeliam.
 119. 11 ea, quæ quærentur iudicat;
 121. 23 ipse vero non poterit inuenire
 126. 11 causa vero adiecta, & cur ita sit
 138. 29 eligant, sed contra.
 141. 1 aut agit, aut egit; satis enim.
 135. 29 A diuisione. vt si trium
 155. 19 suauis indicia vocis
 174. 23 si dicatur; Dignum est mori, cum non sit dignus mori, aut: Dignum est mori
 175. 18 parietinas panno domus

Habita licentia à Reuerendo Patre
 Inquisitore.





quoniam non habentur in his. Et in quibus


27. 8 ad quos sunt, quibus
28. 14 sed propter esse videtur, ut impediantur per enim
29. 1 tunc vero potest. Et inquit
30. 10 caput. Quare
31. 12 & similia; quia turpia sunt
32. 2 hec, & eummodi
33. 9 quia insipientes & quos inspicit, a quibus
34. 6 & in periculo, si quidem qui in periculo, mole-
35. 12 sed; veritatem, appetit namque
36. 27 neque, turpis qui alio meretur
37. 26 & si bonos aliosque arbitramur
38. 10 antequam prope accedere viderentur, ad naturalia.
39. 11 si boni & virtute præditi sunt;
40. 17 animam agant. Et inquit, faciant ad contem-
41. 12 nam.
42. 17 ea, quæ duntaxat indicat;
43. 22 ipse vero non poterit imitari
44. 11 cunctis vero adiectis, & cum ita sit
45. 20 claudat, sed contra.
46. 1 aut agitur, aut erit; latet enim.
47. 20 A diuinitate, vel si etiam
48. 19 fuerit, deus vocis
49. 25 si dicatur, Dignus est mortui, cum non sit dignus
50. 25 mortui aut: Dignum est mortui
51. 18 pariterque panis domus

Habitu licentis & Reverendo Patri

Indulgentiore.









7288

Rest. Libro Antico
Cav. G. DI GIACOMO
Tel. 71550 - PESCARA

-1980

S
C
E
B

B
S
P

A